

# IONI

## Ioniva Iesusiva nrohurara tura

---

### Iesusira okyarara tura

**1** <sup>1</sup>Haaru toharero quavanto varura. Mwi quava Kotikyantiri varura. Mwi quava nai Kotiva varura. <sup>2</sup>Taura toharero mwi quava Kotikyantiri variqiro vura.

<sup>3</sup>Mwiva Kotikyantiri variqi viqaro mpo inraikya mpo inraikya ekyaa inraikya utu kyero vatora. Mpovantovata mpo inraikya utuariva hia varuvaro qua mwiva nraahu ekyaa inraikya utu kyero vatora.

<sup>4</sup>Mwi quava qati variqi vi variara tuqvantoma variro. Mwi quava omwa votima kyero itamwaqiro viqaroma nraakye qora kyugema kyero ntuaahama nyatero. <sup>5</sup>Omwavanto upi hiraqi itamwaqiro viharo hiama enta hi inraikyava mwia qipa kyaariva vahiro.

### Nramanri nyi varuva, Ioniva Iesusirara timwa nyunra

<sup>6</sup>Kotiva vaisi mpo titora mwia nrutu Ioniva. <sup>7</sup>Nraakye qoravanto Iesusirara mwiva qutaa omwavantove qiate tiro, Ioniva mwianra timwa nyinrenro nri ntora.

<sup>8</sup>Ioniva nai hia mwi omwava variraitiro, mwiva omwa mwianra timwa nyinrenro nrunra. <sup>9</sup>Mwiva nri ntovaro mwia nraakiara quavanto nri ntero omwa votima kyero itamwaqiro viqaroma ekyaa mwaa mwataraqaa nraakye qora ntuaahama nyatero.

### Iesusira qoririma mwatora

<sup>10</sup>Iesusiva nai mwaa mwatara utu kyero vatova mwatanai tumuvata mwaa mwatanaahua hia mwia ntapihi kye taqaraitita, mwianra hia mwivave tita.

<sup>11</sup>Mwiva nai nramwunaahua hunani nri ntovata mwia nramwunaahua hia mwia kyakyama mwataraitita, mwia qoririma mwatora.

<sup>12</sup>Mwitaahuvatavata mpo uhua mwia kyakyama mwateta mwianra qutaa mwivave tura. Mwitaa tuhua mwihua mwiva nronraqama kyovata mwihua Kotira nraaqiaraqama vita varura.

<sup>13</sup> Hia nraakyevanto nraaqiara mwataintema kyero mwihua mwata taihata Kotira nraaqiaraqama vita variara. Hia qumina vaisi kyakya hiraqa Kotira nraaqiaraqama vita variara. Nai Kotira kyakya hiraqa mwihua Kotira nraaqiaraqama vita variara.

### Iesusiva vaisi tuora

<sup>14</sup> Kotira quavanto vaisi tuero tirivata varirero tuminro. Mwiva tuminro mwaa mwataraqaa varuvata tire mwia peqa okyara taqaavanana. Tire taqaavararo mwi vaisiva kyuqe hiro vaisiara mpoqama kyero po kye timwa nyateqaro qutaa qua nraahu ti varuva varura.

<sup>15</sup> Ioniva nraakye qora timwa nyinro tiqaro, Nte haaru nkyi timwa nyina tiqana, Vaisi mpovanto ni naakiara nrianriva ni naataraananrove, tuva qio mwaa mwi vaisivave. Nte hia qovara hiava entara mwiva haaru qati variqiro vurave. Mwitaama variqarora tiro, mwi vaisiva ni naatara kyero mwiva nronravanto variho, tiro. Ioniva mwitaa tura.

<sup>16</sup> Iesusiva mpoqama kyero tiriara nraamwunruqa taiharo mwiva

tiriara po kye timwa timwatero airi nani tiri kyuqema timwate varira.

<sup>17</sup> Haaru Kotiva nai qua mwaanra nraakye qoravanto hia nteqa kyaraitita, qati nraahu riemwaqita quate tiro, Mosesira mwunra. Mate mwaa entara Iesusi Karaisiva Kotiva hinasairo tumu Kotiva po kye timwa timwatai okyarara, qutaa okyara tiri timwinra.

<sup>18</sup> Hia qumina vaisi mpovanto Kotira taqairave. Mwia mwaquivanto nai qora nraaqani variva, mwiva nraahu nai qora okyara qovarama kyaihata tire taqeta ntapihunanra.

### Ioniva hia nte mesaiaavantove tura (Matiu 3:1-12; Maaki 1:1-8; Ruku 3:1-18)

<sup>19</sup> Ioniva Iesusirara timwa nyu quava mwataamama vahiro. Ioniva nri ntovata Ituaa vaisi nronranramwuvanto Ierusaremini varuhua vaisi imponramwu sitovata Kotira nraamwuqi Kotira kyaiqa vara mwate varuhuavata, Rivaira kuua okyara imponramwuvantovata, mwihua uro nteta Ioninra kyapara hita tiqata, E ta vaisivave? (E qutaa tiri mesaiaavantove variaro?) tita.

<sup>20</sup> Mwihua mwitaa tuvaro Ioniva hia qua tuqetaraitiro, vutu kyero timwa nyinro tiqaro, Qaqao, hia nte Kotiva titai vaisiva mesaiaavanto varuqo, tiro.

<sup>21</sup> Tuvata mwihua mwia qaiqaa kyapara hita tiqata, E hia mwivave tiqara, e mpo tavave hiaro? E tiri haivaqava, Iraisaavave variaro? tita.

Tuvaro Ioniva qaqao, Nte hia mwivave, tiro. Tuvata mwihua qaiqaa mwia kyapara hita tiqata, E ta vaisivave? Tire poropeti vaisi mpo mwia vekyama varuro. E mwivave hiaro? tuvaro Ioniva qaqao nraahu tiro.

<sup>22</sup> Mwitaa tuvata mwihua tiqata, E tavave hiaro? Timwa timwinraqe tire nrumu ntanteta tiri titaa vaisihua iara uro timwa nyianre. E enanra tavaveve tira hiaro? tita.

<sup>23</sup> Mwihua mwitaa tuvaro Ioniva timwa nyinro tiqaro,  
 Nte qumina sata variqana aakyara ntene tiqana,  
 Aanra ntapihi taivaro nronravanto nrianrive,  
 ti varuvama varuquo, tiro.

(Ais 40:3)

Haaru poropeti vaisi Aisaiaava tu quara Ionivavata tura.

<sup>24</sup> Ioniva mwitaa tuvata Parisi vaisinramwuvanto sitohua tiqata, <sup>25</sup> E  
 tiriara nte hia mesaiaavanto varuquo qiaro. Hia nte Iraisaavave qiaro.  
 Hia nte poropeti mwivave qiaro. Qio nanraqamave qumina vaisi varuquo  
 qiarava nramanri nyi variaro? tita.

<sup>26</sup> Tuvaro Ioniva mwinramwuhua timwa nyinro tiqaro, Nte qumina  
 nramanri nraahuma nraakye qora nyi varuquo. Mpovanto nkyi utaqaa  
 varira nkye hia mwia taqaarave.

<sup>27</sup> Mwiva ni naakiara nrivave. Nte pata vaisi varuqaro mwiva nronra  
 vaisi varihananra tina, nte hiama qio mwiva kyuqu nraamwu rupa tai  
 kyaantara huvantu mwataaninrave, tura.

<sup>28</sup> Ioniva Mpetaani mwaata Iotaani nramanri qarahi hini variqaro  
 nramanri nyi varu entara mwi quara tura.

### **Ioniva Jesusirara Kotira sipisipi nraative tura**

<sup>29</sup> Mwia qanranraa Ioniva variqaro taqovaro Jesusiva mwisairo nri varuvaro  
 mwiva tiqaro, Qio taqaate. Mwiva Kotira sipisipi nraative. Mwiaqaama Kotiva  
 mwatanai varihua uaquia hi kyaiqara utira taiqa nyataananrove.

<sup>30</sup> Nte haaru tiqana, Vaisi mpovanto ni naakiara nrianriva ni  
 naataraananrove. Nte hia qovara hiava entara mwiva haaru qati variqiro  
 vuvave. Mwitaama variqarora tiro, mwiva ni naatara kyero nronravanto  
 variananrove, tu vaisiva, mwaa mwivave.

<sup>31</sup> Tauraa hia nte mwia ntapihi taqaarave. Nkye Isarerri nraakye  
 qoravanto mwia ntapihi kye taqaate tina, nte mwaini nrumu variqana  
 nramanri nkyi nyi varurave, tiro.

<sup>32</sup> Mwitaa timwa kyero Ioniva Jesusirara mwihua vutukye timwa  
 nyinro tiqaro, Nte taqauqaro Kotira mwanraquravanto minrunra voti  
 hiva hitamwaqiro tuminro tumu mwiaqaa varirave.

<sup>33</sup> Tauraa nte hia Jesusira ntapihi taqe varuqaro Kotiva ni titaihana nte nramanri  
 nkyi nyi varuqaro Kotiva ni timwa mpiri tiqaro, E taqairaro ni mwanraquravanto  
 quariva uto mwiaqaa variani vaisira qio mwianra mwivave qianta. Mwiva hia qati  
 nramanri nyiananrove. Mwiva nraakye qora ni mwanraqura nyianrivave, tirave.

<sup>34</sup> Kotiva ni mwi quara timwa mpihana nte mwi inraikyara kyuqema kyena taqena  
 nte mwianra mwaavama Kotira mwaaque tuquo, tiro.

### **Iesusiva vuniqama kyero erahiamuaantema vaisi sitora**

<sup>35</sup> Mwia qanranraa Ioniva nai nraaqiara taaratana mwia vataqita  
 nrohutanavata siviro varuvaro <sup>36</sup> Iesusiva nritarero vuvaro Ioniva mwia

vutu taqero, mwitana timwa nyinro tiqaro, Taqaate. Mwiva Kotira sipisipi nraative, tiro. <sup>37</sup>Mwitaa tuvata Ioninra vataqita nrohutana Ioniva tu quara rieta, mwiaqaatai tuqasaa vita Ioninra mwini kyeta Jesusira vataqita vura.

<sup>38</sup>Vuvaro Jesusiva tuqasaa viro taqvata mwitana mwia vataqita nruvaro mwiva tiqaro, Nkyetana naanrave nriavo? tuvata mwitanahua tiqata, *Rapai*. mwaanra ti variara vaisio, e taraqi variaravave? tuvaro

<sup>39</sup>Iesusiva tiqaro, Qio nrita taqaate, tiro. Mwitaa tuvata mwitanahua mwia vatama kyeta uro mwiva varuraqi varita. Mwitanahua Jesusira vatama kyeta variqi vita enrovata nrumu ntanteta vura.

<sup>40</sup>Mwitanahua Ioniva Jesusirara tu quara rieta Jesusira vataqi vuraqitairo mpo Enturuva, Saimoni Pitaara qatavanto varura.

<sup>41</sup>Mwitana Jesusira mwini kyetata Enturuva nai vakyaara puaama kyero mwia timwa mwinro tiqaro, Tiretana, Kotiva titai vaisira, mesaiaa mwia puaama kyauro, tiro. (*Mesaiaave, Karaisivave*, kuaa nrutuma vahiro.)

<sup>42</sup>Mwi vaisira puaama kyeta taqauro, timwa kyero Enturuva nai vakyaara vita varero Jesusiva hunani uro kyovaro Jesusiva mwia taqero tiqaro, E Ioninra mwaaku Saimonivave. Nte qaraakya nrutu nteqana iara Sipaasirave tirerave, tiro. *Sipaasirave, Pitaarave*, kuaa nrutuma vahiro. (Mwaa quaraqitai mwi nrutura tirerata *Orivate* tita.)

### **Iesusiva Piripikya Nataanierikya nyaanronra**

<sup>43</sup>Mwia qanranraa Jesusiva Karirini virerave timwa kyero, uro Piripira puaama kyero mwianra tiqaro, Ni naakiara nriante, tiro.

<sup>44</sup>Piripiva Vetasaitanyaavama variro. Enturukya Pitaakyavata kuaa mwatukya mwiqinaahua varura.

<sup>45</sup>Iesusiva Piripirara ni pataqira nriante tuvaro Piripiva Nataanierira puaama kyero mwia timwa mwinro tiqaro, Haaru tiri haivaqava Mosesiva mwaanra qua qara ntqaro mwi vaisirara timwatovata, poropeti vaisinramwuvata, mwi vaisiva nraakiara qovara hiananrove timwa kyeta qara ntumwato vaisira, qio mate mwi vaisirama taqauqo. Mwiva Jesusiva Iosepira mwaauqvanto Nasaretiqinaavave, tiro.

<sup>46</sup>Tuvaro Nataanieriva tiqaro, Qaqao, qiove kyuqe vaisivanto mwi mwatukyaraqitairo qovara hiananrove? tiro. Tuvaro Piripiva tiqaro, Enavanto nrumu taqaante, tiro.

<sup>47</sup>Mwitaa timwa kyero vuvaro Jesusiva taqvata mwitanahua nri varuvaro tiqaro, Taqaante. Qutaama mwi vaisiva Isareru vaisivanto variho. Hia mwi vaisiraqi unra qua vahivave, tiro.

<sup>48</sup>Mwitaa tuvaro Nataanieriva Jesusira kyapara hiro tiqaro, Nataama kyereave e ni okyara ntapihira hiaro? tuvaro Jesusiva tiqaro, Piripiva hia i uro nraanrai vakya e fiki okyarani variarana nte i taqaurave, tiro.

<sup>49</sup>Mwitaa tuvaro Nataanieriva tiqaro, Mwaanra ti variara vaisio, e Kotira mwaaquve. E Isareriqaa ntaqikyiravave, tiro.

<sup>50</sup>Mwitaa tuvaro Jesusiva tiqaro, E fiki okyarani variarana nte i taqaaurave, turaqaatairave nianra qutaa mwivave qiaro? Nraakiara nronra inraikya, mpo inraikya mpo inraikya mwia nraataraaninrama taqenanrave. <sup>51</sup>E qutaama taqairaro nyaamwuvanto qatua viraqe nte mwatani mwatatai nraaqiarava variarita niqaanra nyaamwunyaaahua vita tumita hi varivaqe varianinrave, tiro. Jesusiva mwitaa turama.

### Mwatukya mpo Kenaaqi nraakye ntumwunra

**2** <sup>1</sup>Taara enta nritarovata mwatukya mpo Kena, Karirini mwi mwatanaahua nraakye ntumwinrenra hura. <sup>2</sup>Mwitaa huvaro Jesusira nrovalata mwini varuvata mwi mwatanaahua Jesusiravata, mwia nraaqiaranramwuvata, nyaanrovata mwinramwuhuavata mwini vita.

<sup>3</sup>Mwinramwuhua uro variqata kyara nre varuvaro uainivanto taiqa vuvaro Jesusira nrova Jesusira timwa mwinro tiqaro, Uaini taiqama viho, tiro.

<sup>4</sup>Tuvaro Jesusiva qaqao tiro, Mwaa nraakyevao, i kyaiqa mpo kyaiqa vaharo ni kyaiqa mpo kyaiqama vaiho. Nte kyaiqa varaani entava hiama nri ntaiho, tiro.

<sup>5</sup>Mwitaa tuvaro Jesusira nrova mwi mwatanaahua kyaiqa vaisinramwu timwa nyinro tiqaro, Mwiva nanra quave nkyiara tirata mwiva qiarinte qiarinte hiate, tiro.

<sup>6</sup>Iutaavanto nkyiari mwaaanra qua rieqata mwitaa mwitaama kyeqata nkyiari mwamwanta hiqama kyora. Qio mwianra rieqaro nramanri taqu 6 nramwu nronra tave voti huva mwi nraamwunraqi vatovalo vahura. (Tave nronra kuua mwipi qioma nramanri taqu qataara 10 vanto quanano.)

<sup>7</sup>Vahuvaro Jesusiva kyaiqa vaisinramwu timwa nyinro tiqaro, Ekyaa mwi taqura qati nramanriqotaita piqa kyaate, tuvata qati nramanri kyaqaqita uro tave nronra mwinramwunra piqa kyovaro vaiqaara hura.

<sup>8</sup>Piqa kyovaro Jesusiva qaiqaa tiqaro, Qio mwipitai kyaqaqita uro kyaraqaa ntaqikyira mwivaro nreqanro taqaarive, tiro.

<sup>9</sup>Mwitaa tuvata mwipitai mwi nramanrinra kyaqaqita uro mwuvaro mwi vaisiva qati nramanrivanto uaini utu vura nreqanro taqovaro kyuqe huvaro mwiva hia qati nramanri kyaqora mwianra ntapihuvata kyaiqa vaisi mwinramwuhua nraahu mwianra ntapihura. Mwitaa huvaro kyaraqaa ntaqikyiva nreqanro taqovaro kyuqe uaini vahuvaro qamwata kyero nraakye varo vaisira nraanrama kyero <sup>10</sup>mwia timwa mwinro tiqaro, Qikye, mpo hiahua kyuqe uaini nraante nraakye qora nyiavata nramwa taiqa kyaavata nraakiara uaqia hi uaininra nyi variarave. E hia mwitaa hiaro. Nte taqauqara e mpo uaini vuni nyinra kyuqe uaini mwia nraakiarama nyinra hiaro, tiro. Mwitaa turama.

<sup>11</sup> Iesusiva Kenaa mwatukya Karirini variqaro qati nramanri vara kyero uaini utu kyero nyunra. Mwiva mwi kyaiqara nraante toharama tero mwiaqaatairo mpo kyaiqa mpo kyaiqa nronra kyaiqa varaqiro vura. Iesusiva mwi kyaiqara varovata mwia nraaqiaranramwuvanto mwia kyaiqa taqetama Iesusira kepukya okyarara ntapihita mwianra qio qutaa mwivave tura.

<sup>12</sup> Mwiaqaatai mwivavata, mwia nrovavata, mwia qatanramwuvata, mwia qua riohuavata, mwini kyeta vuhua Kapenaamini uro mpo entanramwu varura.

### Iesusiva Kotira nraamwu nronraqi vura

(Matiu 21:12-13; Maaki 11:15-17; Ruku 19:45-46)

<sup>13</sup> Vekyahu nyato kyarara nro entava qaumatoqa huvaro Iesusiva Ierusaremini vuva <sup>14</sup> uro Kotira nraamwu nronraqi vera ntero taqvata mpo uhua kyoqaa kyaiqa vare variqata munima vareqata purimakauve sipisipive nyaamwave nyi varuvata mpo vaisinramwu tainta nraaqani variqata kamaninra munima vareqata Kotira nraamwuqinaa munima nyi varura.

<sup>15</sup> Mwitaamaqita viqata kyoqaa kyaiqa vare varuvaro Iesusiva mwihua taqero kyapipi vara kyero mwiaqotairo purimakauvata, sipisipivata, sataqiro veva Kotira nraamwuqitairo mwaatani kyero munima tuqasaaqi varu vaisihua tainta tu varero vara rauru kyero mwi munimanravata rauru kyero, <sup>16</sup> nyaamwa nyiqata munima vare varu vaisihuara tiqaro, Nkye mwi inraikyara mwi inraikyara mwaaqitai vare quate. Nkye hia ni kora nraamwu maaketi nraamwuqama taate.

<sup>17</sup> Iesusiva mwitaa tuvaro mpo qua Kotira mpukuqi qara ntumwato quava mwia nraaqiaranramwu nyaatoqi ntumwa vuvata riora. Mwi quava mwitaama tiro:

Nte i nraamwuanra nronraqama kyena riemwaqi quariva qia  
itaintema kyero niqi ite vaiho, tura. (Sng 69:9)

Mwi quara mwitaama kyero qara ntumwa tora.

<sup>18</sup> Iesusiva mwitaa huvata Iutaa vaisi nronranramwuvanto tiqata, Qaqao, tava iara tiharave e mwitaa hiaro? E nanra nronra kyaiqa mpo tiri tivuqaa utiraqe tire mwia taqetave iara mwiva qio mwitaa hiananrove qiananrave? tita.

<sup>19</sup> Mwihua mwitaa tuvaro Iesusiva tiqaro, Nkye mwaa nraamwunra ntapairi kyaivaqe nte taarampo entara qaiqaa hoqa kyaaninrave, tiro.

<sup>20</sup> Mwitaa tuvata Iutaa vaisi nronranramwuvanto tiqata, Qaqao, mwaa nraamwunra hoqeqlata 46 ihi airi ihi hoqaqi vita uro hoqa taiqa kyaarave. Qiove e taarampo entara nraahu mwi nraamwunra hoqa taiqa kyeananrave? tita.

<sup>21</sup> Mwitaa tuvaro Iesusiva hia vutu kyero qati nraamwuanra tiraitiro, mwiva nai mwamwantaqaa ntumwa kyero tiro. (Nkye ni rukyaivaqe nte taarampo enta vari kyena qati siquaninrave, tiro.)

<sup>22</sup> Iesusiva mwi quaraqaa ntumwa kyero tuvata nraakiara Iesusiva qati sivi varu entaraqaa mwia nraaqiaranramwuvanto variqata Iesusiva nraamwuanra tu quava mwihua nyaatoqi ntumwa vura. Kotira mpukuqi qara ntumwato quaravata rieqata, Iesusiva mwi entara tu quaravata rieqata mwihua Iesusirara qutaave tura.

### Iesusiva ekyaa vaisi ntapihi kyaira

<sup>23</sup> Vekyahu nyato kyarara nro entaraqaa Iesusiva Ierusaremini varuvata nraakyne qora airivanto mwia kyaiqa nronra kyaiqa taqeqlata Iesusirara qio quataa mwivave tita. <sup>24</sup> Nraakyne qoravanto mwianra qamwateqlata mwitaa ti varuvaro Iesusiva nraakyne qora okyarara ntapihi kyero rieqarora tiro, mwiva hia mwihua turara qutaave tura. <sup>25</sup> Iesusiva nai vaakya nraakyne qora su nyaatoqi vahu inraikyara ntapihi kyorara tiro, hia qumina mpovanto mwihua okyarara mwia timwa mwianriva varura.

### Nikotimaasiva Iesusira uro taqora

**3** <sup>1</sup> Parisi vaisi mpovanto mwia nrutu Nikotimaasiva varura. Mwiva lutaan vunyaa vaisi mpovanto varura. <sup>2</sup> Mpo enta mwiva entaqi uro Iesusira taqero tiqaro, Mwaanra ti variarao, tire taqauraro Kotiva i titaiharara tira, e mwaanra qua ti variaravama nrinra hiaro. Hia Kotiva i kyaahaqa hiankye titiri, e hiama qio nronra kyaiqa varaaratirio, tiro.

<sup>3</sup> Mwiva mwitaa tuvaro Iesusiva mwia timwa mwinro tiqaro, Nte quataa qua qianinra riaante. Vaisi nronra tuemwa quaninra hia qaiqaa mwata tairaro mwiva hiama qio Kotiva ntakikyi mwatukyara taqaananrove, tiro.

<sup>4</sup> Tuvaro Nikotimaasiva kyapara hiro tiqaro, Nataama kyeroove nronra tuemwa quani vaisira qaiqaa mwata kyaananrove? Qiove mwiva nai nronra vikyokyayi qaiqaa viqe tairaro mwia nrova qaiqaa mwata kyaananrove? tiro.

<sup>5</sup> Mwitaa tuvaro Iesusiva nai timwa mwinro tiqaro, Nte quataama tuqo. Nramanrivata mwata taariva variraro hia Kotira mwanraquravanto mwia qaiqaa mwata kyairaro mwiva hiama qio Kotiva ntakikyi mwatukyaraqi quananrove. <sup>6</sup> Mwamwanta vataava nai mwamwanta vahira nraahu mwataairave. Mwanraquravanto nai mwanraqura nraahu mwataairave.

<sup>7</sup> Nte nkyi qaiqaa qaraakyaqama kyero mwata kyaarive tu quarara hia e mwi quarara nrihanrama quante. <sup>8</sup> Nte mpo quaqaa ntumwa kyena i timwa mwinrenrave. Toqavanto tiqaro nai quataa hiraqa virave. Toqavanto nrihanra e hia mwia taqaraitira, e mwia nruqua nraahu riaananrave. E mwiva viro nrinro hi okyarara hia ntapihananrave. Qio Kotira mwanraquravanto mwatai okyarava kuaa qarama kyerooma vaiho, tiro.

<sup>9</sup> Iesusiva mwitaa tuvaro Nikotimaasiva mwia kyapara hiro tiqaro, Nataama kyeroove mwitaa hiananrove? tuvaro <sup>10</sup> Iesusiva tiqaro, E Isarer

nraakye qora mwaanra timwa nyi variarava e hiave ntapihiaro? <sup>11</sup>Nte qutaama tuqo. Tire ntapihi kyeta rie taqe hunanra nkyi timwa nyi varurata nkye hia tiri qua riaarave.

<sup>12</sup>Nte mwatanyaa inraikyara nkyi timwa nyuqata nkye mwianra hia ntapihita qutaave qiarave. Nkye mwitaa hiavana nte nyaamwunyaa inraikyara qiarita nataama kyetave nkye mwi quara qio ntapihi rievarave? <sup>13</sup>Hia vaisi mpovanto Kotiva varira nyaamwuni virave. Nte mwatani mwatatai nraaqiarava nte nraahu nyaamwuni variavava mwisaina tumunrave.

<sup>14</sup>Haaru nkyi haivaqava Mosesiva qumina mwataqaa variqaro ori vara kyero qarura utu kyero mwia kyatariqaa rupa kyero tuaahera kyorave. (Nraakye qoravanto mwia taqeta hia qutu quate tiro, Mosesiva mwitaa hurave.

(Nam 21:6-9)

) Qio nte mwatani mwatatai nraaqiarava variarita haaru Mosesiva qarura utu kyero tuaahera kyontema kyeta nivata kyatariqaa vateta tuaahera kyevarave.

<sup>15</sup>Mwitaa hirata nraakye qora nianra qutaa mwivave tihua hia qutu viraitita, ekyaa enta ekyaa enta qati variqi vivarave, tiro. Iesusiva turama.

<sup>16</sup>Kotiva mwatani variahua mpoqama kyero mwutukya ntiharora tiro, mwiva nai mwaaku kuaiqia vataira tiri timwinra. Mwitaa hirara tita, nraakye qoravanto mwia mwaakuara qutaa mwivave tihua hia qutu viraitita, mwihua ekyaa enta ekyaa enta qati variqi vivara. <sup>17</sup>Kotiva hia nai mwaaku ko riaa vaisihua votima kyero variqaro nraakye qora tukya hiarive tiro mwatani titaiharo tuminrave. Mwiva nraakye qora sitaarive tiro, Kotiva mwia titaiharo tuminrave.

<sup>18</sup>Mpowanto mwia mwaakuara qutaa mwivave qiariva, mwiva hiama qua varaanano. Mpovanto hia mwia mwaakuara qutaa mwivave qiariva, mwiva vaakyama qua varero. Mwiva Kotira mwaaku kuaiqiera hia qutaa mwivave tira kyaarama, Kotiva mwianra qutaa iqaa qua vaiho timwa kyero, mwiaqaa qua vatero.

<sup>19</sup>Mwaa inraikyara kyaara qua vahiananro. Omwavanto mwatani tumihata nraakye qoravanto hia mwia qamwata mwataraitita, mwihua kyokira rirara nraahu qamwateqata variara. Mwihua kyaiqvanto qora kyaiqa vaihatara tita, mwihua hia mwi omwanra qamwata mwateta.

<sup>20</sup>Qora kyaiqa uti variva nramwutaqaq hiqaroma hia omwavanto varinani viro. Omwavanto iteqaro ni uaqia hi kyaiqara qovarama kyaankyo tiro, hia omwavanto varinani viro. <sup>21</sup>Mwiva mwitaama variharo qutaa kyaiqa vare vari vaisiva hia aatu hiraitiro, omwavanto varinani viro. Mwiva viharo omwavanto itero mwia kyaiqa qovarama kyaihata nraakye qora taqaavarso mwi vaisiva Kotira qua rieqaro Kotira kyaiqa vare varira.

**Nramanri nyi varuva Ioniva ekyara qua Iesusirara timwa nyunra**

<sup>22</sup> Mwiaqaataita Iesusivavata mwia nraaqiaranramwuvata (Ierusaremi kyeta) Iutaa mwata mpo qumina mwatani vura. Iesusiva nai nraaqiaranramwu kyapata variqaro nraakye qora nramanri nyunra.

<sup>23</sup> Nyuvaro Ionivavata mwatukya mpo Serimi tataaqa Ainonini variqaro nramanri nyi varura. Ioniva nramanri nronra vahunani variqaro nraakye qora mwini ntuvantuama vuhua nramanri nyunra. <sup>24</sup> Mwi entara hia Ioninra karavuqi vitaqita uro kyo entara varura.

<sup>25</sup> Mwi entara Iutaa vaisi mpovanto Ioninra qua riohua kyapata nramanri vare okyarara inronra huvata mwihua Ioniva hunani uro nteta tiqata, <sup>26</sup> Mwaanra ti variarao, tauraa e Iotaani qarahi vutura hini vaisi mpovata variqarama e mwianra mwivave tunanrave. Qio taqaante. Mwi vaisiva mwivavata nramanri nyi varihata airivanto mwiva hinani vi variavo, tita.

<sup>27</sup> Mwitaa tuvaro Ioniva tiqaro, Qio Kotiva nyaamwuni variva vaisi mpo hia mpo inraikya mwinrenra, mwi vaisiva hiama mwi inraikyara varaananrove. <sup>28</sup> Nkyevata vuni nte tura riaarave. Nte tiqana, Hiama nte nkyi kyaahaqa hiariva varuqo. Ni titaihana nte nraante mwia vuni nruvave, turave.

<sup>29</sup> Nraakye vararer hi vaisiva nraakye varairave. Mwi vaisira totivanto qati sivi variqaro mwia qua rieqaro qamwata kyero varirave. Qio mwia totivanto qamwataintema kyena nte Iesusirara qamwatauqo. <sup>30</sup> Iesusira nrutu virini nriviraro ni nutu mwatani tumi quarive. (Airivanto mwia vataqita vivarave. Hiama ni pataqita vivarave. Mwihua Iesusira vataqita virara hiama nte Iesusira kyaru ntumwa mwataaninrave. Nte mwia qamwata mwataaninrave), tiro. Ioniva turama.

**Iesusiva nyaamwusairo tuminranra tura**

<sup>31</sup> Iesusiva virisairo tumivara tiro, ekyahua nraatara kyaivama variro. Mwatanyaava mwatasairo nrivara tiro, mwiva mwatanyaaa inraikyara nraahu ti varira. Iesusiva nyaamwusairo tumivara tiro, ekyahua nraatara kyaivama variro. <sup>32</sup> Mwiva nai taqero riero hi inraikyara qoqaa timwa nyi varihata nraakye qoravanto mwia quara hia qutaave tiraitita, mwia qua qoririma mwate variara.

<sup>33</sup> Qio vaisi mpovanto hia Iesusira qua qoririma mwataraitiro, mwia quara qutaave ti vari vaisiva, mwiva mwitaa tiqaroma Kotira quaravata quataa qua vaiho tiro.

<sup>34</sup> Kotiva Iesusira titaiharo mwiva Kotira qua nraahu ti varira. Kotiva mwia titarerera hiro hia nai mwanraqura pataqia pataqia mwinraitiro, mwia nronraqama kyero mwihanronra tiro, qio Kotira qua nraahu ti varira. <sup>35</sup> Mwia qova nai mwaqaquara mpogama kyero mwutukya ntihar

ekyaa inraikya nai mwaaqu mwihanro mwiva mwi inraikyaraqaa ntaqikyiqiro vi variro.

<sup>36</sup> Mpowanto mwia mwaaquara quitaave qiariva hia ekyara qutu viraitiro, mwiva qati variqiro quananro. Mpowanto hia mwia quara quitaave qiariva variraro Kotira raraqa tairaro mwia inronra hiraro quavanto mwiaqaa vahiananro.

### Iesusiva Sameriaa nraakyevata qua tura

**4** <sup>1</sup> Mwi entara Parisi vaisinramwuvanto riovaro Iesusiva airi nraakye qora nai hunani sita kyero vateqaro mwihua nramanri nyiqanroma Ioninra nraatara kyora. <sup>2</sup> Iesusiva hia naivanto mwihua nramanri nyunra. Mwia nraaqiaranramwuvanto nraakye qora nramanri nyunra. <sup>3</sup> Parisi vaisinramwuvanto mwi quara riovarora tiro, Iesusiva mwiaqatairo Iutia mwini kyero Karirini viro.

<sup>4</sup> Karirini virero mwiva Sameriaa mwata utaqaama tero quariva vahura. <sup>5</sup> Mwiva viqaroma mwatukya pata mpo mwia nrutu Saikaa mwini uro ntora. Mwata mpo haaru Iaikopuva nai mwaaqu Iosepira mwu mwataro mwia tataqa vahura. <sup>6</sup> Iaikopuva haaru nramanrianra quvutova mwini vahuvaro Iesusiva nyianra aanra nri kyovaro pupohovaro mwiva nramanrianra quvutora tataqa mwatakyaa viro varura. Varuvaro huarivanto nrinro virira qitataqaa vahuvaro

<sup>7</sup> Sameriaa nraakye mpovanto nramanri kyaqarero nruvaro Iesusira nramanri nraataa huvaro mwi nraakyerara tiqaro, Nramanri kyaqa kyera ni mpiraqe nraankye, tiro.

<sup>8</sup> Iesusira nraaqiaranramwu vaakya kyara vararerata mwatukyani vuvaro <sup>9</sup> Iesusiva mwiaqaa variqaro mwitaa tuvaro Sameriaa nraakye mwiva qaqao tiro, E Iutaavanto variarana nte Sameriaavanto varuquo. Nataamaqirave nianra nramanri kyaqa mpiraqe nraankye tira hiaro? tiro. Iutaavantovata Sameriaavantovata nai nununrama mwate nai nununrama mwate hi varuhuara tiro, mwi nraakyeva mwitaa tura.

<sup>10</sup> Mwitaa tuvaro Iesusiva nai timwa mwinro tiqaro, E Kotiva qati nyiani inraikyaraara e riera ni okyararavata ntapihiaratio, e ni kyapara hiarana nte qati variqi vi nramanrinra i mwutirio, tiro. (Mwi mwatanaahua nrumwuqinaa nramanrianra tiqata, Qati variqi vi nramanrinrave), tura.

<sup>11</sup> Iesusiva nte qati variqi vi nramanrinra i mwinrenrave tuvaro mwi nraakyeva hia ntapihi kyero riaraitiro, mwiva rumwu nramanrianra tiho tiro. Mwiva tiqaro, Nronrao, nramanrivanto vevato vahara e hiama nramanri taqu vatera hiaro. Taraqitairave qati variqi vi nramanrinra kyaqenanrave?

<sup>12</sup> Tiri haivaqava Iaikopuva nronra vaisivanto varurave. E mpo? E mwia nraatara kyaaravave iho? Mwiva nramanri varaaninra mwata quvu kyero

naivata nai nraaqiaravata nai quaravatama kyero mwaa nramanrinra kyaqa kyero nronrave, tiro.

<sup>13</sup> Mwitaa tuvaro Jesusiva tiqaro, Mpowanto mwaa nramanrinra nrainranro qaiqaa nraahu nraataa hiraro nrumu nreqanro variananrove.

<sup>14</sup> Nte mwiani nramanrinra mpovanto nrainranro mwia hiama qaiqaavata nraataa hiananrove. Nte nramanri mwianrinro mwi nramanriva vaisi utaqitairo rumwuqitairo tumi nramanrinra votima kyero vi variraro mwi vaisiva hia qutu viraitiro, qati nraahu variqiro quananrove, tiro.

<sup>15</sup> Mwitaa tuvaro mwi nraakyeva tiqaro, Nronrao, qio mwi nramanrinra ni mpirae nte nraanrinro hia qaiqaa ni nraataa hiraqe qaiqaavata nrumu mwaaqitaina kyaqa kyeqana nraankye, tiro.

<sup>16</sup> Mwitaa tuvaro Jesusiva tiqaro, Qio, uro ena vaativata nraanrama kye vita varera uro ntantera mwaini nriante, tiro.

<sup>17</sup> Tuvaro mwi nraakyeva tiqaro, Qaqao, hia ni paati varivave, tiro. Tuvaro Jesusiva tiqaro, E qutaama tiqara hia ni paati variho qiaro. <sup>18</sup> E kyauquru nani vaati varaaravave. Mate e vaisi mpovata variarava, mwiva hia qutaa i vaativanto variho. E qutaama tira hiaro, tiro.

<sup>19</sup> Mwitaa tuvaro nraakyeva mwiva tiqaro, Nronrao, nte taqauqara e poropeti vaisima varira hiaro. Kotiva i kyaahaqa iharama e mwitaa tira hiaro. <sup>20</sup> Qio Sameriaa tiri haivaqahua Kotira nrutu tuaaherererata mwaa taaqiraqaa variqata Kotirara aakyara nte varurave. Mwitaa turata nkye Iutaavanto tiriara tiqata, Qaqao nkye Ierusaremini nraahu variqata Kotira nrutu tuaaheraataarave, qiarave. Nkye tiriara mwitaa ti variarave, tiro.

<sup>21</sup> Mwitaa tuvaro Jesusiva tiqaro, Ni quara e qutaave qianta. Mpo enta nri ntairata nkye mwi entaraqaa ni kora nrutu tuaahererera hiqata, hiama mwaa taaqiraqaa variqata aakyara ntevarave. Hiama Ierusaremini variqata Kotirara aakyara ntevarave.

<sup>22</sup> Nkye Sameriaavanto hia Kotira okyarara ntapihiraitita, apiqama kyeqata aakyara nte variarave. Tiri Iuttaaqitairo nraakyeva qora huvantu nyataariva qovara hianinranra tita, tire ntapihi kye Kotira okyarara rieqata mwia nrutu tuaahereqata mwianra aakyara nte varunanrave.

<sup>23</sup> Mpo enta nrianriva qaumaqa iho. Mwi entava mate qovarama viho. Mwi entaraqaa Kotira mwanraquravanto nraakyeva qora kyaahaqa hirata mwihua ntapihi kye Kotira okyarara rieqatama mwihua qutaaqama kyeta Kotira nrutu tuaaherevarave. Mwitaama kye Kotira nrutu tuaaherehuara Kotiva puua hi variho.

<sup>24</sup> Kotiva mwanraquravanto varirave. Mwitaama varirara tita, mwia mwanraquravanto kyaahaqa hi nraakyeva qorhua mwihua nraahuma Kotira okyara ntapihita qutaaqama kyeta Kotira nrutu tuaaherevarave, tiro.

<sup>25</sup>Mwitaa tuvaro nraakyе mwiva tiqaro, Kotiva titaaninra, mesaiaa mwianra nte ntapihi kyauqо. Nraakiara mpo enta mwi vaisiva nri ntero ekyaa inraikyara tiri timwa timwiananrove, tiro.

<sup>26</sup>Mwitaa tuvaro Iesusiva mwianra tiqaro, Qio ivata qua ti varuva nte mwaa mwivave, tiro.

<sup>27</sup>Iesusiva mwitaa ti varuqiaraqi Jesusira nraaqiaranramwuvanto uro ntanteta nrumeru taqovaro Iesusiva Sameriaa nraakyevata qua ti varuvata mwihua nrihanrama vita. Mwihua nrihanrama vitavata hia mwi nraakyerara tiqata, Nanra inraikyarave mwiavata qua ti variaro? tiraitita, hia Iesusraravata tiqata, Nanra inraikyarave nraakyе mwiavata qua ti variaro? tura.

<sup>28</sup>Tirema varuvaro nraakyе mwiva nai nramanri taqu mwini kyero siviro nrumeru ntantero mwatukyaqi nraakyе qora uro timwa nyinrenro vuva uro ntero tiqaro, <sup>29</sup>Nkye vaisi mpo nrira taqaate. Mwiva nte utu inraikyara ekyaa ni timwa mpiho. Qutaa mwiva Kotiva titarera hiva, mwivave iho? tiro. <sup>30</sup>Mwitaa tuvata mwihua mwatukya mwia kyeta Iesusiva varunananra vura.

<sup>31</sup>Mwi nraakyeva uvata Iesusira nraaqiaranramwuvanto Iesusrara tiqata, Mwaanra ti variarao, qati kyara mwaa vara kyera nraante, tuvaro <sup>32</sup>mwiva mwihuara tiqaro, Nte kyara nraaninra vatauqо. Nkye mwi kyarara hiama ntapihi kyaavo, tuvata <sup>33</sup>mwia nraaqiaranramwu nai timwa mwi nai timwa mwi hita tiqata, Vaakya mpovanto kyara mwihanro nrenrove mwitaa taho? tuvaro <sup>34</sup>Iesusiva mwinramwuhua timwa nyinro tiqaro, Ni titaira mwutukya vahi kyaiqara vareqana mwiva kyaiqa mpitairavata varaqina uro taiqa kyaariva qio mwi kyaiqava ni kyarama iho, tiro.

<sup>35</sup>Iesusiva mwitaa timwa kyero tiqaro, Nkye mpo quaqaa ntumwa kye tiqata qiarave. Tora taaratana taaratana vara kyaariro kyara peqaqama virage vantuaninrave, qiarave. Qio kyara vara tutaaraqi aitutu hiqata taqaate. Mate kyaravanto naitarama viho. Nkye qiomaa vantivarave.

<sup>36</sup>Kyara vantiva nai kyaiqa varairara kyoqaa varairave. Mwiva kyara vantu tairaro mwi kyarava ekyaa enta ekyaa enta qati vahiqiro quananrove. Mwitaa hirata kyara vara tuarivavata, kyara vantuarivavata, mwitanahuaqama qamwateqata varivarave.

<sup>37</sup>Mpo quavata qiaava qutaa quama vaiho. Vaisi mpovanto kyara vara tutaira mpovanto mwi kyarara vantirave. <sup>38</sup>Nte nkyi sitena tiqana, Mpovanto kyaiqa vareqaro vara tutai kyarara uro vantuate, tuqо. Mpo hiahua toqaamwu tukyeta kyaiqa vara kyeta kyara vara tutaara, nkye mwihua kyara vantivarave, tiro.

### Sameriaa airivanto Iesusrara qutaave tura

<sup>39</sup>Iesusiva mwitaa ti varuvaro mwi nraakyeva uro nai nramwunaahuara tiqaro, Mwiva nte utu inraikyara ekyaa timwa mpiho,

tuvata Sameriaa nraakyе qora mwi mwatukyaraqinaahua airivanto Iesusirara qio quataa mwivave, tita. <sup>40</sup>Mwitaa timwa kyeta Sameriaa qinaahua Jesusiva varunani nri nteta Iesusirara po tita tiqata, Qio hia qamwanrama quante. E tirivata vari kyera quante, tuvaro Jesusiva mwihuavata taara enta vaitero vurama.

<sup>41</sup>Kyaatavanto nraahu Jesusira qua rieqata qio quataa mwivave tita. <sup>42</sup>Mwihua mwi nraakyerara tiqata, Hia vaakya e qiananraqaataitavauma tire mwianra quataa mwivave, turo. Mate tetavanto nai nroqitaita rietama mwianra quataa mwivave turo. Tire taqauraro Kotiva mwia titaiharo mwiva tiri mwaa mwataraqaa varurahua kyaahaqama timwa tero huvantu timwa taarivama variho, tita. Mwitaa turama.

### **Iesusiva nronra vaisi mpo nraaqiara kyaahaqama kyora**

<sup>43</sup>Iesusiva mwini taara enta vaitero mwiaqaatairo nai mwaata Karirini viro. <sup>44</sup>Iesusiva nai tiqaro, Poropeti vaisivanto nai mwaatani variharo mwia nrutuvanto hia virito vahirave, tura.

<sup>45</sup>Iesusiva Karirini vuvata mwi mwatanaahua mwianra qamwateqata varura. Mwi mwatanaahuavata vekyahu nyato kyarara nro entara Ierusaremini uro variqata Iesusiva nronra kyaiqa varovata taqorara tita, mwihua mwianra qamwatora.

<sup>46</sup>Mwia qamwata mwatovaro Iesusiva qaiqaa Kenaani tauraa mwini variqaro qati nramanri vara kyero uaini nramanriqama kyonani nrunra. Nruvaro kamaninra kyaiqa vaisi mpovanto varuvaro mwia mwaqvanto nronraqama kyero nriqa vuvaro Kapenaamini varura. <sup>47</sup>Iesusiva Iutiasairo Karirini nriho tuvaro riero, mwi vaisiva Iesusiva varunani uro ntero tiqaro, Qiove e nrinra ni maaqu nriqa vira kyaahaqama kyairaro qati variananrove, tiro. Mwi vaisira nraaqiaravanto qutu quariva qaumaqa huvaro mwiva mwitaa tuvaro <sup>48</sup>Iesusiva mwianra tiqaro, Nkye hia nronra kyaiqa kyuqe hira taqaraitita, hiama nkye quataave tivarave, tiro.

<sup>49</sup>Tuvaro nronra vaisi mwiva tiqaro, Nronrao, ni maaqvanto qutu quankyorave. Qamwanrama nriante, tuvaro <sup>50</sup>Iesusiva tiqaro, Qio ena mwaatani quante. I mwaqvanto qati variananrove, tiro. Mwitaa tuvaro mwi vaisiva Iesusiva qua timwa mwunranra quataa quave timwa kyero, nai mwaatani viro.

<sup>51</sup>Mwi vaisiva aanrani vi varuvata mwia kyaiqa vaisinramwuvanto uro huntu kyeta mwia timwa mwita tiqata, I nraaqiaravanto kyuqema viho, tita.

<sup>52</sup>Tuvaro mwiva mwinramwuhua kyapara hiro tiqaro, Nanra huari vuqaave mwia nriqa viva taiqa viharo mwiva kyuqema viho? tuvata mwihua tiqata, Enta huari vu vitini tumi viro 1 kirokiqa iharo mwia nriqa viva taiqa virave, tura.

<sup>53</sup> Mwitaa tuvaro mwia qova ntapihi kyovaro huari vu mwiqiaraqaa Iesusiva mwia timwa mwinro tiqaro, I mwaaqavanto qioma variananrove, tura. Mwitaa turara tiro, mwi vaisivavata mwia nramwunaahuavata Iesusirara qutaa mwivave turama.

<sup>54</sup> Iesusiva Iutiasairo nrumu Karirini variqaro mwi kyaiqara varova tauraa varova kuaiqia vahuraqa mwiva viro taaraqiaqa hura.

### Iesusiva mwaanraqaa vaisi mpo kyaahaqama kyora

**5** <sup>1</sup> Mwiaqaatairo Iutaavanto omwata nro entava mpo nri ntovaro Iesusiva Ierusaremini viro.

<sup>2</sup> Ierusaremini vasaamwunra qesa mpo sipisipi qesa vahura. Mwia tataaqa nramanri rumpua mwia nrutu Vetasaitaave tuva vahura. Nramanri tokyasataa haraara nraamwu kyauquru vahuvata <sup>3</sup> haraara mwiqi nriqa vuhua airinti varura. Vu qipa vuhuave, kyuqu uaqlama vuhuave, kyuqu kyauqu tapanra vuhuave, mwihua variqata nramanrivanto qakyaa hianinra mwia veckya varura. <sup>4</sup> [Kuaa enta kuaa enta nyaamwunyaava mpovanto tumu nramanri qakyaa huvaro mwihuaqitairo mpovanto nraante nramanriqi vuvaro mwia nanra mwamwantave nriqa vuva kyuqema vura.]

<sup>5</sup> Qio mwihua nramanri qakyaa hianinra veckya varuvaro vaisi mpovanto airi ihi 38 ihiara nriqa vuvaro varuvavata mwiqi variro.

<sup>6</sup> Varuvaro Iesusiva mwia taqero ntapihi kyovaro mwi vaisiva airi ihi nriqa vuvaro varura mwia kyapara hiro tiqaro, I nriqa quariva taiqa quarive tira, e mwianra qamwaterave hiaro? tiro.

<sup>7</sup> Mwitaa tuvaro nriqa vu vaisiva tiqaro, Nronrao, nramanrivanto qakyaa iharo mpovanto ni kyaahaqamaqiro uto nramanriqi kyaariva hia varihana nte nraante virera huqata mpohua nraante quavo. Mwitaamaqi vi variqana varuqo, tiro.

<sup>8</sup> Nriqa vu vaisiva mwitaa tuvaro Iesusiva mwia timwa mwinro tiqaro, Sivira ena taarivata tu varera nrohiante, tuvaro qamwanrama mwia mwamwantavanto kyuqema vuvaro <sup>9</sup>mwi vaisiva siviro nai taarivata tu varero qio nrohura. Mwi entara mwaanraqaa mwitaama kyora. <sup>10</sup> Mwaanraqaa mwitaama kyorara tita, mwia kyaara Iutaa vaisi nronranramwuvanto vaisi kyuqema vura mwia inronra hita tiqata, Mate mwaanraqaave. Ena taari tu vare vinanranra tiri mwaanra quavanto qao tirave, tita.

<sup>11</sup> Tuvaro mwi vaisiva tiqaro, Qaqao, vaisi mpovanto ni kyuqema kyaiva nianra ena taari tu varera nrohiante tihanama nte mwitaa huqo, tiro.

<sup>12</sup> Tuvata Iutaa vaisi nronranramwuvanto tiqata, Ta vaisivave iara sivira ena taari tu varera nrohiante tiho? <sup>13</sup> tuvaro mwia mwamwantavanto kyuqema vu vaisiva hia mwia nrutu ntaphura. Mwini nraakye qora

airivanto varuvaro Iesusiva qamwanrama vi vuvaro mwi vaisiva hia Iesusira nrutu ntapihura.

<sup>14</sup>Mwia nrutu hia ntapihiraitiro varuvaro Iesusiva nraakiara variqaro taqovaro mwi vaisiva nraamwu nronra Kotira nraamwuqi varuvaro Iesusiva mwia timwa mwinro tiqaro, Qio taqaante, i mwamwantavanto kyuqema viho. Mpo inraikyavanto mwia nraataraariva i ru kyaankyo tira, hiama qaiqaa uaquia hi kyaiqara utuqira quante, tiro.

<sup>15</sup>Mwitaa tuvaro mwi vaisiva mwiqitairo veva ntero uro Iutaa vaisi nronranramwu timwa nyinro tiqaro, Mwia nrutu Iesusiva mwivama ni mamanta kyuqema kyaiho, tiro. <sup>16</sup>Tuvata mwihua riovoro Iesusiva mwaanraqaas mwia kyuqema kyorara tita, mwihua mwia kyaara mwi entaraqaataita Iesusira qoraqama mwate varura.

<sup>17</sup>Mwitaa huvaro Iesusiva mwihua timwa nyinro tiqaro, Ni kova ekyaa enta kyaiqa vare varihanama ntevata kyaiqa vare varuqo, tiro.

<sup>18</sup>Tuvata mwi quara kyaara Iutaa vaisi nronranramwuvanto mpoqama kyeta Iesusira ru kyarerata uti varita tiqata, Tauraa Iesusiva tire mwaanra entara tuna quara nteqa kyaiho. Mwia nraakiara mwiva Kotirara ni korave tiho. Mwiva qumina vaisivanto variqaro mwiva Kotira votima kyero Kotikyantiri kuaaqaa varirero uti variho, tita.

### Ni kova varai kyaiqarama ntevata varauqo tura

<sup>19</sup>Iutaa vaisinramwuvanto mwitaa tuvaro Iesusiva mwihua timwa nyinro tiqaro, Nte qutaa qua qianinra riaate. Nte mwia mwaqvavanto variqana hiama ntena nraato tukyena mwi inraikyara varaaninrave. Ni kova kyaiqa varaihana nte taqaura mwi kyaiqara nraahuma vare varuqo. Ni kova mwitaa mwitaa ihana nte mwia mwaqvavantovata mwitaa mwitaa hi varuqo.

<sup>20</sup>Ni kora mwutukyavanto ni nai mwaquara vaharora tiro, mwiva nai vare vari kyaiqara ekyaa kyaiqa ni naamutaiho. Nraakiara ni kova naamutairaqe nte mwaa kyaiqara nraatara kyaani kyaiqarama varaaninrave. Nte mwi kyaiqara mwi kyaiqara varaarita nkye mwia taqetama mpoqama kyeta nrihanrama vivarave.

<sup>21</sup>Ni kova qutu quhua qaiqaa vara sivuma kye varivave. Ni kova mwitaa hintema kyena nte mwia mwaqvavantovata variqana ni mutukya vahiani nraakye qorahua qati vara sivuma kyaarita mwihua qati variqita vivarave.

<sup>22</sup>Ni kova nai hiama nraakye qora ko qiananrove. Mwiva mwi kyaiqara ni mpitaihana nte mwia mwaqvavanto variqana qio ko qianinrave.

<sup>23</sup>Mwiaqataita nraakye qoravanto ni kora nrutu tuaaheraantema kyeta mwihua ni mwia mwaqu nrutuvata tuaaherevarave. Mpowanto hia ni mwia mwaqu nrutu tuaaheraariva hiama ni kova ni titaira nrutuvata tuaaheraananrove.

<sup>24</sup>Nte qutaa qua qianinra riaate. Mpovanto ni qua riero qutaama Kotiva mwia titaivave qiariva, mwivama ekyaa enta ekyaa enta qati variqiro quananrove. Mwi vaisiva hiama qua varaananrove. Mwiva mwaa entara hia ekyara qutu viraitiro, mwiva ekyaa enta qati variqiro quarivama variho.

<sup>25</sup>Nte qutaa qua qianinra riaate. Mpo enta nrianriva qaumaqa iho. Mwi entaraqaa qutu virera utihua, mwihua Kotira mwaaqu ni qua rievarave. Ni qua riehua qiomia qati variqita vivarave.

<sup>26</sup>Qati variqita qua okyarava ni koraqi vaharo ni kova nai mwaaqu ni nronraqama kyaiharo mwiaqi vahintema kyero qati variqita qua okyarava niqvata vaiho. <sup>27</sup>Ni mwatani mwatatai nraaqiarara tiro, ni kova ni nronraqama kyaihana nte mwatani vari nraakye qorahua qio ko qianinrave.

<sup>28</sup>Nkye hia nte qua qianinranra nrihanrama quate. Mpo enta nri ntairaqe nte mwihua nyaanraanrita mwataqi quntamwa te nraakye qorahua ni qua rieta, <sup>29</sup>mwihua quntamwa teraqitaita sivarave. Hini hihua kyuqe kyaiqa varehua sivita qati variqita vivarave. Hini hihua uaquia hi kyaiqara utihua sivita nronra quama varevarave.

### Vaisi mpo uhuvata Iesusira okyarara tura

<sup>30</sup>Nte variqana hiama ntena nraato tukyena mpo inraikya varaaninrave. Kotiva timwa mpi varihana mwia qua rieqanama nte nraakye qora qio ko qianinrave. Hiama nte ntena mwutukya nti kyaiqara vare varuqo. Nte ni kora mwutukya nti kyaiqarama vare varuqo. Mwitaamaqi vi varuvara tina, nte nraakye qora qua ntapihi kyena ko qianinrave.

<sup>31</sup>Nte ntenavanto ntena okyarara qiariro mpovanto ni quara hia qutaa quave qiankyorave. <sup>32</sup>Qio mpovanto variqaro ni okyarara timwa nyi variho. Nte ntapihi kyauqaro mwiva nianra timwa nyi quava qutaa quama vaiho. <sup>33</sup>Nkye tauraa vaisi mponramwu sitovata mwihua uto Ioninra kyapara huvaro Ioniva ni okyarara ntapihi mwihua timwa nyunrave. <sup>34</sup>Vaisivanto ni okyarara qianinra hia nte mwianra nronraqama kyena riauqo. Kotiva nkyi sitaarive tina, nte mwi quara timwa nyuqo.

<sup>35</sup>Ioniva variqaro omwa votima kyero ite varuvata nkye variqata mwiva itorara hia mpuahaama kyeta qamwata mwatorave.

<sup>36</sup>Qio ni okyarara qiariva Ioninra nraataraarivama variho. Ni kyaiqavanto nianra timwa nyi variho. Ni kova kyaiqa ni mpitaira nte mwi kyaiqara vare varuva, qio mwi kyaiqava ni okyarara timwa nyi variho. Nraakye qoravanto ni kyaiqa taqequetama qiomia ni kova ni titairave tivarave.

<sup>37</sup>Ni kova ni titaida, mwivama ni okyarara timwa nyi variho. Nkye hia mwia qua rieta, hia mwia viri taqaarave. <sup>38</sup>Mwiva ni titaihana tumuqata

nkye hia nianra qutaa mwivave qiaovo. Nkye hia mwitaa qiavarora tiro, Kotira quavanto hia nkyi su nyaatoqi vahata variavo.

<sup>39</sup>Nkye tiqata, Kyaiqe Kotira mpukuqi aitutuma kyeta taqeta ekyaa enta ekyaa enta qati variqita quare, ti variarave. Qio mwi mpukuraqi vahi quava ni okyarara ti varihata <sup>40</sup>nkye hia nte varunani nriavana nte qati variqi vi inraikyara nkyi nyunrave. Nte hunani nriataara vahata nkye hia nrianrave.

<sup>41</sup>Hiama nte vaisigaataina nronra nrutu varaaninrave. <sup>42</sup>Nte nkyi ntapihi kyaquo. Nkyi mwutukyavanto hia Kotirara vahata variavo.

<sup>43</sup>Kotiva ni kova ni titaihana nte ntena kora nrutu varena nruqatavata nkye hia ni qamwata kyeta pitaarave. Mpowanto nai riemwa kyero nai nrutu tuaahererero hirata nkye qamwanrama kyeta mwia qamwata mwatevarave. <sup>44</sup>Nkye nai nrutu nai nrutu tuaahererera nronraqama kyeta rieqata hia Kotiva nkyi nyutu tuaaheraaninranra nronraqama kyeta riaavo. Mwitaa hi variqata nkye nataama kyetave nianra qutaa mwivave tivarave?

<sup>45</sup>Nraakiara ntena kora vuqaa variqana hia ntevanto nkyiqa qua vataaninrave. Mosesiva nkyita haivaqava, mwivama nkyiqa qua vataaananrove. Nkye Mosesirara mwiva tiri kyaahaqa hiananrove qiarave. Qio nraakiara mwivama nkyiqa qua vataaananrove. Mosesiva qara ntumwa to quava nianra tihata nkye mwia quara hia qutaa quave qiarave.

<sup>46</sup>Nkye Mosesiva tu quarara qutaa quave qiatirio, nkye ni quaravata qutaa quavema qiatiri. <sup>47</sup>Nkye mwia quara hia qutaa quave tiqata nataama kyetave nkye ni quaravata qutaa quave tivarave? Nkye hia qio mwitaa hivarave, tiro. (Iesusiva mwi quara Iutaa nronra vaisinramwu timwa nyunra.)

**Iesusiva kyara airiqama kyero tukyama nyunra**  
(Matiu 14:13-21; Maaki 6:30-44; Ruku 9:10-17)

**6** <sup>1</sup>Mwiaqaatairo Iesusiva uro Kariri kyaarerera, mwia nrutu mpo Taipiriaasi kyaarerera vara mwaini kyero mpotuqi kyaarerera mwiaqaa qarero hini tokyani uro variro.

<sup>2</sup>Uro varuvata nraakye qora airivanto taqovaro Iesusiva nriqa vuhua kyugema kyovatara tita, mwihua Jesusira vataqita vita.

<sup>3</sup>Mwia vataqita vuvaro Iesusiva nai nraaqiaranramwu kyapata uro taaqisataa mwatakyaa viro varura. <sup>4</sup>Mwi entara Iutaavanto vekyahu nyato kyarara omwata nro entava qaumaqa hura.

<sup>5</sup>Iesusiva nai nraaqiaranramwu kyapata mwatakyaa viro variqaro taqovata nraakye qora airivanto mwia vataqita nrhuua nrumu ntuvantuuma vita varuvaro Iesusiva Piripira kyapara hiro tiqaro, Tire taisaitave kyara kyoqama kyeta mwi nraakye qorhua nyianrata

nrevarave? tiro. <sup>6</sup>Iesusiva nai mwihua kyara nyiani okyarara vaakya ntapihiro mwiva Piripira qati mwataara hiqaro mwitaa tura.

<sup>7</sup>Tuvaro Piripiva tiqaro, Qaqao, kyarara 200 kinaa nronra munima kyeta vara ntainra nyianrata mwihua pataqia pataqia nraahu varevarave. Airi nraakte qoravanto variavo, tiro.

<sup>8</sup>Tuvaro Iesusira nraaqiara mpovanto Enturuva Saimoni Pitaara qatavanto tiqaro, <sup>9</sup>Nyaako mpovanto mwaini variho. Mwiva mpereti hini kyauquruvata tavukya taaratanavata nraahu vataiva variho. Nataama kyeroove mwiqiatanava airi nraakte qoraqi qio vahiananrove? tiro. <sup>10</sup>Mwitaa tuvaro Iesusiva nai nraaqiaranramwu timwa nyinro tiqaro, Nraakte qorara tivata mwatakyaa vita variate, tiro. Iesusiva mwitaa tuvaro mwini mwukyauvanto vahuvata vaisi 5,000 nramwu airivanto mwatakyaa vita varuvata (nraakteevata airivanto mwatakyaa vita varura). <sup>11</sup>Mwihua mwatakyaa vita varuvaro Iesusiva mpereti mwia vara kyero Kotirara kyuqeve timwa kyero, nraakte qora mwatakyaa vita varuhua tukyama kyero nyinro. Tukyama nyinro tavukyavata vara kyero kuaa qarama kyero mwatakyaa vita varuhua tukyama kyero nyuvata mwihua vara kyeta qio nronra. Mwihua nkyiari nraataa huntema mwi kyarara qio nronra.

<sup>12</sup>Mwihua qio nrovaro Iesusiva nai nraaqiaranramwuanra tiqaro, Mwihua nreqata viti vaati kye kyarara utu ntuaantua hiate. Kyaravanto qumina viro raupiri hiankyorave, tuvata <sup>13</sup>mwia nraaqiaranramwuvanto nraakte qoravanto kyauquru mpereti nreta viti vaati kyora utu kyeta ntutantuto tuara 12 nramwu piqa kyora.

<sup>14</sup>Piqa kyovata qio nraakte qora mwini varuhua taqovaro Iesusiva nronra kyaiqa vara kyovata mwihua tiqata, Poropeti vaisivanto mwatani tumuanriva qio quataa mwaa mwi vaisivave, tita. <sup>15</sup>Mwitaa ti varuvaro Iesusiva ntapihi kyovata nraakte qoravanto kyai mwia nronraqama kyaararo tiri vunyaa vaisi nronravanto variarive tiqata Iesusira tu vararerera uti varuvaro Iesusiva mwia ntapihi kyero mwihua mwitaa hivorave timwa kyero, qaqla kyero tumu ntantero taaqiqaa nanrianraa uro varirero vura.

### **Iesusiva kyaarera mwutuqaa kyuqu ntamwaqiro vura**

*(Matiu 14:22-33; Maaki 6:45-52)*

<sup>16</sup>Iesusiva taaqiqaa uro varuvaro enta hirero huvata mwia nraaqiaranramwuvanto kyaarera tokyasata tumu nteta <sup>17</sup>mpotuqi mwaanri nteta nrumu ntanteta Kapenaaminianra vita. Mwihua mwiniyanra vuvaro anoma entama vuvaro <sup>18</sup>Iesusiva hia tumuvata mwihua kyaareraqaa vi varuvaro toqa vaururuvanto nronraqama kyero tiqaroma kyaarera nramanri ventaqiro nri varura.

<sup>19</sup>Mwitaa huvata mwia nraaqiaranramwuvanto kyaareraqaa kyatariqo mpotu ventaqita viqata 5 kiromitave iho 6 kiromitave mwihua vara kyeta

kyaarerera utaqaa nrira taqovaro Iesusiva nramanri mwutuqaa kyuqu ntamwaqiro viqaroma mpotu qaumato nruvata mwihua mwia nraatu mpoqama kyeta aatu hi varura.

<sup>20</sup>Aatu hi varuvaro Iesusiva mwihua timwa nyinro tiqaro, Hia aatu hiate. Ntema nruqo, tiro. <sup>21</sup>Tuvata mwihua qio mpotuqi mwaanri ntaante tuvaro mwaanri ntovaro mpotuvanto qamwanrama mwihua virera hunani uro ntora.

### Nraakyе qoravanto Iesusirara puaa hi varura

<sup>22</sup>Mwia qanranraa nraakyе qora kyaarerera tokya hini varuhua taqovaro mpotu kuaiqavento vahuvata mwihua ntapihi kyovaro Iesusiva hia mwisairo nai nraaqiaranramwu kyapata mwaanri ntero vuvata mwihua nkyiariaraa mpotuqi mwaari nteta vura.

<sup>23</sup>Mwihua mwitaama rieta varuvata Taipiriaasisaita mpotu mponramwuvanto nruru tauraa Iesusiva kyarara kyuqeve timwa kyero, tukyama nyuvata nraakyе qoravanto nro mwatara qaumato nruvata

<sup>24</sup>mpo nraakyе qora mwini varuhua taqovaro Iesusiva hia mwini varuvata mwia nraaqiaranramwuvata hia varuvata mwihua mpotuqi mwaanri nteta Kapenaamini Iesusirara puaa hirerata vura.

### Iesusiva nyaamwunyaa mperetiara tura

<sup>25</sup>Mwihua Iesusira puaa hirerata vuhua uro kyaarerera tokya hini Iesusira puaama kyeta mwianra tiqata, Mwaanra ti variara vaisio, taireve e mwaini nrinra hiaro? tuvaro <sup>26</sup>Iesusiva tiqaro, Nte qutaa qua qianinra riaate. Nkye mpereti airiqama nraanranra rieqatama nianra puaa hi variavo. Nkye hia ni kyaiqa okyara ntapihi paahima kye rieqatavauma nianra puaa hi variavo.

<sup>27</sup>Qio hiama qati kyara tapitaani kyarara vararerata kyaiqa varaate. Nkye mwitaa hira qaqlira kyeta ekyaa enta qati variqi quani kyarara vararerata kyaiqa varaate. Mwi kyarara nte mwatani mwatatai nraaqiarava variqana qiomaa nte nkyi nyianinrave. Kotiva ni kova mwivama ni nronraqama kyaihana nte qio mwitaa hianinrave, tiro.

<sup>28</sup>Iesusiva mwitaa tuvata mwihua mwia kyapara hita tiqata, Tire Kotira kyaiqa vararerera hiqata, nataa nataave hiananrave? tita. <sup>29</sup>Tuvaro Iesusiva timwa nyinro tiqaro, Kotiva nkyiara mwaa kyaiqara varaate ti variho. Mwiva titai vaisirara nkye qutaa mwivave qiate tiho, tiro.

<sup>30</sup>Mwitaa tuvata mwihua tiqata, Qio nanra kyaiqave tiri tinraamwutairaqe tire mwia taqeta i okyarara qutaave qiananrave?

<sup>31</sup>E nanra kyaiqa nronra kyaiqave varenanrave? Tiri haivaqahua haaru qumina mwatani variqata nyaamwunyaa kyara nronrave. Mwihua manaa nronrave. Mwianra Kotira mpukuqi qara ntumwa tova mwitaama tiro: Mwiva nyaamwunyaa kyara nyunrave, turave, tita.

<sup>32</sup>Mwihua mwitaa tuvaro Iesusiva tiqaro, Nte qutaa qua qianinra riaate. Haaru mwi entara Mosesiva nkyi haivaqahua kyara nyiqanro hia qutaa nyaamwunyaa kyara mwihua nyunrave. Ni kova, mwivama nyaamwunyaa kyara qutaa kyara nyianrivama variho.

<sup>33</sup>Mwatani variahua mwihua qati variqi quate tiro, nyaamwusairo tumu vari vaisiva, mwi vaisivama Kotira kyaravanto variho, tiro.

<sup>34</sup>Mwitaa tuvata mwihua tiqata, Nronrao, qio e mwi kyarara tiri timwiqira quante, tita.

<sup>35</sup>Tuvaro Iesusiva timwa nyinro tiqaro, Qio nte qati variqi vi kyarava mwaa mwivama varuqo. Nte hunani nrrianriva hiama kyara nraataa hiananrove. Nianra qutaa mwivave qiariva hiama mwia nramanri nraata hiananrove.

<sup>36</sup>Nte vaakya nkyiara tiqana, Nkye ni taqetavata hia nianra qutaa mwivave qiavo, turave. <sup>37</sup>Ni kova ni mpiari nraakye qorahua, mwihua nte hiarinani nrivarave. Mwihua nte hiarinani nrivaqena nte hiama mwihua qoririma nyataaninrave.

<sup>38</sup>Nte nyaamwusaina hia ntene vu nraato tukyena kyaiqa vararerera tumuvave. Nte ni titaira mwutukya vahi kyaiqara vararerera tumuvave. Ni titaira Kotira mwutukya vahiva mwitaamama vahirove. <sup>39</sup>Mwiva nraakye qora ni mpihuia nte mpoku raupirima kyaankyorave. Nte mwihuqaqa ntaqikyiqi vina ekyaara entaqaa vara sivuma kyaarita qati variqita vivarave.

<sup>40</sup>Qaiqaa ni titaira mwia mwutukya vahiva mwitaamama vahirove. Ekyaa nraakye qora ni mwia mwaaqu taqeta qutaa mwivave tihua, mwihuama qati variqita vivarave. Nte ekyaara entaqaa variqana mwihua sivuma kyaarita qati variqi vivarave. Qio ni kora mwutukya vahiva mwitaamama vaiho, tiro.

<sup>41</sup>Iesusiva tiqaro, Nte nyaamwusaina tumu mperetivave, turara tita, Ituaa nronranramwuvanto nrutu nraunru/nrunru nraanru tita tiqata,

<sup>42</sup>Qaqao, mwi vaisiva Iesusiva Iosepira mwaaqvantove. Mwia nrohua qohua tire taqaunrave. Qio nanraqamave mwiva nte nyaamwusaina tumuvave tiho? tita.

<sup>43</sup>Mwihua mwitaa ti varuvaro Iesusiva tiqaro, Eqaate. Nkye hia nrutu nraunru qiate. <sup>44</sup>Ni kova ni titaida hia vaisi mpo vitairera, mwi vaisiva hiama nte hunani qio nriananrove. Ni kova vitaarihua mwihua nraahuma nte hunani nrivarave. Qio mwihua nrivaqe nte ekyaara entaqaa mwihua vara sivuma kyaarita mwihua qati variqi vivarave. <sup>45</sup>Haaru poropeti vaisi mpovanto mwitaama qara ntumwa tero tiqaro,

Nraakiara Kotiva ekyaas nraakye qora nyaamwute varirata mwia kyaiqa ntapihivarave, turave. (Ais 54:13)

Ni kova kyaiqa nyaamwutairata mwihua ni kora qua riehua mwihua nraahuma nte hunani nrivarave. <sup>46</sup>Qio hia vaisi mpovanto ni kora

taqaiva varirave. Nte Kotiva hinasaina tumuva, nte nraahu mwia taqaaurave.

<sup>47</sup>Nte quitaama tuqo. Nianra qutaa mwivave qiariva qati variqiro quananrove. <sup>48</sup>Nraakyе qoravanto kyara nreta qati variqi viva nte mwaa mwi kyaravama varuqo.

<sup>49</sup>Nkyi haivaqahua qumina mwatani variqata nyaamwunyaa kyara, mwia nrutu *manaa* mwi kyarara nramwaqi viqatavata uro qutu vurave. <sup>50</sup>Qio mpo kyaravanto nyaamwusairo tuminrave. Mwi kyarara nraanriva hiama ekyara qutu quananrove. <sup>51</sup>Qio nte qati variqi vi kyarava mwiva nyaamwusaina tumuvave. Mpovanto mwi kyarara nraanriva, mwiva qati variqiro quananrove. Nte kyara mwinrenra ntene mwativata ntene mwamwantavata mwianinrave. Mwatani varihua qati variqita quate tina, nte mwia nyianinrave, tiro.

<sup>52</sup>Tuvaro Jesusiva mwitaa tuvata Iutaa vaisi nronranramwuvanto nkyiari nraahu inronra hita tiqata, Mwiva nataama kyerove nai mwamwanta tiri timwinraqe nraananrave? tita.

<sup>53</sup>Iesusiva mwihua timwa nyinro tiqaro, Qutaama nte tuqo. Nte mwatani mwatatai nraaqiarava nte variarita nkye hia ni mwativata nraanrevata nraivera, nkye hiama qati variqita vivarave.

<sup>54</sup>Ni mwativata ni nraanrevata nraanriva qati variqiro viraqe nte ekyara entaqaa mwia qati vara sivuma kyaaninrave.

<sup>55</sup>Ni mwativantvo kyara tuananra vaiharo ni nraanrevantovata nramanri tuananra vaiho. <sup>56</sup>Ni mwativata ni nraanrevata nraanriva niqi variraqena nte mwiaqima varianinrave.

<sup>57</sup>Ni kova mwiva qati variqiro viva variqaro mwiva ni titaihanama nte mwiva qati variqiro viraqaataina ntevata mwaini tumu qati variqina vuqo. Qio mwia votima kyero vaisi mpovanto ni nramwaqiro quariva niqaatairo qati variqiro quananrove.

<sup>58</sup>Qio nte mwi kyarava nyaamwusaina tumuvave. Nkyi haivaqahua haaru mpo kyara manaa nramwaqita vita uro qutu vurave. Qio hia nte mwi kyarara voti huvama varuqo. Ni kyara mwaa nraanriva ekyaa enta qati variqiro quananrove, tiro. <sup>59</sup>Iesusiva Kapenaamini mwaanra nraamwuqi variqaro mwi quara tura.

### **Iesusira vataqita vuhua mponramwuvanto mwia qaqira kyeta vura**

<sup>60</sup>Iesusiva mwi quara tuvata mwia vataqita nrohuhua mponramwu variqata mwi quara rieta qaqao tita, Mwi quava muaanra ntai quarama tiho, Tavave mwi quara qio ntapihiananrove? Hia tire qio ntapihiananrave, tita.

<sup>61</sup>Mwihua tirema kyeta mwitaa ti varuvaro Iesusiva ntapihuvata mwia vataqita nrohu vaisihua mwianra nrutu nraunru tiqata mwia inronra hi varuvaro Iesusiva tiqaro, Mwi quara kyaarave nianra nrutu nraunru ti variavo?

<sup>62</sup>Qio nte mwatani mwatatai nraaqiarava varuqo. Nte nraakiara tumu ntantena ntene variavara qoqaraanani uro variarita nkye mwia

taqeta nataave hivarave? <sup>63</sup>Vaisivanto mwanraqura vataava variharo mwia mwanraquravanto mwiaqi variharora tiro, mwi vaisiva qati varirave. Mwia mwanraquravanto mwi vaisiraqi hia varirera, hia mwia mwamwantavanto mwia qio kyaahaqa hiraro mwiva qati variqiro quananrove. Qio nte vaakya turara hia nte qumina mwamwantara turave. Nte qati variqi vi mwanraqura okyarara nkyi timwa nyunrave.

<sup>64</sup>Nte qati variqi vi okyarara nkyi timwa nyunrave. Nte mwitaa tuqata nkye hininramwuvanto hia ni quara qutaa quave qiao, tiro.

Iesusiva haaru toharo entaraqaatairo vaisi mponramwuvanto nraakiara mwianra hia qutaa mwivave tihua ntapihi kyora. Vaisi mpovanto mwia nramwutaahua uro timwa nyinro mwia qovarama kyaaninravata ntapihi kyora.

<sup>65</sup>Mwihua mwitaa mwitaa hirara ntapihi kyero Iesusiva mwihua timwa nyinro tiqaro, Mwianra rieqanama nte vuni tiqana, Hia ni kova qiove tirera, hia mpovanto nte hianinrani qio nrarianrove, turave, tiro.

<sup>66</sup>Mwitaa tuvata mwia kyaara Iesusira vataqita vuhua airivanto mwia ekyaara qaqlira kyeta nrumu ntanteta vura.

<sup>67</sup>Mwitaa huvaro Iesusiva nai nraaqiara 12 nramwu kyapara hiro tiqaro, Nkyevata mpo? Nkye ni qaqlira kyeta vireratave hiavo? tiro.

<sup>68</sup>Tuvaro Saimoni Pitaava mwia timwa mwinro tiqaro, Nronrao, tirenramwu ta vaisiva hinanive quananrave? Ema qati variqi qua okyarara qiaravama variaro. <sup>69</sup>Tirenramwu iara qutaama mwivave tiqatama ntapihi kye taqaurara e nraahuma Kotira kyotata vaisivanto Kotiva hinasaira tumuanravave, tiro.

<sup>70</sup>Mwitaa tuvaro Iesusiva mwihua timwa nyinro tiqaro, Qio nte nkyi 12 nramwu nyaanrama kyena sitaurave. Nte 12 nramwu nkyi nyaanrama tauraqitairovata mpokuvanto uaqia hi vaanavama variho, tiro. <sup>71</sup>Iesusira nraaqiara 12 nramwuqitairo Iutaasiva Saimoni Isikeriotira mwaqvavanto nraakiara Iesusira qovarama kyaaninranra rieqaro Iesusiva mwitaa tura.

### Iesusira qatanramwuanra tura

**7** <sup>1</sup>Mwiaqaataita Iutaa vaisi nronranramwuvanto mwia ru kyarerata uti varuvarora tiro, Iesusiva hia Iutiaani nrohiraitiro, qaqlira kyero Kariri mwatanai variqaro mwini nraahu nrohi varura.

<sup>2</sup>Mwi entara omwata nro entava mpo qaumatoqa hura. Mwia nrutu *Haraara Nraamwu* omwata. (Haaru mwihua haivaqahua qumina mwatanai variqata haraara nraamwuqi varu entarara rieqatama omwata nronra.) Omwata nro entava qaumato vahuvata <sup>3</sup>Iesusira qatanramwuvanto tiqata, Qio mwaini kyera vetara Iutiaani virata i vataqita vihua i kyaiqa taqaate. <sup>4</sup>Nai nrutu viriniqa hiarive tiro, mpovanto hia nai kyaiqa uqeta kyakya hirave. E qutaa mwi kyaiqara mwi kyaiqara vare varirera, qio uro ntera qoqaa variqara mwi kyaiqara mwi kyaiqara varairata ekya mwihua i taqaate, tita.

<sup>5</sup>Mwia qatanramwuvanto Iesusirara hia quataa mwivave tiqatara tita, mwihua mwitaa turama.

<sup>6</sup>Mwitaa tuvaro Iesusiva timwa nyinro tiqaro, Nte mwini quari entava hiama nri ntaiho. Nkye qioma api enta vivarave.

<sup>7</sup>Mwatani variahua hia nkyi nramwutaaqa hivarave. Nte mwihua kyaiqara uaqia hi kyaiqarave timwa kyeqana ntapihi timwa nyunrave. Mwitaama vutu kyeqana timwa nyuqata mwihua ni nramwutaaqa hi variavo. <sup>8</sup>Nkyenramwu omwata nranrenra hianani quate. Nte mwini quari entava hia nri ntaihana nte mate hia quaninrave, tiro.

<sup>9-10</sup>Iesusiva mwitaa timwa kyero Karirini varuvata mwia qatanramwuvanto omwata nranrenra hunani vuvaro Iesusiva vari kyero nraakiara mwivavata mwini viro. Mwiva hia qoqaa viraitiro, uqeta kyero mwini vura.

<sup>11</sup>Vuvata Ierusaremini omwata nronraqi Iutaa vaisi nronranramwuvanto mwianra aitutu hi varita tiqata, Mwiva tanave variho? ti varura.

<sup>12</sup>Mwitaa ti varuvata qati nraakye qoravanto Iesusirara tirema kyeta mpo qua mpo qua tura. Hini uhua mwianra tiqata, Mwiva kyuqe vaisivantove, tuvata hini uhua mwianra tiqata, Qaqao, mwiva nraakye qora api aanra nraahu nyaamwute vari vaisivave, tita. <sup>13</sup>Iutaa nronra vaisinramwu nyaatu aatu hiqata mwihua hia Iesusirara vutu kyeta mwitaa tura. Mwihuqaqitairo hia mpovanto vutu kyerovata tura.

<sup>14</sup>Mwitaamaqita vuvaro omwata nro entava hininramwu taiqa vuvaro Iesusiva uro ntero Kotira nraamwu nronraqi variqaro Kotira qua nraakye qora timwa nyi varura.

<sup>15</sup>Mwiva timwa nyi varuvata Iutaa vaisi nronranramwuvanto mwia qua rieta nrihanrama vita tiqata, Qikye, mwiva hia tirivata sikuru tivave. Nataama kyerove mwiva mpo qua mpo qua okyara qio ti variho? tita.

<sup>16</sup>Mwitaa tuvaro Iesusiva tiqaro, Hiama nte ntena qua mwakyaaunya nkyi timwa nyi varuqo. Kotiva ni titaihana nte mwia qua mwakyaaunya nkyi timwa nyi varuqo, tiro.

<sup>17</sup>Iesusiva mwitaa timwa kyero mwiva tiqaro, Kotira mwutukya vahirara rieqaro mwia kyaiqa varaataa hiariva, mwivama ni qua tukyama kyero tiqaro, Mwiva Kotira quama ti variho, mwiva nai quama ti variho, qiananrove.

<sup>18</sup>Mpovanto nai vu nraato tukyero qua ti vari vaisiva, mwi vaisiva nai nrutuara nraahu rieqaro varirave. Mpovanto nai titaira nrutuara nraahu riemwaqiro vi vari vaisiva, mwi vaisiva quataa qua nraahuma tiharo hiama unra qua mwiaqi vahirove.

<sup>19</sup>Qio quataa nkyi haivaqava Mosesiva qua mwaanra Kotiva mwitaa mwitaa hiate tu quara nkyi timwa nyunrave? Qio hia nkyiqitairo mpovanto mwi quara vataqiro vi varirave. Mwitaa hiqata nkye nanraqamave ni ru kyarerata uti variavo? tiro.

<sup>20</sup>Iesusiva mwitaa tuvata mwini ntuvantuama vita varuhua tiqata, E ueraqama quaro. Tavave i ru kyarera uti variho? tita.

<sup>21</sup>Tuvaro Iesusiva tiqaro, Nte (mwaanra entaqaa) nronra kyaiqa kuaiqia varauqata nkye mwianra nrihanrama quavaroma hia nkyi kyakya iho.

<sup>22</sup>Nkyi haivaqava Mosesiva mwaanra qua tiqaroma qoraisi nraaqiarara mwia mwamwanta toqa kyaate. (Qoraisi nraaqiara mwatataivata 8 enta nritarairata mwia mwamwanta toqa kyaate,) turave. Qio hia Mosesiva tauraqama mwi quara turave. Mosesira haivaqahuamwanra mwi quara vuniqama kye turave. Qio nkye mwi quara rieqatama 8 enta nritarairata qati entaqaaave, mwaanra entaqaaave, nkye qoraisi nraaqiara mwamwanta toqa nyate variarave. <sup>23</sup>Mosesira qua nteqa kyaarorave tiqatama nkye mwaanra entaqaa qoraisi nraaqiara mwamwanta toqa nyate variarave. Mwitaa hi variavana nte mwaanra entaqaa nriqa vi vaisira kyuqema kyauqata nkye nanraqamave mwia kyaara ni inronra hi variavo?

<sup>24</sup>Nkye niqaa qua vatarera hiqatama, haunri qumina nkyeta su nyaato tiraqa niqaa qua vatevorave. Nkye qutaa vahiani inraikyaraqaara niqaa qua vataate, tiro.

### **Iesusiva mwiva Kotiva titai vaisivave? tura**

<sup>25</sup>Iesusiva mwitaa ti varuvata Ierusaremiqinaahua mponramwuvanto Iesusirara mpo vaisinramwu kyapara hita tiqata, Mwi vaisirave mwihua ru kyarerata uti variavo?

<sup>26</sup>Qio taqaate. Mwiva qoqaa variqaro qua ti varihata mwihua hia nrumu mwiaqaa mwianra mpo qua qiao. Qutaave mwihua Iesusirara mwiva mesaiaavantove qiao? <sup>27</sup>Qio tire Iesusiva mwisairo nri okyarara ntapihuro. Mwiva mwi mwatukyaraqitairo nrivave. Mesaiaavanto qovarama viraro hiama tiriqitairo mpokuvanto mwiva mwisairo nriani okyarara qio ntapihiananrove, tita.

<sup>28</sup>Mwitaa ti varuvaro Iesusiva Kotira nraamwu nronraqi mwakyaakya timwa nyi variqaro aakyara ntamwa kyero mwihua kyaparama nyatero tiqaro, Qutaa nkye ni ntapihi kyaarave? Qutaa nkye nte mwisaina nru okyarara ntapihi kyaarave? Qio hia nte ntenu vu nraato tukyena nruvave. Ni titava mwiva qutaa kyaiqa vare varivave. Nkye hia mwia ntapihiarave. <sup>29</sup>Nte mwia ntapihurave. Mwivama ni titihana nte mwiva hinasaina tumuvave, tiro.

<sup>30</sup>Iesusiva mwitaa tuvata mwi quara kyaara mwia ntavaaqavu kyaare tiqatavata hia qio mwia tu varora. Iesusira rukye entava hia nri ntovatara titi, mwihua hia qio mwia tu varora.

<sup>31</sup>Mwitaa huvata nraakye qora mwihuaqitaita airivanto Iesusirara qutaa mwivave titi. Mwihua mwataama titi, Iesusiva nronra kyaiqa vare variho. Mesaiaavanto nrianriva mwiva Iesusira kyaiqa qiove nraatara kyaananrove? Hia qio mwia nraatara kyaananrove. Iesusiva mwivama mesaiaavanto variho, tita.

### **Parisi vaisinramwuvanto nkyiari porisi sitora**

<sup>32</sup> Parisi vaisinramwuvanto variqata riovata nraakye qoravanto ntuvantuama vita Iesusirara tirema kyeta mwitaa ti varuvata Parisi vaisinramwuvata, Kotira kyaiqa vara mwate varu vaisihua mwihua nronranramwuvata, mwihua nkyiari porisi sitovata mwihua Iesusira ntavaaqavu kyeta karavuqi kyarerata vita.

<sup>33</sup> Mwihua vuvaro Iesusiva tiqaro, Nte nkyi kyapata pataqia vari kyenama mwata mwaqaataina ni titaiva hinani virerave.

<sup>34</sup> Mwi entara nkye ni puaama kyaare tira, hiama qio ni puaama kyevarave. Nkye hia qioqamakyе virera hinani nte virerave, tiro.

<sup>35</sup> Mwitaa tuvata Iutaa vaisi nronranramwuvanto nai kyapara hi nai kyapara hita tiqata, Mwiva taini viraqeve tire hia qio mwia puaama kyaananrave? Mwiva Kiriki mwatukya mponramwuqi Iutaa mponramwuvanto variananive uro qua timwa nyinrenro virerove?

<sup>36</sup> Mwiva nanrianra tiqaro, Nkye ni puaama kyaare tira hiama qio ni puaama kyevarave, tiho. Nkye hia qioqamakyе virera hinani nte virerave, tiho. Mwiva mwitaa tiqaro nanra quave tiho? Hiama tire mwia qua ntapihita huro, tita.

### **Nkyi mwutukyaqitairo qati variqi quani nramanriva ntamwaqiro quananrove tura**

<sup>37</sup> Mwitaa tuvaro omwata nro entava ekyara enta nri ntora. Mwi entarara nronra entave tura. Ekyara enta nri ntovaro Iesusiva mwi entaraqaa siviro paatiro tiqaro, Nramanri nraataa hiariva nte hunasairo qioma nrumu nraananrove.

<sup>38</sup> Kotira mpukuqi qara ntumwa to quava nianra mwitaama tiro:  
Nianra quttaa mwivave qiariva variraro mwia mwutukyaqitairo  
rumwu votima kyero qati variqi quani nramanriva ntamwaqiro  
quananrove, turave, tiro. *(Ais 44:3)*

<sup>39</sup> Iesusiva siviro variqaro mwi quaraqaa ntumwa kyero Kotira mwanraqura nyianinranra tiro. Nraakye qoravanto Iesusirara quttaa mwivave tihua Kotira mwanraqura varerara tura. Mwi entara Iesusiva hia qutu viro qaiqaa qati siviro nyaamwuni vurara tiro, hia Kotira mwanraqura nyu entava vhahura.

### **Nraakye qoravanto nkyiari tukyama vura**

<sup>40</sup> Iesusiva mwitaa tuvata nraakye qora ntuvantuama vuhua airivanto tiqata, Qio quttaama Iesusiva poropetivanto varihi. Kotiva mwia kyaahaqa hi variharo mwiva mwia qua ti varihi, tita.

<sup>41</sup> Tuvata mponramwuvanto tiqata, Mwiva mesaiaavantove.  
Mwiva Kotiva titai vaisiva tiri kyaahaqa hiarivave, tita. Tuvata

mponramwuvanto qaqao tita, Mesaiaavanto hiama Karirikitairo nriananrove. <sup>42</sup>Kotira mpukuqi mesaiaara qara ntumwa tova mwitaama tiro:

Mesaiaavanto Ntevitira kuua okyarama variraro  
Vetarahemi Ntevitiva varu mwatukyaraqi  
mwia mwata taananrove, turave, tita.

(Maika 5:2)

<sup>43</sup>Mwitaa tiqata nraakye qora ntuvaaquama vita varuhua hininramwuvanto Iesusirara qamwateqata varuvata hininramwuvanto hia mwianra qamwateqata varura. <sup>44</sup>Hininramwuvanto Iesusira karavuqi kyarerata uti varura. Qio mwi entara hia mwihuaqitairo mpokuvanto Iesusira tu varora.

#### **Porisi vaisinramwuvanto qati uro ntanteta nrunra**

<sup>45</sup>Porisi vaisinramwu vaakya sitohua nrumu ntanteta Kotira kyaiqa vara mwate varuhua mwihua nronranramwuvata, Parisi vaisinramwuvata, mwihua hunani uro ntovata mwihua tiqata, Qaqao, nkye mwia vita vareta nriataara vaihata nanraqamave qati nriavo? tuvata <sup>46</sup>porisinramwuvanto tiqata, Tire riauraro mwiva hia qumina vaisivanto qua tintema kyero qua ti variho, tita.

<sup>47</sup>Tuvata Parisi vaisinramwuvanto tiqata, Qio nkyevata mwia unra quara qutaa quaveve tita hiavo? <sup>48</sup>Nkye ntapihitave hiavo? Tavave tiri nronra vaisinramwuqitairove, Parisi vaisinramwuqitairove, Iesusirara qutaa mwiva mesaiaavanto variho tiho? Hiama tirinramwuqitairo mpovantovata mwitaa tiho. <sup>49</sup>Qati qumina nraakye qora ntuvantuama vita variahua hia Mosesira qua mwaanra qio ntapihi riaarara tiro, mwia kyaara Kotiva mwihua qoraqama nyataananrove, tita.

<sup>50</sup>Parisi vaisinramwuvanto mwitaa tuvaro Parisi vaisi mpokuvanto Nikotimaasiva mwiva entaqi Iesusira uro taqova, mwiva qaqao tiro, <sup>51</sup>Tire teta qua mwaanra rieqatama hia ko tiraitita, vaisiqaa qumina qua vataarorave. Tire ko nraanteta qiatarare, tiro.

<sup>52</sup>Mwitaa tuvata mwihua tiqata, E mpo? E Karirisaira nrianravave? E Kotira mpukuqi taqaante. E mwipi taqairaro hiama Karirisairo poropeti vaisivanto qovara hiananrove, tita.

<sup>53</sup>[Mwitaa timwa kyeta nkyiari nraamwuni nkyiari nraamwuni vuvaro Iesusiva Oripi taaqiqaa uro varura.

#### **Api nrohu nraakyerara tura**

**8** <sup>1-2</sup>Mwia qanranraa toqa entaqi Iesusiva uro ntantero Kotira nraamwu nronraqi uvata nraakye qora airivanto ntuvantuama vita varuvaro Iesusiva mwatakyaa viro variqaro qua timwa nyi varura.

<sup>3</sup>Timwa nyi varuvata mwaanra okyara ti varu vaisihuavata, Parisi vaisinramwuvata, mwihua nraakye mpo vita vareta nrunra. Mwi

nraakyeva vaati vataava mpo qoraisivata nrohi varuvata mwihua taqamwa kyeta mwia viteta Iesusiva hunani uro nraakye qora suqaa mwia kyovaro siviro varuvata mwihua Jesusirara tiqata,<sup>4</sup> Mwaanra ti variarao, mwaa nraakyeva vaati vataava mpo qoraisi vatama kyero nrohi varihata tire mwia taqeta tu vareta nrunro.<sup>5</sup> Mosesira mwaanra quavanto mwitaama tiro: Nrahesivanto mwitaa hirera, oriqotaita ntuqutu kyaivaro cutu quarive, turave. Qio e mpo? Nanra quave mwianra tinanrave? tita.

<sup>6</sup>Iesusirara api qua tiraqe tire mwiaqaa qua vataare tiqata mwihua mwitaa tuvaro Iesusiva hia qua tiraitiro, kakataama viro nai vukahiqo mwataqaa qara nti varura.

<sup>7</sup>Qara nti varuvata mwihua sivita variqata mpo qua mpo qua Iesusira kyapara hi varuvaro Iesusiva mwaamwianra viro mwihuara tiqaro, Nkyiqitairo mpovanto hia uaquia hi kyaiqara utuariva, mwiva nraante ori vara kyero mwia ntuquutarive, tiro.

<sup>8</sup>Iesusiva mwitaa timwa kyero mwiva qaiqaa kakataama viro mwataqaa qara nti varuvata<sup>9</sup> mwihua mwi quara rieta kuaiqia kuaiqiavanto mwiqitaita qaqlira kyeta veva nteqata vura. Nyaapainramwu nraante veva nteta vuni uvata qaraakya vaisinramwu mwihua nraakiara veva nteta vita mwihua Iesusira mwini kyeta vuvaro Iesusiva nanrianraa variro.

<sup>10</sup>Iesusiva mwaamwianra viro taqvaro mwi nraakyeva vaakya siviro varunani nanrianraa varuvaro Iesusiva tiqaro, Mwihua tainive variavo? Hiave mpovanto iqaa qua vataariva variho? tuvaro nraakye mwiva tiqaro,<sup>11</sup> Nronrao, hia mpovanto mwitaa iho, tuvaro Iesusiva mwia timwa mwinro tiqaro, Qio ntevata hia iqaa qua vatarerave. Qio ena quante. Virava hiama nraakiara qaiqaavata uaquia hi kyaiqara utuante, tiro. Turama.]

### Iesusiva nte mwatanyaa omwavantove tura

<sup>12</sup>Iesusiva qaiqaa nraakye qora timwa nyinro tiqaro, Nte mwatanyaa omwavanto varuqo. Ni pataqiro nrianriva hiama kyokiraqi nrohiananrove. Mwiva ntuvaahaaninraqa nrohiquar qati variqiro quananrove, tiro.<sup>13</sup> Iesusiva mwita tuvata Parisi vaisinramwuvanto tiqata, Qio e enanra variqara ena nrutu tuaahere variananranra tiro, i quavanto qumina quama vaiho, tita.

<sup>14</sup>Mwitaa tuvaro Iesusiva qaqlira tiro, Nte variqana ntena kyaiqara tiqana hiama qumina qua tuqo. Nte ntena mwisaina nru okyarara ntapihi kyaurave. Nte ntena quani okyarara ntapihi kyaurave. Mwitaa hurara tiro, ni qua cutaa quama vaiho. Nte mwisaina nru okyararave, nte quani okyararave, nkye hia ntapihivarave.

<sup>15</sup>Nkye ko tiqatama nkye vaisi su nyaato vahiraqa ko ti variarave. Mate nte hia vaisi mpo ko timwa kyena mwiaqaa qua vatauqo.

<sup>16</sup>Nte ko qiataa hiraqena qiomaa nte ko avuqavuma kyena qianinrave. Nte ko tiqana hiama ntenanraa ko qianinrave. Nte ko qiaro ni kova ni titaiva variqaro ni kyaahaqa hiraqe nte avuqavuma kyena ko qianinrave.

<sup>17</sup>Nkyi mwaanra qua qara ntumwa tova mwitaama tiro: Vaisi taaratanavanto qua tiqatama kuaa qua nraahu tivera, qio mwitana quavanto qutaa quama vahiananrove, turave.

<sup>18</sup>Qio nte ntene quara qutaa quave qiaro ni titaiva ni kova, mwivavata ni quara qutaa quave nraahuma qiananrove, tiro.

<sup>19</sup>Iesusiva mwitaa tuvata mwihua tiqata, I qova tana variharave ti variaro? tuvaro Iesusiva tiqaro, Nkye hia ni ntapihi kyaahuara tita, nkye ni koravata hiama ntapihiavo. Nkye ni ntapihi kyaatirio, nkye qiomaa ni koravata ntapihiatirio, tiro.

<sup>20</sup>Iesusiva Kotira nraamwuqi munima kye varuraqi variqaro mwi quara tiro. Tuvaro mwia rukye entava hia nri ntovarora tiro, hia mpovanto mwia ntavaaqavuqiro karavuqi kyora.

### Iesusiva nai qorara tura

<sup>21</sup>Iesusiva qaiqaa timwa nyinro tiqaro, Qio nte quarita nkye qumina nianra puaamaqi vita uro nkyeta qora kyaiqa rirante qati qutu vivarave. Mwitaa hiqata nte quaninrani nkye hiama qio vivarave, tiro.

<sup>22</sup>Mwitaa tuvata Iutaa vaisi nronra nramwuvanto tiqata, Mwiva nanra quave tiho? Mwiva nai tiqaro, Nte quaninrani nkye hia qio vivarave, tiho. Mwiva naivanto nai ru kyarero uti variqarove mwitaa ti variho? tita.

<sup>23</sup>Mwitaa tuvaro Iesusiva tiqaro, Nte virisaina tumuqata nkye mpriasaita nriahuave. Nkye mwaa mwataraqataita nriahuave. Nte hia mwaa mwataraqataina nrurvave. <sup>24</sup>Nte vaakya nkyiara tiqana, Nkye nkyeta qora kyaiqa rirante variqi vita qutu vivarave, turave. Nte qati nraahu variqi vuvave tuqo. Nkye hia mwi quarara qutaa quave tivera, qutaa nkye nkyeta qora kyaiqa mwia rirante qutu vivarave, tiro.

<sup>25</sup>Mwitaa tuvata mwihua mwia kyapara hita tiqata, Qio e ta vaisivave hiaro? Tuvaro Iesusiva mwihua timwa nyinro tiqaro, Nte vuni nkyi timwa nyuva nte mwivama huqo. <sup>26</sup>Nte nkyiqa qua vataari quava, mpo qua mpo qua vahana mate hia nte mwi quara tirerave. Ni titaiva ni timwa mpi quara, nte mwi quara nraahu mwatani varihuavata timwa nyinrenrave. Ni titaiva qutaa qua nraahu ti varivave, tiro.

<sup>27</sup>Iesusiva mwitaa tuvata mwihua hia ntapihi kyeta Iesusiva nai qorara tu quara riora. <sup>28</sup>Mwihua hia ntapihuvaro Iesusiva qaiqaa tiqaro, Nte mwatani mwatatai nraaqiaravama varuqo. Nte variarita nkye ni tuaahera kyaivarow mwiaqatairo nkyi su nyaato ntapihirata nkye ni okyarara ntapihi retama nianra qio mwiva qati nraahu variqiro vivave tivarave. Nkye mwi entarama nte hia ntenaqama kye mpo kyaiqa varaura ntapihitia ni kova timwa mpi quara mwi quara nraahu timwa nyunravata ntapihivarave.

<sup>29</sup>Ni titaiva ni vatama kyero variqaro mwiva hia ni qaqlira kyaananrove. Ni titaiva ni vatama kyero varihana nte mwia mwutukya vahi kyaiqara vare varuqaro mwiva nianra qamwateqaroma hia ni qaqlira kyaiho, tiro.

<sup>30</sup>Iesusiva mwi quara ti varuvata airivanto mwi quara riohua mwianra quutaave tita.

### Quttaa quavanto nkyi huvantu kyaananrove tura

<sup>31</sup>Iuttaa mponramwuvanto mwianra quataa mwivave tuvaro Iesusiva mwihuara tiqaro, Qio nkye ni qua riemwaqita vivera, nkye quataama ni pataqita nrighua variavarave. <sup>32</sup>Nkye quataa qua ntapihi kye riaivarо quataa quavanto nkyi huvantu kyairata nkye qati varivarave, tiro.

<sup>33</sup>Mwitaa tuvata mwihuua qaqaо tita, Tire tetu haivaqara Evarahaamunra nraaqiarama varuro. Hia mpovanto tiri rupa taihata tire mwia kyaiqa vare varuro. Qio nanraqamave e tiriara nkyi huvantu kyairata nkye qati varivarave qiarо? tita.

<sup>34</sup>Mwihuua mwitaa tuvaro Iesusiva tiqaro, Nte quataa quama tuqо, Nkye uaqia hi kyaiqara uti variavaro nkyi uaqia hi kyaiqava rupa taihatara tita, nkye mwia kyaiqa nraahu vare variavo.

<sup>35</sup>Nraamwu qova variraro rupataari vaisiva hiama ekyaa enta mwivavata variqiro quananrove. Nai mwia mwaaquvantoma mwivavata mwaakyota variqiro quananrove.

<sup>36</sup>Nte mwia mwaaquvanto nkyi huvantu kyaarita nkye quataaqama kyeta qati varivarave.

<sup>37</sup>Nkye Evarahaamunra nraaqiara variara mwia nte ntapihi kyaurave. Mwitaama variqatavata nkye ni quara qumina quave timwa kyeta, ni ru kyarerata uti variavo. <sup>38</sup>Nte ntenu kokyantiri variqana mwi inraikyara taqaurara nkyi timwa nyi varuqо. Nkye nkyeta sora vatama kyeta variqata taqaa kyaiqara nkye mwi kyaiqarama vare variavo, tiro.

<sup>39</sup>Iesusiva mwitaa tuvata mwihuua tiqata, Tiri tiqova Evarahaamuvave, tita. Tuvaro Iesusiva tiqaro, Nkye quataa Evarahaamunra nraaqiara variatirio, nkye mwiva varo kyaiqarama nkyevata varaatirio.

<sup>40</sup>Kotiva quataa qua tihana nte mwi quara riaura nkyi timwa nyuqata nkye ni ru kyarerata uti variavo. Evarahaamuva hia nkye hiante hurave. <sup>41</sup>Nkye nkyeta sova varai kyaiqara nraahuma vare variavo, tiro. Mwitaa tuvata mwihuua tiqata, Hia tire kyapa nraative. Tiri tiqova mwiva Kotivave, tita.

<sup>42</sup>Tuvaro Iesusiva tiqaro, Kotiva nkyi sova varitirio, nte mwiva hinasaina tumu nkyivata mate mwaa varura nianra nkyi mwutukya ntihata variatirio. Hia nte ntenu vu nraato tukyena ntenu kyaiqa vararerana tumuvave. Kotiva ni titaihana tumuvave.

<sup>43</sup>Nte mwitaa tuqata nkye nanraqamave ni qua hia ntapihiavo? Kyaivaqe nte nkyi timwa nyiankye. Nkye nte tu quara hia riaahuama variavo.

**44** Saataaniva nkyi sova varihata nkye mwia mwutukya vahira nraahu utuqita vi variarave. Haaru vuniqama kyero Saataaniva variqaro vaisi rukye varuva nraahu varurave. Quttaaqama vahi inraikyavave, qutaa kyaiqavantove, hia mwiaqi vaharora tiro, mwiva hia qutaa qua ti varirave. Mwiva unra tiqaro unra qира mwia qova variqarora tiro, unra qua mwia nai qua tuananra tirave.

**45** Mwia kyaiqa mwitaama vahana nte qutaa qua tuqata nkye ni quara hia qutaa quave ti variavo. **46** Nkyiqitairo tavave nianra uaqiahi kyaiqara varaiho qiananro? Nkye hiama qio niqaa qua vatevarave. Nte qutaa qua ti varuqata nanraqamave nkye ni quara hia qutaa quvave ti variavo? Kyai nte nkyi timwa nyiankye.

**47** Kotira nraaqiaravanto Kotira qua rie varirave. Nkye hia mwia qua riaahuara titi, nkye hia mwia nraaqarama variavo, tiro.

### Evarahaamuva hia varuvana nte variavarave tura

**48** Iesusiva mwitaa tuvata Iutaa nronranramwuvanto tiqata, Tire iara Sameriaanyaava ueraqama viho turava, mwi quava qutaa quama vaiho, titi.

**49** Tuvaro Iesusiva qaqao tiro, Hiama nte ueraqama vuqo. Nte ntena kora nrutu tuaahere varuqatama nkye ni nutu qoraqama mateta hiavo.

**50** Qio hia nte ntena nrutuara nronraqama kyena riauqo. Ni nutu tuaaheraiva variho. Mwiva ntapihi kyero ko ti varivave. **51** Nte qutaa qua qianinra riaate. Ni qua riemwaqiro quariva hiama qutu quananrove, tiro.

**52** Iesusiva mwitaa tuvata Iutaa nronranramwuvanto tiqata, Mwitaa qiarata tire i taqaurara e ueraqama quaro. Tiri haivaqava Evarahaamuva variqiro viro uro qutu vurave. Poropeti vaisi mpohua mpohua variqita vita ekyaa qutu vurave. Mwihua ekyaa qutu quavara e tiqara, Ni qua riemwaqiro nrohiariva hiama qutu quananrove, qiaro. **53** Tiri tiqova Evarahaamuva nronra vaisivanto variqiro viro uro qutu vurave. E hia qio Evarahaamunranra tiqara, Nte mwia nraatara kyaarivave, tinanrave. Poropeti vaisinramwuvata nronra vaisi variqita vita uro qutu vurave. E nataa hira vaisiva varirera hiqarave mwitaa ti variaro? titi.

**54** Mwitaa tuvaro Iesusiva tiqaro, Nte ntena nrutu tuaahere variariovauma ni nutuvanto qumina vahiananrove. Ni nutu tuaahera kye variva, mwiva ni kovave. Nkye mwianrama Kotiva tiri mwanriqvanto variho qiarave.

**55** Nkye hia mwia ntapihiarave. Nte mwia ntapihurave. Nte tiqana, Nte hia mwia ntapihi kyaurave, qiarirovauma ni quavanto nkyi qua votima kyero unra qua vahiananrove. Qio nte Kotira ntapihina mwia qua riemwaqina vuvave. **56** Nte mwatani tuminrenra hiava entara nkyi haivaqava Evarahaamuva ni qamwata matorave. Nte mwatani tumuavararo mwiva ni taqovaro mwia mwutukyavanto kyuqe huvaro varurave, tiro.

<sup>57</sup>Iesusiva mwitaa tuvata Iutaa nronranramwuvanto tiqata, Qaqao, e hia 50 ihi vara kyaraitira, qaraakya vaisivanto variqarama nte nkyi haivaqara Evarahaamunra taqaurave tira hiaro, tita.

<sup>58</sup>Tuvaro Iesusiva tiqaro, Haaru nkyi haivaqava Evarahaamuva hia varu entara nte qati variqina quavavave, tiro. <sup>59</sup>Iesusiva mwitaa tuvata mwihua ori vara kyeta mwia ntututirerata huvaro Iesusiva tujeta kyero Kotira nraamwuqtairo veva ntero vurama.

### Vu qipa vu vaisira Iesusiva ntapairi mwatora

**9** <sup>1</sup>Iesusiva viqaro taqovaro vaisi mpovanto nai nronra vikyokyqaqitairo vu qipa vuva varura. <sup>2</sup>Mwia taqeta Jesusira nraaqiaranramwuvanto Jesusira kyapara hita tiqata, Mwaanra ti variarao, tava Kotira qua nteqa kyairaqaarave mwi vaisira vu nai nronra vikyokyqaqitairo qipa viho? Naive iho, mwia nrohua qohuave iho? tita.

<sup>3</sup>Mwitaa tuvaro Iesusiva qaqao tiro, Hiama nai Kotira qua nteqa kyairaqaarave, mwia nrohua qohua Kotira qua nteqa kyaaraqaarave, mwia vu qipa viho. Nkye mwi vaisiraqaataita Kotira kepukyavanto kyaiqa varaaninra taqaate tiro, mwia vu qipa virave. <sup>4</sup>Kotiva ni titaira kyaiqa tire qaataataaninraqa varaqita virerave. Entama viraro hia mpovanto qio kyaiqa varaananrove.

<sup>5</sup>Nte mwatani variqana nte omwavanto itaintema kyena itamwaqina quarita mwatani varihua qio taqevavarave, tiro.

<sup>6</sup>Mwitaa timwa kyero Iesusiva mwataqaa taara vihi kyero horaqama kyero viti vu qipa vu vaisira vuqaa taaqau mwatero tiqaro, <sup>7</sup>Uto Siromi Rumpuaqi. Titai Nramanrinraqi ena viri hiqaante, tiro. Mwitaa tuvaro mwi vaisiva Iesusiva tuntema kyero uro nai viri hiqama kyovaro mwia vu ntapairi vuvaro mwiva mwisairo uro ntantero qio taqamwaqiro nrinro.

<sup>8</sup>Mwiva qio taqamwaqiro nri varuvata mwia nraaqani varuhua taqovaro aanra tokyani variqaro mwitaa inraikya mpiae ti varu vaisiva qati nruvata mwihua mwia taqeta tiqata, Mwaa ta vaisivave iho? Mwiva aanra tokyani mwatakya viro variqaro mwitaa inraikya mpiae ti vari vaisiva, mwaa mwivave iho? tita.

<sup>9</sup>Tuvata mpo uhua tiqata, Qio mwia mwivave, tita. Tuvata mpo uhua qaqao nai mpo vaisi mwia viri voti hivama nriho tita. Tuvaro mwi vaisiva nri ntero nai tiqaro, Nte mwaa mwivama iho, tiro. <sup>10</sup>Mwitaa tuvata mwihua mwia kyapara hita tiqata, Nataama kyaararo i vu ntapairi viharave e taqaaro? tita.

<sup>11</sup>Tuvaro mwiva mwihua timwa nyinro tiqaro, Vaisi mpo mwia nrutu Iesusiva taara vihi kyero horaqama kyero ni puqaa taaqau matero nianra tiqaro, Siromi rumpuaqi uto ena viri hiqaante, tihana nte uto hiqama kyauqaro ni pu ntapairi vihanama nte qio taqamwaqina nruquo, tiro.

<sup>12</sup>Mwitaa tuvata mwihua mwia kyapara hita tiqata, Mwiva taini viharave nrianro? tita. Tuvaro mwiva tiqaro, Nai tainive viho? Hia nte mwia taqauqo, tiro.

<sup>13</sup>Tuvata mwihua haaru vu qipa vu vaisira mwia vitaqita uro Parisi vaisinramwuvanto varunani kyora. <sup>14</sup>Iesusiva mwaanra entaqaa hora taaqau kyero mwi vaisira vu ntapairi kyora.

<sup>15</sup>Mwihua Parisi vaisinramwu varunani mwia uro kyovata Parisi vaisinramwuvanto mwi vaisira kyapara hita tiqata, Nataama kyaiharove i vuvanto ntapairi viho? tuvaro mwiva tiqaro, Mwiva hora vara kyero ni puqaa taaqau taihana nte uto ntena piri hiqama kyauqaro ni pu ntapairi vihana nte qio taqauquo, tiro.

<sup>16</sup>Mwiva mwitaa tuvata Parisi vaisi hini uhua tiqatama, Mwi kyaiqara varalva mwaanraqa qua nteqeqaro varalvara tiro, mwiva hia Kotiva hinasaairo tumivave, tita.

Tuvata hini uhua tiqata, Qaqao, nataama kyerove uaqia hi vaisiva nronra kyaiqa mwia qio varaanarrove? tita. Mwitaa timwa kyeta mwihua nkyiari utaqaa ntainra vita taara qua ti varura.

<sup>17</sup>Qaiqaa Parisi vaisinramwuvanto mwia kyapara hita tiqata, E tiqara mwiva ni pu ntapairi kyaiho qiananrave. Mwi vaisirara e nanreve tinanrave? tuvaro mwi vaisiva tiqaro, Kotiva mwia kyaahaqa hi variharo mwiva mwi kyaiqara vare variho, tiro.

<sup>18</sup>Mwitaa tuvata Iutaa vaisinramwuvanto hia mwia quara quataave tiraitita, mwi vaisirara tiqata, E unra tiqarama ni pu ntapairi viho tira hiaro. Haaru hia i vuvanto qipa vurave, tita. Mwitaa timwa kyeta mwi vaisira nrohua qohua nyaanronra.

<sup>19</sup>Nyaanrovata nruvata mwitanahua kyapara hita tiqata, Mwaa vaisiva nkyitana nyaaquev iho? Qutaa mwia nai nronra vikyokyaqitairo vu qipa vurave? Nataama kyaiharove mwia vuvanto ntapairi viharo qio taqaiho? tita.

<sup>20</sup>Tuvata mwia nrohua qohua tiqatama, Mwaa vaisiva tiritana timwaaque. Mwia vuvanto haaru vikyokyaqitairo qipa vurave.

<sup>21</sup>Nai nataama kyaiharove mwia vu ntapairi viho? Nai tavave mwia vu ntapairi kyaiho? Mwiva nronra tuaivama iho. Nkye nkyeta mwia kyapara hiqata taqaivaro mwiva qiomma nkyita timwa nyiananrove, tita.

<sup>22</sup>Mwitanahua Iutaa vaisi nronranramwu nyaatu aatu hiqata mwitaa tura. Iutaa vaisi nronranramwuvanto vaakya qua timwa tetu tiqatama, Vaisi mpovanto Iesusirara mesaaavanto tiri kyaahaqa hiariva nrivave tirera, mwia kyaara tire mwia inronra hiqatama mwaanra nraamwuqitaita titamwa kyaararo veva ntero ekyararo quarive, tita.

<sup>23</sup>Mwitaa timwa kyeta qua timwa torara tita, mwia nrohua qohua Iutaa vaisi nronranramwu nyaatu aatu hita tiqata, Mwiva nronra tuairave. Nkyeta mwia kyapara hiqata taqaate, tura.

<sup>24</sup>Tuvata mwihua qaiqaa haaru vu qipa vu vaisira nraanrama kyeta tiqata, E Kotira vuqaa variqara quataa qua nraahu qianta. Tire taqauraro Iesusiva Kotira qua nteqa kyai vaisivave, tita.

<sup>25</sup>Tuvaro mwi vaisiva tiqaro, Iesusiva Kotira qua nteqa kyai vaisivave iho kyuqe vaisive iho nte hia mwia okyara ntapihi kyaquo. Ni pu qipa vura ntapairi kyaира mwia nraahuma ntapihuquo, tiro. Tuvata mwihua mwia kyapara hita tiqata,

<sup>26</sup>Mwiva i nataave iho? Mwiva nataama kyerove i vu ntapairi kyaiho? tita. Tuvaro mwiva tiqaro,

<sup>27</sup>Nte mwi quara vaakya nkyi timwa nyuqata nkye hiave ntapihiavo? Nanraqamave nkye mwi quara qaiqaa kyapara hiavo? Nkyevata mpo? Nkyevata mwia nraaqiara varireratave qaiqaa mwi quara ni kyapara hiavo? tiro.

<sup>28</sup>Tuvata mwihua mwia nronraqama kyeta inronra hita tiqata, Enama mwia nraaqiara variqara mwia qua riaaravave. Tire tetu haivaqara Mosesira qua riemwaqita vurahuave. <sup>29</sup>Kotiva Mosesirara qua timwa tora tire riemwaqita vunanrave. Iesusiva mwi vaisiva qumina vaisivantove. Tire hiama mwiva mwisairo nri okyarara ntapihuro, tita.

<sup>30</sup>Mwihua mwitaa tuvaro mwiva kyauqu ntukikinraaqata kyero tiqaro, Qikye, ni pu ntapairi matai vaisiva, mwiva mwisairo nri okyarara nkye hiave ntapihiavo? <sup>31</sup>Tire ntapihi kyaурaro Kotiva hia uaqia hi vaisira qua rie varirave. Kotiva nai qua rieqata nrohi varia vaisihua mwihua qua nraahu rie varirave. Mwia nrutu tuaahere variahua mwihua qua nraahu Kotiva rie varirave. <sup>32</sup>Haaru mwaa mwataro toharato entaraqaatairo hia vaisi mpovanto nai nronra vikyokyaqitairo vu qipa vura ntapairi kyorave. <sup>33</sup>Iesusiva hia Kotiva hinasairo tumiva hitirio, mwiva hiama qio ni pu ntapairi mataitirio, tiro.

<sup>34</sup>Mwi vaisiva mwitaa tuvata mwihua tiqatama, I mwataratoraataira e uaqia hiara vaisivama variqira nrianro. E mpo? E tirivata mwaanra qua timwa timwinrenrave hiaro? tita. Mwitaa timwa kyeta mwihua vaisi mwia ntanrauqita mwaanra nraamwuqitaita veva mwaatani tuto kyora.

#### **Kotirara hia quataave qiahua vu qipa vihua votima kyetama varita**

<sup>35</sup>Mwia tuto kyo quara riero Iesusiva mwi vaisira puaama kyero mwianra tiqaro, Mwatani mwatatai nraaqiara e quataa mwivaveve tira hiaro? tiro.

<sup>36</sup>Tuvaro mwi vaisiva kyapara hiro tiqaro, Nronrao, mwiva ta vaisivave iho? E ni timwa mpiraqena nte mwianra quataave qiankye, tiro.

<sup>37</sup>Tuvaro Iesusiva mwia timwa mwinro tiqaro, E taqe variara vaisiva, nte mwaa mwivama iara ti varuquo, tiro.

<sup>38</sup>Mwitaa tuvaro mwiva tiqaro, Nronrao, quataama e mwivave, tiro. Timwa kyero mwiva Iesusira vuqaa tori kyauru raviro mwia qamwata mwatero varura.

<sup>39</sup>Mwitaa huvaro Iesusiva tiqaro, Nte nraakye qora tukya hirera mwatani tumuvave. Vu qipa vihua qaiqaa taqaate tina, tumuvave. Qati taqe varihua su qipa quarive tina, tumuvave, tiro.

<sup>40</sup> Mwitaa tuvata Parisi vaisinramwuvanto mwi quara rieta Iesusira kyapara hita tiqata, Tiri tivuvatave qipa viho? tita.

<sup>41</sup> Tuvaro Iesusiva mwihua timwa nyinro tiqaro, Nkyi su qipa vihata variahua varivarovauma hia nkyiqa quavanto vahiananrove. Nkye ni okyara hia ntapihi kye taqaraitita, nkye tiqata, Tire Kotira okyara taqaunananrave, ti variarave. Mwitaa ti variarara tiro, mwia kyaara nkyiqa qua vahirove, tiro. Iesusiva mwitaa turama.

### Iesusiva sipisipiqa ntumwa kyero tura

**10** <sup>1</sup>Iesusiva mpo quaqaa ntumwa kyero timwa nyinro tiqaro, Nte quataa qua qianinra riaate. Vaisi mpovanto sipisipi vataa tutukyaraqi virero hia quesana vera ntaraitiro, tutukya mpona mwaati ntero vi vari vaisiva mwi vaisiva mpuara uti vaisivave, mpohua riqaro mwihuani mpuara vare vari vaisivama variho.

<sup>2</sup> Vaisi mpovanto sipisipi quesana vera nteqaro vi variva, mwi vaisiva quataa sipisipi qovama variho. <sup>3</sup>Qesaqaa vaimwanraanra ntaqikyi vari vaisiva mwia taqero qio qesa qatua mwataiharo mwiva nai sipisipiara aakyara nteqaro nai sipisipi nrutu ntamwaqiro vihata mwia sipisipinramwuvanto mwia qua ntapihi riaavarao mwihua sitero mwaaqani virave.

<sup>4</sup> Mwiva mwaaqani nai sipisipi uro kyero mwiva nraante vuni vi varihata mwia sipisipinramwuvanto nkyiari sora qua ntapihi kyeta rieqtara tita, mwia vataqita vi variarave.

<sup>5</sup> Mwia sipisipinramwuvanto hia mpo vaisi vataqita vivarave. Mwihua mpo vaisi qua hia ntapihi kyeta rieqtara tita, mwihua mwia nraatu aatu hiqata aatu vivarave, tiro.

<sup>6</sup> Iesusiva mwitaa timwa kyero sipisipiqa ntumwa kyero timwa nyuvata mwihua mwi quara okyara hia ntapihiraitita varura.

### Iesusiva nte kyuqema kyena sipisipiqa ntaqikyuvave tura

<sup>7</sup>Hia ntapihuvaro Iesusiva qaiqaa timwa nyinro tiqaro, Nte quataama tuquo. Nte sipisipi mwihua qesavantoma varuquo. <sup>8</sup>Ni puni nria vaisihua mwihua mpuara utuahuave, mpohua riqata mwihuani mpuara vare variahua variavata sipisipivanto hia mwihua qua riaarave.

<sup>9</sup> Utapi qua qesava ntema mwi qesava varuquo. Niqaamatero nritaraani vaisira ni kova mwia vitaananrove. Niqaamatero tumitare nritare hiariva kioma kyara puaama kyero nraananrove.

<sup>10</sup> Mpuara varai vaisiva mpuara vareqaro sipisipi ru taiqa kyarero nrinrave. Nte sipisipiara rieqanama sipisipi mwihua qati variqita viqatama kyuqema kyeta variate tina, nte nruvave.

<sup>11</sup> Nte sipisipi qova kyuqevave. Sipisipi qova kyuqeva variqaro nai sipisipi rukyevorave tiqaro antuaqiro viro kyai nte mwihuara rieqana qutu quankye timwa kyero qutirave.

<sup>12</sup> Mpowanto hia sipisipi qova, mwiva qati kyaiqa vaisivanto variqaro taqaiharo qaakyau vairivanto nrihanro mwiva aatu hiqaro qaqira kyero hiantero viharo qaakyau vairivanto sipisipi rukyero hini ru sata kyaihata mwihua nkyiariara nkyiariara mpona mpona quarave. <sup>13</sup> Mwia kyaiqa vaisivanto qati kyaiqa vaisivanto variqarora tiro, mwiva hia sipisipiara nronraqama kyero riaraitiro, aatu virave.

<sup>14</sup> Nte sipisipi qova kyuqevara variqana nte ntene sipisipi ntapihi kyauqata ni sipisipinramwuvanto nivata ntapihi kyeta taqaarave.

<sup>15</sup> Mwia votima kyero ni kova ni ntapihi kyaihana ntevata mwia ntapihi kyaurave. Qio ni sipisipi rukyevorave tina, nte mwihuara rieqana qutu virerave.

<sup>16</sup> Sipisipi mponramwu mwihua hia mwaa utaraqi varihua mwihuavata ni sipisipive. Mwihua ni qua riaivaqe nte mwihua sitaqina uro kyaarita ni sipisipi hini mwihuavata kuaaqi varivarave. Mwihua kuaaqi varivaqe nte mwihua sova kuaiqavanto nraahu varianinrave.

<sup>17</sup> Nte mwihuara rieqana qutu vina qaiqaa qati siquaninrave. Nte mwitaa hianinranra tiro, ni kora mwutukyavanto nianra vaiho. <sup>18</sup> Nte hia qiove qiaro mpovanto hiama qio ni rukyaananrove. Nte ntene qutu quataa hiraqena qutu quaninrave. Nte qutu quani okyararave, nte qaiqaa qati siquani okyararave, nina kyaiqa nraahuma vaiho. Ni kova nianra mwitaa mwitaa hiante ti quara, nte mwi quara vararerave, tiro.

<sup>19</sup> Mwitaa tuvata Iutaa vaisi nronranramwuvanto mwi quara rieta utaqaa ntainra vita hininramwu mpo qua tuvata hininramwuvanto mpo qua tura.

<sup>20</sup> Airivanto tiqata, Ueravanto mwiaqi variharo mwitaa tiho, Mwiva ueraqama viho. Nanraqamave nkye mwia qua riaavo? Hia mwia qua riaate, tuvata <sup>21</sup> mponramwuvanto tiqata, Qaqao, ueraqa hiari vaisiva hiama qio mwi quara qiananrove. Ueravanto hiama qio vu qipa quani vaisira ntapaira kyaananrove, tita. Mwitaa tura.

### Iutaa vaisi nronranramwuvanto qaiqaa Jesusira ru kyarerata uti varura

<sup>22</sup> Ierusaremini omwata mpo nro entava nri ntora. Kotira nraamwu qamwata mwato omwatava vahuvaro huarivanto hia nronraqama kyero ite varu entaraqaa mwi omwatara nronra.

<sup>23</sup> Mwi entaraqaa Jesusiva Kotira nraamwu nronraqi variqaro mpo rumuqi mwia nrutu Soromoninra rumuqi nrohi varuvata

<sup>24</sup> Iutaa vaisi nronranramwuvanto mwipi ntuvantua vita Jesusirara tiqatama, E mpo qua vaakya tiri timwa timwiataarave. Taireve tiri timwa timwinanrave? E mesaiaavanto varirera, vutu kyera timwa timwinraqe tire riaare, tita.

<sup>25</sup> Tuvaro Jesusiva tiqaro, Nte vaakya nkyi timwa nyuqata nkye hia ni quara quataa quave qiavo. Ni kova ni nronraqama kyaihana nte mwia

kyaiqa vare varurave. Qio nte varau kyaiqava ni okyarara ntapihima ti variho. Nkye ni kyaiqa taqaarara rieqata ni okyarara ntapihiataarave.

<sup>26</sup> Nkye hia ni sipisipi variqtara tita, nkye hia ni quara quataave tivarave. <sup>27</sup> Nte ntena sipisipi ntapihi kyaurave. Mwihua ni qua rieqatama ni pataqita nrohi varivarave. <sup>28</sup> Nte ekyaa enta qati variqi vira nyianrita mwihua hia qutu vivarave. Hiama mpovanto ni kyauquqitairo ni sipisipi ntavihi kyero varaananrove.

<sup>29</sup> Ni kova ni sipisipi mpitaiva, mwiva peqavanto ekyaa inraikya nraataraira variqaro ni sipisipiqa ntaqikyi variharora tiro, hia mpovanto mwia kyauquqitairo qio ntavihi kye varaananrove.

<sup>30</sup> Ntevata ni kovavata kuaikuvantoma varuro, tiro.

<sup>31</sup> Jesusiva mwitaa tuvata Iutaa vaisi nronranramwuvanto mwia ru kyaare tita, ori tu varovaro <sup>32</sup> Jesusiva tiqaro, Nte ni kora kyuqe kyaiqa, mpo kyaiqa mpo kyaiqa nkyi nyaamwutauqata nanra kyaiqa varaura kyaarave nkye niqaa ori tuto kyarerata uti variavo? tiro.

<sup>33</sup> Tuvata Iutaa vaisi nronranramwuvanto tiqata, Tire hia i kyaiqa kyuqera kyaara i ru kyarerave. E Kotirara qora qua qiaro. E qati vaisivanto variqarama Kotikyantiri kuaaqaa varirera uti variaro. Mwia kyaarama tire ori vara kyeta i ru kyarerave, tita.

<sup>34</sup> Mwihua mwitaa tuvaro Jesusiva tiqaro, Nkye Kotira mpuku vataaraqi qua mpo qara ntumwa tova vaiho. Nkye hiave mwi quara taqaavo? Kotiva vaisi mpo uhuara mwitaama tiro: Nkye mwanriqvantove, turave.

<sup>35</sup> Tire ntapihi kyauraro Kotira qua hia unra qua vahirave. Kotiva nai qua tu vaisihua qati qumina vaisiara mwanriqvantove turave.

<sup>36</sup> Qio Kotiva ni mwatama kyero ni titaihana nte mwatani tumu variqanama nkyiara nte mwanriqa Kotira mwaaque tuqata nkye tiqata, Kotirara qora qua qiaro, qiavo.

<sup>37</sup> Nte hia ntena kora kyaiqa varaaritavauma nkye hia nianra quataa mwivave tivarave. Nte ntena kora kyaiqama vare varuquo.

<sup>38</sup> Nkye hia nianra nronraqama kyeta riaivera, nkye nte kyaiqa vare varianinranra nronraqama kyeta rieqatama nianra quataa mwivave qiate. Nkye mwitaa tivarо nkyi su nyaato ntapihirata nkye ni kova niqi varirara ntapihivarave. Nte mwiaqi varianinranra nkye ntapihivarave, tiro.

<sup>39</sup> Mwitaa tuvata mwihua qaiqaa mwia karavu hirera uti varuvaro Jesusiva veva ntero viro.

<sup>40</sup> Veva ntero vuva uro Iotaani nramanri hini tokyani Ioniva tauraa variqaro nramanri nyunani uro varura. <sup>41</sup> Varuvata airi nraakye qoravanto mwiva varunani nri nteta tiqata, Ioniva hia nronra kyaiqa varova variqaro Jesusirara tiri timwa timwunrave. Qio tire taqauraro Ioniva quataa qua mwaa vaisirara timwa timwunrave, tita. <sup>42</sup> Mwitaa timwa kyeta mwini varuhua airivanto Jesusirara quataa mwivave tura.

### Rasarusiva qutu vura

**11** <sup>1</sup>Vaisi mpovanto mwia nrutu Rasarusiva Vetaaninyaava nronraqama kyero nriqa vuvaro varuvata mwia nruratana Mariaavavata Mataavavata mwini varura.

<sup>2</sup>Mariaava vahamwenra kyuqera Jesusiraqaa qu mwatero nai qiata kyaahiqotairo mwia kyuqu nruka mwataariva varura.

Mwi nrunre nrakyetana variqata taqovaro mwihua sakyavaa nriqa vuvaro varuvata <sup>3</sup>mwitanahua vaisi mpo titeta Jesusirara uro mwitaama qianta tita, Nronrao, i mwutukya nti vaisiva nronraqama kyero nriqa viharo variho qianta, tita.

<sup>4</sup>Mwitanahua mwitaa timwa kyeta titovaro vevani uto timwa mwuvuaro Jesusiva mwi quara riero tiqaro, Rasarusiva nronraqama kyero nriqa viharo variho. Qio mwiva hiama qutu quananrove. Nkye Kotira kepuyla taqaate tiro, mwia nriqa viharo variho. Ni Kotira mwaaku ni peqa okyara taqaate tiro, mwia nriqa viho, tiro.

<sup>5</sup>Iesusiva Mataaararavata mwia nrurranravata Rasarusiraravata mpoqama kyero mwutukya ntua variqaro <sup>6</sup>mwi quara rierovata hia qamwanrama viraitiro, qaqlira kyero taara entavata mwini varura.

<sup>7</sup>Vari kyero mwiaqatairo nai nraaqiaranramwuanra tiqaro, Qio varaivaqenramwu tumu ntante Iutiaani quare, tiro.

<sup>8</sup>Tuvata mwia nraaqiaranramwuvanto qaqlira tita, Mwaanra ti variara, nanauma Iutaa vaisi nronranramwuvanto ori vara kyeta i ru kyarerata uturave. E qaiqaa mwini tumu ntantera virerarave hiaro? tita.

<sup>9</sup>Tuvaro Jesusiva tiqaro, Mpo enta mpo enta huarivanto ihera qio itairave. Vaisivanto qaataitalaqaa nrohi variva huarivanto itairaqqaa nrohiqaro aanra qio taqebaro hia huntavaivaimaqiro kyaamwu ntirave. <sup>10</sup>Huarivanto hia itaiharo entaqi nrohi variva huntavaivaimaqiro kyaamwu nti varirave, tiro.

<sup>11</sup>Mwitaa timwa kyero Jesusiva qaiqaa tiqaro, Tiri toti Rasarusiva vaitama viho. Nte uro mwia vaurama kyarerave, tiro.

<sup>12</sup>Mwitaa tuvata mwia nraaqiaranramwu tiqata, Nronrao, mwiva qati vaite varirera, mwiva qioqa hiananrove, tita.

<sup>13</sup>Mwitaa timwa kyeta mwihua hia ntapihuvaro Jesusiva mwi quaraqaa ntumwa kyero Rasarusiva qutu vurara tura. Mwihua tiqata, Jesusiva Rasarusirara qati vaitairarama tiho, tita.

<sup>14</sup>Mwitaama rieqata varuvaro Jesusiva vutu kyero timwa nyinro tiqaro, Rasarusiva qutuma viho. <sup>15</sup>Qio nte nkyiara rieqanama nkye nianra qutaa mwivave qiate tina, nte Rasarusira hia qamwanrama uro taqaurara qamwateqama varuquo. Qio varaivaqenramwu mwiva qutu vinani quare, tiro.

<sup>16</sup>Tuvaro mwia nraaqiara mpovanto Tomaasiva, mwia mpo nrutu Kaapiva, mwiva nai hena vaisinramwuanra tiqaro, Qio varaivaqenramwu

mwaanra ti vari vaisiravata quare. Iutaa nronranramwuvanto mwia ru kyaivaqe tirenramwuvata mwia vatama kyeta qutu quare, tiro.

**Nraakye qora qutu quahua qati vara sivuma  
kye varuva nte mwaa mwivave, tura**

<sup>17</sup>Tuvaro Jesusiva vuva uro ntero riovata Rasarusira quntamwa tovaro erahiamuaantema enta nritarora.

<sup>18</sup>Vetaani Ierusaremi qaumato 3 kiromitaa votima mwiaqaatairo vahuvaro <sup>19</sup>Ierusaremisaita mwi mwatanaahua airivanto Mariaaravata Mataaravata mwutukya qihaakyama nyateqata Rasarusirara ntatarerata nrunra.

<sup>20</sup>Nri varuvaro Mataava riovoro Jesusivavata mwisairo aanrani nri varuvaro mwiva Jesusira huntu kyarero viqaro Mariaara nraamwuqi kyero vuva uro ntero <sup>21</sup>Iesusirara tiqaro, Nronrao, e mwaini variaratiri, ni pakyaava hiama qutu vitirio. <sup>22</sup>Qio mate e Kotirara mpo inraikya mpo inraikyara nyaanru tiraro Kotiva mwi inraikyara qiomia i mwiananrove. Nte mwia ntapihi kyauqo, tiro.

<sup>23</sup>Tuvaro Jesusiva mwia timwa mwinro tiqaro, I vakyaava qatima siquananrove, tiro.

<sup>24</sup>Tuvaro Mataava tiqaro, Qio ekyara entaqaa mwiva ekyaa nraakye qora kyapata siquananrove. Nte mwia ntapihi kyauqo, tiro.

<sup>25</sup>Tuvaro Jesusiva tiqaro, Nraakye qora qutu quahua qati vara sivuma kye varuva, nte mwaa mwivave. Nraakye qora qati variqi vi varia inraikyara nyi varuva nte mwaa mwivave. Nianra qutaa mwivave qiariva qutu viro mwiqitairo qati variqiro quananrove.

<sup>26</sup>Qati variqiro viqaro nianra qutaa mwivave qiariva hiama qutu quananrove. E mwianra qutaaveve tira hiaro? tiro.

<sup>27</sup>Tuvaro Mataava tiqaro, Qutaama tira hiaro. Mesaiaa Kotira maaquvanto mwatani tuminrenra hiarava, e qutaa mwivama hiaro, tiro.

**Iesusiva Rasarusirara ntatora**

<sup>28</sup>Mwitaa timwa kyeru Mataava nrumu ntantero uro nai nrunra tirema kyeru timwa mwinro tiqaro, Mwaanra ti vari vaisiva nri ntaiho. Mwiva iara kyapara iho, tiro. <sup>29</sup>Tuvaro Mariaava mwi quara riero siviro hiantero uro Jesusira huntu kyarero viro.

<sup>30</sup>Iesusiva vaakya Mataava uro qua mwantonani variqaro hia mwatukyani nri ntovaro <sup>31</sup>Mariaava mwia huntarero uvata Iutaa nraakye qora mwia mwutukya qihaakyama mwatarerata nruhua taqovaro Mariaava nraamwuqitairo hiantero uvata mwihua tiqata, Qio mwia quntamwa taanani ntatareraro virerove, timwa kyeta mwihuavata sivita Mariaara vata vareta vura.

<sup>32</sup>Mwihua Mariaara vata vareta uvavar Mariaava vuva Jesusiva hunani uro ntero Jesusira taqero uro mwia vuqaa tumu ntiro variro tiqaro, Nronrao, e variaratiri, hiama ni pakyaava qutu vitirio, tiro.

<sup>33</sup>Tuvaro Jesusiva taqovaro mwiva ntate varuvata Iutaa nraakye qora Mariaaravata nruhua mwihuavata ntate varuvaro Jesusira mwutukyavanto qoraqama kyero nraamwunruqa tovaro mwiva po kye tiro tiqaro, <sup>34</sup>Mwia taraqive quntamwa teta hiavo? tuvata mwihua tiqata, E nrinra uro taqaante, tuvaro <sup>35</sup>Iesusiva ntate varura.

<sup>36</sup>Ntate varuvata Iutaa nraakye qoravanto tiqata, Qio taqaate. Mwiva mpoqama kyero Rasarusirara mwutukya ntiharo variho, tita.

<sup>37</sup>Tuvata mponramwuvanto tiqata, Mwiva vu qipa vi vaisiravata qio ntapairi kye varivave. Iesusiva mwaini varitirio, Rasarusiva qutuve vitirio, hiave putu vitirio? tita.

### Iesusiva Rasarusira sivuma kyora

<sup>38</sup>Tuvaro Jesusira qaiqaa ua huvaro mwiva mwia quntamwa tonani vura. Mwihua ori vaurutoraqi Rasarusira veta vateta ori mpo vara kyeta gesana tita torara tiro, Iesusiva tiqaro, <sup>39</sup>Ori mwia qatinani vara kyaate, tuvaro Mataava qutu vu vaisira nrunravanto qaqao tiro, Mwia quntamwa taavaro erahiamuaantema enta nritaraiharo ntera viva mwuntama quananrove, tiro.

<sup>40</sup>Tuvaro Iesusiva Mataarara tiqaro, Nte vaakya i timwa mwu quarara riaante. E nianra qutaa mwivave tirera, e Kotira peqa taqenanrave turave. Hiave nte vaakya iara mwitaa tina huqo? tiro.

<sup>41</sup>Tuvata mwihua ori qatinani venta kyovaro Iesusiva virini taqero tiqaro, Ko, e nte tu quara rie variananra nte mwianra kyuqeve tuqo. <sup>42</sup>E ekyaa enta ni qua rie variananra nte ntapihi kyaurave. E ni titaananranra nraakye qoravanto ntapihiate tina, nte mwihuara rieqanama iara aakyara tuqo, tiro.

<sup>43</sup>Iesusiva mwitaa timwa kyero mwiva aakyara ntero tiqaro, Rasarusio, sivira veva ntaante, tuvaro <sup>44</sup>Rasarusiva qutu vuva qati siviro mwia kyuqu kyauqu ququtama teta mwia qiatavata tavunaqo qapuqamatova mwiqitairo veva ntero. Veva ntovaro Iesusiva mwihua timwa nyinro tiqaro, Mwia huvantu kyaivaro qati quarive, tura.

### Iutaa nronranramwuvanto Iesusira ru kye quara tura

(Matiu 26:1-5; Maaki 14:1-2; Ruku 22:1-2)

<sup>45</sup>Tuvata Iutaa nraakye qora airivanto Mariaara taqarerata nruhua mwi kyaiqara taqeta Iesusiva qio qutaa mwivave, tita.

<sup>46</sup>Tuvata mponramwuvanto qaqlira kyeta Iesusiva mwi kyaiqara varorara uro Parisi vaisinramwu timwa nyuvata <sup>47</sup>Parisi vaisinramwuvata, Kotira kyaiqa vara mwate varu vaisihua mwihua nronra vaisinramwuvata, mwihua nkyiari kaanasori vaisi kyapata ntuvaantuama vita tiqata, Mwi vaisiva mpo kyaiqa mpo kyaiqa nronra kyaiqa vare variho. Qikye, tire mwia nataamave kyaananrave? <sup>48</sup>Tire

mwia qati kyaarerera, mwiva mwitaamaqiro virata ekyaa nraakye qora mwianra qutaa mwivave tivarave. Mwihua mwitaa tivata tiriqa ntaqikyi variahua Romenivanto tiri ntaqiqata Kotira nraamwu ntapairi kyeta tiri nraakye qora ekyaa ru taiqa kyevarave, tita.

<sup>49</sup>Tuvaro mwi vaisinramwuhuaqitairo mpovanto mwia nrutu Kaiapaasiva siviro. Kaiapaasira mwia nronraqama kyovaro mwi ihiraqi Kotira kyaiqa vara mwate varu vaisihuqa ntaqikyiqaro vunyaa vaisivanto varuva, mwiva siviro tiqaro, Hia nkye vu nraatovata vahihuave. <sup>50</sup>Romeni mwatanaahua tiri ekyaa ru taiqa kyevorave. Tiri kyaahaqa hirero vaisi kuaiqavento nraahu qutu viraro kyuqe hiananrove, tiro.

<sup>51</sup>Kaiapaasiva mwi quara tiqaro nte ntene nraato tukyena tuqo, tiro. Mwiva hia ntapihi kyovaro Kotiva mwia kyaahaqa huvaro mwiva Jesusiva Iutaa nraakye qorara rieqaro qutu quaninranra tura. <sup>52</sup>Iesusiva hia Iutaa mwatanaahuara nraahu rieqaro qutu quariva varura. Kotira nraaqiara ekyaa mpoqi mpoqi apiqama varihua mwihuavata sita kyero uro kuaaqi ntuvantuuma tarero Jesusiva qutu quariva varura.

<sup>53</sup>(Kaiapaasiva tiqaro, Vaisi kuaiqavento tiri Iutaa kyaahaqa hirero qutu viraro kyuqe hiarive, tuvata) mwi entaraqaataita Iutaa nronra vaisinramwuvanto Iesusira rukyerara timwaqita vura. <sup>54</sup>Mwitaa ti varuvarora tiro, Jesusiva Iutaa mwatani hia qoqaa nrohiraitiro, qaqlira kyero uro Eparaimi mwatukya qumina mwata tokyani uro nai nraaqiaranramwu kyapata varura.

<sup>55</sup>Mwini varuvaro Iutaavanto vekeyahu nyato kyarara omwata nro entava qaumaqa huvata hisai hisaita nraakye qora verara nronra mwatukya Ierusaremini nraahu vura. Mwini uro variqata nronra enta mwia vekeya variqata mwihua nkyiari mwaanra qua rieqata nramanri ntumwa kyeta tuapakaara hiqama kyeta varura.

<sup>56</sup>Mwihua mwini variqata Iesusirara aitutumaqita nrohiqata uro Kotira nraamwu nronra nraamwuqi ntuvantuuma vita nai kyapara hi nai kyapara hita tiqata, Jesusiva qiove nrumu omwata nraananrove? Mwiva aatu hiqaro hiave nriananrove? tita.

<sup>57</sup>Mwitaa ti varuvata Parisi vaisinramwuvantovata, Kotira kyaiqa vara mwate varu vaisihua mwihua nronranramwuvantovata, mwihua nraakye qora timwa nyita tiqata, Nkye taqaivaro Jesusiva nrinrenra nkye nrumu tiri timwa timwivae tire mwia rupaqi karavuqi kyaare, tura.

**Mariaava Iesusiraqaa mwunta vu vahamwenranra qu mwatora**  
(Matiu 26:6-13; Maaki 14:3-9)

**12** <sup>1</sup>Vekyahu nyato kyarara omwata nro entava qaumaqa huvaro <sup>6</sup> entanramwu qati vahuvaro Jesusiva qaiqaa Vetaani mwini Rasarusiva varunani vura. Rasarusira mwia haaru qutu vura Jesusiva qaiqaa qati sivuma kyo vaisiva varura.

<sup>2</sup>Mwini vuvata mwi mwatanaahua Iesusirani kyara uta mwatovaro Mataava mwi kyarara varaqiqaro uro nyuvaro Rasarusiva Iesusikyantiri kyara tainta mwia tataaqa mwatakyaa viro varura.

<sup>3</sup>Varuvaro Mariaava taqu mpo varero nrunra. Mwi taquraqi nronra munima kyo vahamwenranra mwia nrutu *naanti* vahuvaro Mariaava mwi taqura varero mwi vahamwenranra Iesusira kyuquqaa qu mwatero mwiaqaatairo nai qiata kyaahiqotairo Iesusira kyuqu nruka mwatovaro vahamwenra kyuqe hu mwuntava nraamwu mwia piqa kyora.

<sup>4</sup>Piqa kyovaro Iesusira nraaqiaranramwuqitairo mpovanto Iutaasi Isikeriotiva Iesusira qovarama kyaariva, mwiva qaqao tiro, <sup>5</sup>Mwi vahamwenranra mpohua nyinro munima 300 kinaa vara kyero mwi munimanra vehi nraakye qora nyiataara vaiharoma, qumina i kyuquqaa qu mwatero iho, tiro.

<sup>6</sup>Iutaasiva hia vehi nraakye qorara riaraitiro, mwiva mpuara vaisivanto variqarora tiro, mwitaa tura. Mwiva Iesusira nraaqiaranramwu munima tuaqa ntaqikyiqaro mwi tuaraqitairo tuqeta kyeqaro mwinramwuhua munima mpuara vare varura.

<sup>7</sup>Iutaasiva tiqaro, Munima mwia vehi nraakye qora nyiataara vaiharoma qumina i kyuquqaa qu mwataiho, tuvaro Iesusiva tiqaro, Hia mwi nraakyera antuaante. Mwiva vahamwenra niqaa qu mateqaro ni quntamwa te entarara ni mamanta terama mate variho.

<sup>8</sup>Vehi nraakye qora mwihua ekya entama nkyivata variqita vivarave. Nkye qati entaqaa mwihua qio kyaahaqa hivarave. Nte hiama nkyivata ekya enta variqina quaninrave, tiro.

### Nronra vaisinramwuvanto Rasarusiravata ru kyarerata uti varura

<sup>9</sup>Iesusiva mwitaa timwa kyero varuvata Iutaa airivanto riovoro Iesusiva Vetaani mwini varuvata mwihua Iesusiravata Iesusiva qati sivuma kyo vaisira Rasarusiravata taqarerata uto Vetaanini kuaira hita varura.

<sup>10-11</sup>Iutaa airivanto Rasarusira qati sivuma kyorara rieqatama nkyiari nronra vaisinramwu qaqlira kyeta uto Iesusirara qutaa mwivave ti varuvata mwia kyaara Kotira kyaiqa vara mwate varu vaisihua mwihua nronranramwuvanto Rasarusiravata rukye quara ti varura.

### Iesusiva ntonki mwoqaqa mwaari ntero Ierusaremipi vura (Matiu 21:1-11; Maaki 11:1-11; Ruku 19:28-40)

<sup>12</sup>Mwia qanranraa nraakye qora airivanto vekeyahu nyato kyarara nranrenrata nruhua riovoro Iesusiva Ierusaremianra aanrani nri varura.

<sup>13</sup>Nri varuvata mwihua mwia qamwata mwatarerata qatokya mwanre voti hora teqa vareta Iesusira huntu kyarerata viqatama mwihua aakyara nteta tiqata,

Kyai mwia nrutu tuaaheraare.

Nronravanto nai nrutuqa nri vari vaisira  
kyuqema mwataih.

(Sng 118:26)

Tiri Isareriqaa ntaqikyi vaisira

Kotiva kyuqema mwataih, tita.

<sup>14</sup>Mwihua mwitaa timwaqita vuvaro Iesusiva qaraakya ntonki puaama kyero Kotira mpukuqi tuntema kyero mwia mwoqaqa mwatakyaa viro variro Ierusaremipiara viro.

Haaru Kotira mpukuqi mwianra mwitaama tiro:

<sup>15</sup>Saioniqinaahua (Ierusaremipiara),  
nkye hia aatu hiate.

Taqate, nkyiqa ntaqikyiariva nriqanroma mwiva  
qaraakya ntonki mwoqaqa nri variho, tura.

(Sek 9:9)

<sup>16</sup>Mwi quava mpukuqi vahuvata mwi entara Iesusira  
nraaqiaranramwuvanto hia mwi quara okyara ntapihura. Nraakiara  
Iesusiva qutu viro qaiqaa sivu entaraqaa mwi quava mwihua nyaatoqi  
ntumwa vuvata mwihua tiqata, Mwi quava Iesusiva ntonki mwoqaqa  
Ierusaremini vurara turave, tura.

<sup>17</sup>Iesusiva Rasarusira oriqi quntamwa toraqitairo nraanrama kyero  
mwia qati vara sivuma kyovata nraakye qora mwini Jesusiravata varuhua  
mwi kyaiqara taqeta mpohua mpohua timwa nyuvata <sup>18</sup>mviaqaataita  
nraakye qora airivanto Iesusiva nronra kyaiqa mwia varorara rieqata  
Iesusira uto huntu kyora.

<sup>19</sup>Mwihua Iesusira qamwata mwatarerata vuvata Parisi vaisinramwu  
nai timwa mwi nai timwa mwi hita tiqata, Qio taqate. Tire hiama qio  
mpo qara hiara aanrava vaiho. Ekyahua mwia nraahuma vataqita vi  
variavo, tura.

### Kirikiqinaahua mponramwuvanto Iesusira uro taqora

<sup>20</sup>Kiriki mponramwuvanto (mwihua Iutaa mwaanra qua riohua)  
mwihuavata mwi omwatara nreqatama Kotira nrutu tuaahererata  
Ierusaremini uro varura.

<sup>21</sup>Uro variqata mwihua Iesusira nraaqiara mpo Piripira Vetasaitaa  
mwatukya Karirinyaanranra tiqata, Tiri vaisio, tire Iesusira taqarerave,  
tuvaro <sup>22</sup>Piripiva uro Entururavata timwa mwinro mwiva vatama kyero  
uro Iesusira timwa mwunra.

<sup>23</sup>Timwa mwuvaro Iesusiva tiqaro, Nte mwatani mwatatai  
nraaqiaravave. Ni nutu nronraqama quari entava nri ntaiho.

<sup>24</sup>Nte qua qianinra riaate. Uiti uru hia mwataqi vara tutairaro uiti uru  
mwiqiava nanrianraa vahiananrove. Uiti uru mwataqi vara tutairaro  
ntuko hiro turu vera kyairaro mwiaqaatairo uru mwiva taiqa quananrove.  
Uru mwiva taiqa viraro uiti mwiva qupiqebaro airi tamwa riaananrove.

<sup>25</sup> Qio vaisi mpovanto mwaa mwataraqaa nai qati variqiro quaninranra nraahu nronraqama kyero riemwaqiro quariva, mwiva ekyarama qutu quananrove. Vaisi mpovanto hia nai mwaa mwataraqaa qati variqiro quaninranra nronraqama kyero riemwaqiro quariva, mwi vaisiva ekyaa enta qatima variqiro quananrove.

<sup>26</sup> Tahuave ni kyaiqa varaataa hiarihua, mwihua qati varivorare. Mwi vaisihua ni pataqita nriate. Mwihua mwitaa hiqata nte varianinrani mwihuavata varivarave. Mwihua mwitaama kyeta ni kyaiqa vara mate varivaro ni kova mwihua nyutu nronraqama kyaananrove.

### Iesusiva nai qutu quaninranra tura

<sup>27</sup> Qio mwaa entara ni mutukya uaqia ihana varuqo. Ntena korara nanra quave qianinrave? Ko, mwi entava nri ntaankyora mwi entara qaqira kyaante. Mwitaave Kotirara qianinrave? Qaqao, nte hia mwitaa tirerave. Nte mwi entarara rieqana tumuvave. Mwi entaraqaa nte atura ntumwaqina quankye timwa kyena tumuvave.

<sup>28</sup> Ko, e ena nrutu nronraqama kyaante, tiro. Iesusiva mwitaa tuvaro nyaamwusairo quavanto tiqaro, Nte ntena nutu nronraqama kyauqo. Qaiqaavata nronraqama kyarerave, tiro.

<sup>29</sup> Tuvata nraakye qora ntuvantuama vita mwini sivita varuhua mwi quara rieta tiqata, Nyaanruva nruqua tiho, tuvata hini uhua tiqata, Qaqao, nyaamwunyaa vaisivanto mwiavata qua tiho, tita.

<sup>30</sup> Tuvaro Iesusiva tiqaro, Hia mwiva nianra rieqarovauma qua tiho. Mwiva nkyiara rieqaroma qua tiho. <sup>31</sup> Qio mwaa entara mwatani varihua ko qiani entarave. Mwaa entara mwatani variahuaqaa ntaqikyi varira Saataaninra peqaa ntuvuraa kyaani entarave. <sup>32</sup> Mwatasaita ni tuaahera kyaivaqe nte variqana ekyaa nraakye qora ntanrau kyaarita mwihua nte hianinrani nraahu nrivarave, tiro. <sup>33</sup> Iesusiva mwi quara tiqaro nai qutu quaninranra timwa nyunra.

<sup>34</sup> Mwitaa tuvata mwini ntuvantuama vuhua qaqao tita, Kotira mpukuqi qara ntumwa tova tiqaro, Kotira kepukya vaisi mesaiaavanto ekyaa enta qati variqiro quananrove, turave. Nanraqamave e tiqara, Ni mwatani mwatatai nraaqiarara tuaahera kyeverave, qiaro? (E ena qutu vinanranra qiana quara hia ntapihuro.) E tiqara, Ni mwatani mwatatai nraaqiaravave, qiananrave. E ta vaisivave hiaro? tita.

<sup>35</sup> Tuvaro Iesusiva tiqaro, Pataqia omwavanto nkyi kyapata variqaro itamwaqiro quananrove. Kyokiraqi nrohiva hia nai vi aanranra ntapihirara tita, nkye kyokira ruquankyo tita omwavanto qati ite variani entaraqaa nrohiqata variate. <sup>36</sup> Omwavanto qati vahiani entaraqaa nkye mwi omwanranra qutaa mwivave timwa kyeta, mwianra riemwaqi viqatama nrohiate. Mwitaa tiqatama nkye omwa nraaqiara variqatama nkyevata omwavanto itaintema kyeta itamwaqita vivarave, tiro.

Iesusiva mwi quara timwa kyero mwiaqaatairo uro hia mwihua suqaa variraitiro, uqeta varura.

### **Iutaavanto Iesusirara hia quataave tura**

<sup>37</sup>Iesusiva mwihua suqaa variqaro nronra kyaiqa varovata mwihua taqetavata mwihua qaqlira kyeta hia mwianra qutaa mwivave tuvarora tiro, <sup>38</sup>mwi entara Aisaiaava haaru tu quava qutaa vahura. Haaru Kotiva vaisi mpo Aisaiaara kyaahaqa huvaro Aisaiaava poropeti vaisivanto variqaro qumina vakya mwaa quara vutu kyero tiqaro,

Nronrao, tavave tiri quara quataave tiho?

Hia mpovantovata quataave tirave.

Nronravanto nronra kyaiqa vara kyaiharo tavave mwia kyaiqa ntapihi taqaiho?

Hia mpovantovata ntapihi kyero taqaiho, tura.

(Ais 53:1)

<sup>39</sup>Aisaiaava mwitaa turara tita, mwihua hia Iesusirara qutaa mwivave tura. Aisaiaava qaiqaa mesaia mwianiaro tiqaro,

<sup>40</sup>Mwi vaisihua uaquia hi aanranra qaqlira kyeta nianra tiri kyaahaqa hiante tivorave timwa kyero, Kotiva mwihua su nyaato tita kyaihata mwihua hia vuqotaita qio taqeta, mwihua hia nraatoqotaita qio riaavo, tura.

(Ais 6:10)

<sup>41</sup>Aisaiaava haaru variqaro Iesusira peqa okyara taqebarora tiro, mwiva mwianra qua timwa nyunra.

<sup>42</sup>Mwi entara lutaan nronra vaisinramwuqitaita mponramwuvanto tiqata, Qutaama Iesusiva mwivave, tita. Mwihua mwitaa tiqata mwihua Parisi vaisi nyaatu aatu hita qaqlira kyeta hia qoqaa variqata mwi quara tita. Mwaanra nraamwuqitaita veva nteta quate tivorave tita, hia mwihua qoqaa variqata mwi quara tura.

<sup>43</sup>Qati vaisivanto qamwata nyaterara nraahu mwihua nronraqama kyeta rieqatama hia Kotiva qamwata nyataaninranra nronraqama kyeta riora. Mwihua mwianra nraahu riouhuara tita, mwihua hia qoqaa Iesusirara qutaa mwivave tura.

### **Iesusiva tu quava vaisi ko qiananrove tura**

<sup>44</sup>Iesusiva paatiro timwa nyinro tiqaro, Nianra qutaa mwivave qiariva hiama nianra nraahu quataave qiananrove. Mwiva ni titairaravatama quataave qiananrove.

<sup>45</sup>Vaisivanto ni taqebaro ni titairavatama taqaananrove.

<sup>46</sup>Nianra qutaa mwivave qiariva kyokiraqi nrohiankyo tina, nte omwa votima kyena itamwaqina virera mwatani tumuvave.

<sup>47</sup>Nte hia mwatani varihuaqua qua vatarerana tumuvave. Mwatani varihua kyuqema variate tina, nte tumuvave. Ni qua riero nteqa kyaariva variraqe hia ntevauma mwiaqaa qua vataaninrave.

<sup>48</sup> Ni qoririma mataani vaisiraqaave, ni qua nteqa kyaani vaisiraqaave, hiama nte qua vataaninrave. Nte timwa taani quava, mwivama ekyara entaqaa variqaro mwiaqaa qua vataaananrove.

<sup>49</sup> Nte hia ntene nraato tukyenavuma qua nkyi timwa nyuquo. Ni kova mwitaa mwitaa qiente timwa kyero ni titaihana nte mwia qua nkyi timwa nyuquo.

<sup>50</sup> Nte ntapihi kyauqaro ni kora qua riaariva ekyaa enta qati variqiro quananrove. Qio ni kova mwitaa mwitaa qiente ti quara, nte mwi quara nkyi timwa nyuquo, tiro. Jesusiva mwitaa tura.

### Iesusiva nai nraaqiaranramwu kyuqu hiqama nyatora

## 13

<sup>1</sup> Vekyahu nyato kyarara omwata nro entava kuua enta nraahu qati vahuvaro Jesusiva variqaro ntapihi kyovaro nai mwata mwaini kyero tumu ntantero nai qova varinani quari entava qaumato vahura. Mwitaa huvaro Jesusiva variqaro nai huhua mwatani varuhuara mpqama kyero mwutukya vahuvaro mwihuara rieqaro varura. Mwiva mwihuara mwutukya vahuvu qati nraahu vahiqiro vuvaro uro qutu vura.

<sup>2</sup> Entama vuvaro Jesusiva nai nraaqiaranramwu kyapata kyara nre varuvaro mwia nraaqiara mpovanto Iutaasi Isikeriotiva Saimoninra mwaaqvanto varuvaro Saataaniva Jesusira qovarama kyaante tiro, Iutaasira mwia nraatoqi qora qua vatovaro Iutaasiva Saataaninra qua riora.

<sup>3</sup> Riero varuvaro Kotiva ekyaa inraikya Jesusira kyauquqi vatora Jesusira vu nraatoqi vahuvaro mwianra ntapihi kyero. Jesusiva Kotiva hunasairo tumuva qaiqaa Kotiva hunani quaninra mwianravata mwiva ntapihi kyora.

<sup>4</sup> Mwiaqatairo mwiva kyara nro taintaraqaatairo siviro verato ututo tuavaaqara ntahuku kyero vatero tauri tavaarana rupatero uro <sup>5</sup> tanuqi nramanri rauru kyero varero uro nai nraaqiaranramwu kyuqu hiqama nyatero tauri tavaarana rupatoraqatairo aahara tu nyatero.

<sup>6</sup> Mwitaamaqiro viro Saimoni Pitaava hunani nri ntovaro Pitaava qaqao tiro, Nronrao, e ni kyuquvatave hiqama matarerera uti variaro? tuvaro <sup>7</sup>Jesusiva tiqaro, Mate nte mwaa kyaiqara varaura e hia ntapihiaro. Nraakiara mwianra qio ntapihinanrave, tiro.

<sup>8</sup> Tuvaro Pitaava tiqaro, Qaqao, e nronra vaisivanto variqara haunri mwitaa hi kyaiqara ni vara materavaare. E hiama ni kyuqu qio hiqenanrave, tiro.

Tuvaro Jesusiva tiqaro, Hia nte i kyuqu hiqama mwataankyera, e hiama ni nraaqiara varinanrave, tiro <sup>9</sup>Mwitaa tuvaro Saimoni Pitaava tiqaro, Nronrao, mwitaa hirara e hia ni kyuqu nraahu hiqama mataante. Ni kyauquvata ni qiatavata hiqama mataante, tiro.

<sup>10</sup> Tuvaro Jesusiva tiqaro, Nramanri ntumwa taariva hiama qumina qaiqaa ntuananrove. Mwiva nai kyuqu nraahuma hiqaananrove, tiro.

Nkye ekyaa nramanri ntumwa kye kyuqema variavaro kuaikuvanto nraahu hia kyuqema variho, tiro.

<sup>11</sup> Iesusiva nai nraaqiara mpovanto mwia qovarama kyaaninra ntapihi kyerora tiro, mwiva tiqaro, Nkye ekyaa kyuqema variavaro kuaikuvanto nraahu hia kyuqema variho, tiro.

<sup>12</sup> Mwitaa timwa kyero mwihua kyuqu hiqama nyatero Iesusiva qaiqaa uro nai tuavaaqa ntahuku kye vatora vara utu varero uro nai varura qoqaraaraqaa mwatakyaa viro variro timwa nyinro tiqaro, Nte mwataa hi kyaiqara nkyi vara nyataura nkye qio mwianra ntapihitave hiavo?

<sup>13</sup> Nkye nianra nronra vaisi mwaanra ti variaravave qiarave. Nte mwitaama varurara tita, nkye qioma nianra mwitaa tivarave.

<sup>14</sup> Qio nte nkyi nronra vaisi mwaanra ti varuva variqanama nte nkyi mwataa kyaiqa vara nyateqanama nkyi kyuqu hiqama nyatauqo. Nkyevata variqata nte huntema kyeta nai kyuqu nai kyuqu hiqama nyateqata variate.

<sup>15</sup> Nkye nte hunte hiate tina, nte nkyi mwi kyaiqara nyaamwu tauqo.

<sup>16</sup> Nte qutaa qianinra nkye riaate. Kyaiqa vaisivanto hia nai nronra vaisi nraatara kyairave. Mpo inrakyara titaiharo vi vaisiva hia nai titaira mwia nraatara kyairave. <sup>17</sup> Nkye mwi quara okyara ntapihi kyeta rieta mwi kyaiqara mwitaama kye varaqi vivera, nkye qamwateqatama variqi vivarave.

<sup>18</sup> Qio hia nte nkyi ekyahuara tuqo. Nte ntena mwatama tau nraaqiarahua qio ntapihi taqaurave. Nte mwihua okyara ntapihi kyaurave. Haaru Kotira mpukuqi qua mpo qara ntumwa tova mate qutaa mwivauma vahiananrove. Mwi quava mwitaama tiro:

Vaisi mpovanto nivatama kyero variqaro  
ni kyara nrenro mwiaqaatairo tuqasaa viro  
ni qoraqama mataananrove, turave.

(Sng 41:9)

<sup>19</sup> Nkyiqitairo vaisi mpovanto ni qoraqama mataaninranra nte mate nkyi timwa nyi varuqo. Mwiva nraakiara ni qoraqama matairata nkye variqata mate nte timwa nyunranra rieqatama qio nianra mwiva qutaama qati nraahu variqi vivave tivarave.

<sup>20</sup> Nte qutaa qianinra nkye riaate. Vaisi mpovanto nte titaanai vaisira qamwata mwateqaro mwiva nivata qamwata mataananrove. Mwiva ni qamwata mateqaro Kotiva ni titairavata qamwata mwataananrove, tiro.

**Mpowanto Iesusira nramwutaa kyauquqi kyaaninranra tura**  
(Matiu 26:20-25; Maaki 14:17-21; Ruku 22:21-23)

<sup>21</sup> Iesusiva mwitaa timwa kyero varuvaro mwia mwutukyavanto uaquia huvaro mwiva vutu kyero mwihua timwa nyinro tiqaro, Nte qutaa qianinra riaate. Nkyiqitairo mpovanto ni rukyaate tiro, uro timwa nyiananrove, tiro.

<sup>22</sup> Mwitaa tuvata mwia nraaqiaranramwuvanto nai taqe nai taqe hita airi nraato tita tiqata, Iesusiva ta vaisirarave tiho? tita.

<sup>23</sup> Mwitaa ti varuvaro mpovanto Iesusira mwutukyavanto mwianra mpoqiaavata vahu vaisiva Iesusira nraaqani varuvaro

<sup>24</sup> Saimoni Pitaava mwianra nru nraata kyero tiqaro, E Iesusira ta vaisiva mwitaa hianinra kyapara hiqara taqaante, tuvaro <sup>25</sup> mwi vaisiva Iesusiraqaa uromwi vuntuvi variro Iesusira kyapara hiro tiqaro, Nronrao, mwiva ta vaisivave iho? tiro.

<sup>26</sup> Tuvaro Iesusiva mwia timwa mwinro tiqaro, Nte mpereti viti nramanri tanuqi vahiraqi mwaati ntamwa kyena vaisi mpo mwianriva qio mwia mwi vaisivave, tiro. Timwa kyero mpereti viti vara kyero nramanriqi ntamwa kyero Iutaasira viti mwunra.

<sup>27</sup> Mpereti viti mwia mwuvaro Iutaasiva mwia varovaro Saataaniva Iutaasira utaqi viqetero varuvaro Iesusiva Iutaasirara tiqaro, Qio hiantera ena vararerina tina kyaiqara varaante, tiro.

<sup>28</sup> Mwitaa tuvata mwia nraaqiara kyara taintaqa varuhuaqitairo hia mpovanto mwi quara okyara ntapihura.

<sup>29</sup> Mwihua tiqata, Iutaasiva munimaqaa ntaqikyi vari vaisiva variharo Iesusiva hora omwata nraana kyarara varaanteve tiho, mwiva vehi vaisi munima uro nyantewe tiho? tita.

<sup>30</sup> Mwihua mwitaa ti varuvaro Iutaasiva Iesusiva mpereti viti mwunra varero mwiaqatairo veva ntero viro. Entaqi mwiva vurama.

### **Iesusiva qaraakya qua mwaanra timwa nyunra**

<sup>31</sup> Iutaasiva veva ntero vuvaro Iesusiva tiqaro, Nte mwatani mwatatai nraaqiaravave. Mate ni peqa okyaravanto qovarama viho. Nte Kotira peqa okyara mate qovarama kyauquo.

<sup>32</sup> Nte Kotira peqa okyara qovarama kyaankyeria, Kotiva mwiva ni peqa okyaravata qovarama kyaananrove. Mwiva qamwanrama mwitaa hiananrove.

<sup>33</sup> Qikye, ni nraaqiaranramwu tuaavo, nte nkyivata pataqia varikyena quarita nkye nraakiara qumina nianra puua hivarave. Nte Iutaa vaisi nronranramwu timwa nyunteema kyena nkyivata timwa nyuquo. Nte virera hianinrani nkye hia qio vivarave, tuquo.

<sup>34</sup> Nte mate qaraakya qua mwaanra nkyi timwa nyianrita nkye riaate. Nkye mpogama kyeta nanrianra nanrianra mwutukya vahirata variate. Ni mutukyavanto nkyiara vahintema kyeta nkyevata nanrianra nanrianra mwutukya vahirata variate.

<sup>35</sup> Nkye nanrianra nanrianra mwutukya vahirata varivata nraakye qora nkyi taqeta mwihua nkye Iesusira nraaqiarama variavo tivarave, tiro.

**Pitaava nte hia Jesusira taqaurave qianinranra Jesusiva tura**  
*(Matiu 26:31-35; Maaki 14:27-31; Ruku 22:31-34)*

<sup>36</sup> Jesusiva mwitaa tuvaro Saimoni Pitaava mwia kyapara hiro tiqaro, Nronrao, e taini virerarave qiaro? tiro. Tuvaro Jesusiva tiqaro, Nte virera hianinrani e hiama qio ni pataqira vinanrave. E nraakiarama ni pataqira vinanrave, tuvaro Pitaava tiqaro, <sup>37</sup>Nronrao, nanraqamave nte hia qio mate i vataqina quaninrave? Nte iara rieqana qioma qutu quaninrave, tiro.

<sup>38</sup> Tuvaro Jesusiva tiqaro, Qutaave e nianra rieqara qutu vinanrave? Nte qutaa qianinra riaante. Kokoraaravanto hia nruqua tirara e taarampo nani nianra nte hia mwia taqaurave tinanrave, tiro.

**Kotiva hinani qua aanrava Jesusivama**

**14** <sup>1</sup>Jesusiva nai nraaqiaranramwu timwa nyinro tiqaro, Hia nianra riaivarо nkyi mwutukyavanto uaqia hiarive. Nkye Kotirara kepukyaqama kye riemwaqita quantema kyeta nianravata kepukyaqama kye riemwaqita quate.

<sup>2</sup> Ni kora mwaatani airi mpo nraamwu mpo nraamwu vahiana nte nkyiara rieqana uro terama nyatarerana vuqo. Hia mwitaama vahitiri, nte hiama nkyi timwa nyutiri.

<sup>3</sup> Nte uro nkyini teramatena uro ntantena tumu nkyi sitaqina uro ntena varianinrani kyaarita, nkye nivata varivarave.

<sup>4</sup> Nte virera hu aanranra nkye ntapihi kyaarave, tiro.

<sup>5</sup> Tuvaro Tomaasiva qaqao tiro, Nronrao, tire e virera hiananra hia ntapihi kyauro. Nataama kyetave tire mwi aanranra ntapihi kyaananrave? tiro.

<sup>6</sup> Tomaasiva mwitaa tuvaro Jesusiva mwia timwa mwinro tiqaro, Nte Kotiva hinani qua aanrava mwaa mwivama varuqo. Nte qutaa okyara mwaa mwivama varuqo. Nte qati variqi qua okyarava mwaa mwivama varuqo. Hia mpo aanranraqaama tero ni kova hinani quariva vaiho. Qio nte mwaa aanra mwivama varuqo.

<sup>7</sup> Nkye ni ntapihi kyeta taqaahuara tita, nkye ni koravata ntapihi kyeta taqevavarave. Mate mwaa entaraqaataita nkye ni kora ntapihi kyetama nkye mwiavata taqaahuama variavo, tiro.

<sup>8</sup> Mwitaa tuvaro Piripiva tiqaro, Nronrao, qio ena qora tiri tinraamwu tairae tire mwia taqeta qiove qiare, tuvaro <sup>9</sup>Jesusiva mwia timwa mwinro tiqaro, Piripio, nte nkyi kyapata mpuahaama varuqara e hiave ni ntapihi kyera taqaaro? Ni taqaiva ni koravatama taqaiho. E nanraqamave nianra tiqara ena qora tiri tinraamwu taante qiaro?

<sup>10</sup> Piripio, nte ntena koraqi varuqaro ni kova niqima variho. E hiave mwi quarara qutaave qiaro? Nte nkyi timwa nyu quara hia nte ntena

riemwa kyeqanavauma nkyi timwa nyuqo. Ni kova niqi variva, mwiva variqaro nai kyaiqa vare variho.

<sup>11</sup> Nte ntene koraqi varuqaro ni kova niqima variho. Mwi quarara quitaave qiate. Nkye hia nianra riaivera, nkye nte kyaiqa varaurara rieqata nianra qutaa mwivave qiate.

<sup>12</sup> Nte qutaa qianinra riaate. Nianra qutaa mwivave timwa kyero riemwaqiro quariva, mwiva variqaro nte kyaiqa varauntema kyero kyaiqa varaanarove. Nte ntene kova hinani quaninranra tiro, mwia kyaiqvanto ni kyaiqa nraatara kyaananrove.

<sup>13</sup> Nkye ni kyaiqara rieqata qioma nkye mpo inraikyararave, mpo kyaiqarave, ni kyapara hivaqe nte nkyi nyianinrave. Nkye ni kora peqa okyara taqaate tina, nte mwia mwaaquvanto mwitaa hirerave.

<sup>14</sup> Nkye ni kyaiqara rieqata qio nkye mpo inraikya mpo inraikyara ni kyapara hivera, nte nkyi nyianinrave.

### Kotira mwanraqura vara kyaariro tumuaninrave tura

<sup>15</sup> Nkyi mwutukyavanto nianra vahirera, nkye ni qua nraahu riemwaqita vivarave. <sup>16</sup> Nte ntene kora kyapara hiaro mwiva nkyi kyaahaqa hianinra Kotira mwanraqura qutaa qua nraahu ti varianinra titairaro nkyi airiqa hirero tumu ekyaa enta nkyivata varianarove.

<sup>17</sup> Qati nraakye qora mwatani variahua hia Kotira mwanraqura taqeta mwihua hia mwia ntapihi kyaarara tita, mwihua hia mwia qio varevarave. Nkye mwia taqaavararo mwaa entara mwiva nkyivatama variho. Nraakiara mwiva nkyiqima varianarove.

<sup>18</sup> Hia nte nkyi mwaini kyena quarita nkye nrainranra nraaqiara votima kyeta varivarave. Nte nkyi kyaarinani uro ntantena tumuaninrave. <sup>19</sup> Pata iheraqia mwatani varihua hia ni taqaivata nkye nraahu ni taqevarave. Nte qati variqina quariva varurara tita, nkyevata qati variqita vivarave. <sup>20</sup> Mwi entara nte ntene koraqi varurave, nkye niqi variarave, nte nkyiqi varurave, nkye ntapihi kyeverave.

<sup>21</sup> Ni qua varakte tutoero mwi quara vataqiro quaninra mwia mwutukyavanto nianra vahianarove. Nianra mwutukya vahiariva variraro ni kora mwutukyavanto mwianra vahianarove. Ni mutukyavantovata mwi vaisirara vahianarove. Nte variqana mwi vaisira ntene okyara qoqaa nraamwu taaninrave, tiro.

<sup>22</sup> Tuvaro Iutaasiva hia Iutaasi Isikeriotiva mpo Iutaasiva tiqaro, Nanraqamave e ena okyara tiri nraahu tinraamwu teqara hia mwatani variahua nyaamwu tenanrave? tiro.

<sup>23</sup> Iutaasiva mwitaa tuvaro Iesusiva tiqaro, (Mwatani variahua hiama nianra mwutukya ntihata variavo). Vaisivanto nianra mwutukya vahiariva, mwiva ni qua riemwaqiro viraro ni kora mwutukyavanto mwianra vahianarove. Ntevata ni kovavata mwi vaisiraqi uro varianarove.

<sup>24</sup> Vaisi mpovanto hia nianra mwutukya vahiariva, mwi vaisiva ni quavata hia vataqiro quananrove. Nte nkyi timwa nyu quara hia ntena nraato tukyena nkyi timwa nyunrave. Nte ni koraqaataina mwi quara varena tumu nkyi timwa nyunrave. <sup>25</sup> Nte mate nkyivata varu entara mwaa quara nkyi timwa nyuquo.

<sup>26</sup> Nte quariro ni kova nkyi kyaahaqa hianinra nai mwanraqura titairaro mwiva ni kyaiqara rieqaro tumu variqaro ekyaa inraikya nkyi nyaamwu teqaro nkyi su nyaatovata kyaahaqa hirata nkye nte tu quara ntapihi riemwa tevarave.

<sup>27</sup> Nte virera hiqanama nkyiara mwaateraqama varivaro nkyi mwutukyavanto qihakya hirata variate, tuquo. Mwaa mwatanaahua nkyiari nanrianra nanrianra qua mwanteta tiqata, Mwaateraqama kyera variante, ti variarave. Nkyiari mwitaa tiqata qumina qua nraahu ti variarave. Nte nkyiara mwaateraqama kyeta variate tu quava hiama qumina quave. Nkye ni qua riemwaqita vivaro nkyi mwutukyaitairo qihakyaama vahirata hia aatu hivaro nkyi mwutukyavanto hiama uaquia hiananrove.

<sup>28</sup> Nkyi kyena quariva uro ntantena tumuaninrave tu quara nkye vaakya riaarave. Ni kova ni naatara kyero nronravanto varirara tita, nkyi mwutukyavanto nianra qutaaqama vahirera, nte ntena kova hinani quaninranra nkye qamwateqata varivarave.

<sup>29</sup> Mwi inraikyava mwi inraikyava nraakiara mwitaa mwitaa hianinranra nte mate nkyi timwa nyuquo. Qio nraakiara nkye taqaivaro mwi inraikyava qovaramaqiro virata nkye nianra tiqata mwiva tu quava mate qutaa mwivauma vaiho tivarave.

<sup>30</sup> Qio mwaa entara mwatani variahuaqaa ntaqikyi variva, Saataaniva, nrumu varihananra tina, mwia kyaara nte hia nkyi kyapata mpuahaa qua qianinrave. Mwia kepukyavanto hia ni qio naatara kyaananrove.

<sup>31</sup> Ni mutukyavanto ni korara vahira mwatani varihua taqaate tina, nte ni kora qua vataqina virerave. Qio varaivaqenramwu mwaaqitaita vevante quare, tiro. Iesusiva turama.

### Iesusiva uaini kyaantaqa ntumwa kyero timwa nyunra

**15** <sup>1</sup> Iesusiva mpo quaqaa ntumwa kyero nai nraaqiaranramwu timwa nyinro tiqaro, Nte uaini apa kyuqeva varuqaro ni kova uainiqaa ntaqikyi varivama varihata nkye uaini mwanre kyaarama variavo. <sup>2</sup> Ni kova taqaiharo kyaara mpovanto hia tamwa riaiharo mwiva mwia teqa qaqlira kyero uro taqaiharo mpo kyaaravanto kyuqema kyero tamwa riemwa taiharo mwiva kyuqema vahiqaro mpoqivata riaarive tiro, mwia rapatu kyero vatairave. <sup>3</sup> Nte tu quava nkyi vaakya rapatu kyero vataihatara tita, nkye qiomaa variavo.

<sup>4</sup> Nkye niqi varivaqe nte nkyiqi variankye. Kyaara mpovanto nanrianraqama vahiariva hiama qio tamwa riaananrove. Kyaara mwiva

apaqaa taaqau vahiariva qio tamwa riaananrove. Mwia votima kyeta nkye hia nivatama kyeta taaqauvi varivera, nkye hiama qio tamwa rievarave.

<sup>5</sup>Nte uaini apa varuqata nkye kyauqu kyaarama variavo. Ni vatama kyero variraqe nte mwia vatama kyena variariva, mwivama tamwa airi riaananrove. Nkye hia nivata taaqauvi variraitita nkye nkyetaraa varivera, nkye hiama qio mpo kyaiqvata varevarave.

<sup>6</sup>Kyauqu kyaara qaqlira kyairaro aaharama quarintema kyero hia nivata taaqauvi variani vaisira ni kova qaqlira kyaananrove. Qaqlira kyaani kyaarara mwia nraakiara ntupi kyero varaqiro qiaqi tuto kyairaro itamwa taiqa kyaananrove.

<sup>7</sup>Nkye ni vatama kyeta taaqau vita varivaro ni quavanto nkyiqi vahirera, nkye Kotirara nkyeta mwutukya vahiani inraikyarara kyapara hivaro nkyi nyiananrove. <sup>8</sup>Nkye ni qua riemwaqi viqata uaini kyaanta votima kyeta airi tamwa riaivaro ni kora nrutuvanto nronraqa hiarive. Nkye mwitaamaqi viqata nkye quataaqama kyeta ni nraaqiara varivarave.

<sup>9</sup>Ni kora mwutukyavanto nianra vahintema kyero ni mutukyavantovata nkyiara vaiho. Ni mutukyavanto nkyiara vahira mwipi variate. <sup>10</sup>Nte ni kora qua riemwaqina vi varuqaro mwia mwutukyavanto nianra vahirave. Mwitaa huntema kyeta nkyevata ni qua riemwaqita vivera, nkye ni mutukyavanto nkyiara vahiraqi varivarave. <sup>11</sup>Ni mutukyapi kyuqe hintema kyero nkyi mwutukyaqvata kyuqe hirata nronraqama kye qamwateqata variate tina, nte mwaa quara nkyi timwa nyuquo.

<sup>12</sup>Nte mpo qua qianinra nkye mwi quara riemwaqita quate. Ni mutukyavanto nkyiara vahintema kyeta nkyevata nanrianra nanrianra mwutukya vahirata variate.

<sup>13</sup>Vaisivanto nai nramwunaahuara mwutukya vahiaro mwihuara rieqaro qutu virave. Mwitaama kyero nai hena huara mwutukya vahiariva mpohuara mwutukya vahi okyarara ekyaa nraatara kyero nritarero vahiananrove. <sup>14</sup>Nkye ni qua riemwaqita vivera, nkye ni nramwunaahuama varivarave.

<sup>15</sup>Kyaiqa vaisivanto hia nai nronra vaisivanto mwitaa mwitaa hiani okyarara ntapihirara tina, nte hiama nkyiara ni kyaiqa vaisive timwaqina quaninrave. Nte nkyiara ni nramwunaahuave timwaqina virerave. Nte ni kora qua riaura ekyaa nkyi timwa nyunranra tina, nte mwitaa tirerave.

<sup>16</sup>Hia nkye ni naanraanrave. Nte nkyi nyaanraunrave. Nte nkyi nyaanrama kye sita kyena nkyiara uro kyatarivanto tamwa riaintema kyeta kyuqe tamwa mpuahaama vahiani tamwanra riemwataate turave. Nkye mwitaa hivera, nkye ni nutuarave, ni kyaiqarave rieqata nanra inraikyarave ni kora kyapara hivaro mwiva nkyi nyiananrove. <sup>17</sup>Nte mwaa quara nkyiara mwitaa hiatema tuqo. Nkye nanrianra nanrianra mwutukya vahirata variqita quate.

### Mwatani varihua nkyi nramwutaaqa hivarave tura

<sup>18</sup> Mwatani varihua nkyi nramwutaaqa hivera, nkye ntapihiate, mwihua ni nraante nramwutaaqama taahuara titama, nkyivata nramwutaaqa hivarave. <sup>19</sup> Nkye mwata mwainyaahua varivatavauma mwihua nkyiara tiri nramwunaahuave tiqata nkyiara mwutukya vahirata varivarave. Nte mwatani variahuaqitaina nkyi nyaanrama kyauqata nkye hia mwihuaniqama variavo. Nkye hia miuhaniqama variarara titama, mwihua nkyi nramwutaaqa hi variavo.

<sup>20</sup> Nte vaakya timwa nyunranra riaate. Hia kyaiqa vaisivanto nai nronra vaisi nraatara kyairave. Mwatani variahua ni uaqama matehuara tita, mwihua nkyivata uaqama nyatevarave. Mwihua ni qua riehuavauma nkyi quavata rievarave.

<sup>21</sup> Nkye ni nraaqiara variavatara tita, mwihua mwia kyaara nkyivata qoraqama nyatevarave. Ni titaira hia ntapihiahura tita, mwihua mwitaa hivarave. <sup>22</sup> Nte hia tumu mwihua timwa nyutirio, mwihua qora kyaiqa utuarara hiama qua vahitirio. Nte tumu mwihua timwa nyunranra tiro, mwiaqatairo mwihua qaqao hia mwia riaunanrave ti quava hiama vahiananrove.

<sup>23</sup> Vaisivanto ni nramwutaaqa hiqaro ni koravata nramwutaaqa hiananrove. <sup>24</sup> Mpo kyaiqa mpo kyaiqa hia mwihua qio varaa kyaiqara nte mwi kyaiqara mwihua suqaa variqana vare varuvave. Hia nte mwitaa hutirio, hiama mwihuaqaa qua vahitirio. Mwihua ni kyaiqa taqeta ni qaqlira kyeta nivata ni koravata nramwutaaqa hiavo. <sup>25</sup> Mwihua mwitaama variavaro qua mpo haaru qumina vakya qara ntumwa tova mate ntapihi kyero mwivauma viho. Mwi quava mwitaama tiro:

Hia mpo quavata vahirata quminaqama kyeta

mwihua ni nramwutaaqa hivarave, turave.

(Sng 35:19)

<sup>26</sup> Qio nkyi kyaahaqa hiariva mpovanto tumuananrove. Mwiva Kotira mwanraquravanto qutaa qua nraahu ti variva, mwiva Kotiva hinasiro tumuananrove. Nte mwia ntena koraqataina titapiro mwiva tumu variqaro nianra ntapihi kyero nkyi timwa nyiananrove. <sup>27</sup> Nkyevata vuni nivatama kyeta variqi quahuara tita, nkye qioma ni kyaiqa okyarara mpo mwatanaa mpo mwatanaahua timwa nyivarave.

**16** <sup>1</sup> Nkye nraakiara pupohairata ni qua qaqlira kyevu tina, nte mwi quara mwi quara nkyi timwa nyuquo.

<sup>2</sup> Nraakiara mwihua nkyi inronra hiqata mwaanra nraamwuqitaita nkyi raaqu kyevarave. Mpo enta nrintairata mwihua nkyi ru kyeta tiqata, Tire Kotira kyaiqama vare varuro, tivarave.

<sup>3</sup> Mwihua nianravata ni koraravata hia ntapihi kyeta riaahuara tita, mwihua mwitaa hivarave. <sup>4</sup> Nte mwaa entara nraakiara nkyi uaqama nyaterara timwa nyuquo. Nraakiara mwihua mwitaa mwitaa hivata

nkye mwi entara nte mate mwaa quara turara nraato tuate. Tauraan nte nkyivata variqananra tina, hia nte mwi quara mwi quara nkyi timwa nyunrave.

### Kotira mwanraqura kyaiqara Iesusiva tura

<sup>5</sup> Qio nte pataqia vari kyena ni titava hinani virerave. Qio nte mwini virerana uti varuqaro hiama nkyiqitairo mpovanto tiqaro, E taini virerarave hiaro? tiho. <sup>6</sup> Nte vaakya turara nkye rie variavaro nkyi mwutukyavanto uaquia ihata variavo.

<sup>7</sup> Qio nte qutaama tuquo. Nte hia quariro nkyi kyaahaqa hiariva hia qio tumuananrove. Nte quariva qiomia uro mwia titaariro nkye hinani tumuananrove.

<sup>8</sup> Kotira mwanraquravanto tumu variqaro mwiva mwatani varihua taarampo inraikyara nyaamwutaananrove:

- (1) mwihua uaquia hi kyaiqarave
- (2) kyuqe kyaiqa okyararave
- (3) Kotiva ko qiani okyararave

<sup>9</sup> (1) Mwihua uaquia hi kyaiqara:

Mwatani varihua hia nianra qutaa mwivave tihuara tita, mwihua uaquia hi kyaiqara utira mwiva nyaamwu taananrove.

<sup>10</sup> (2) Kyuqe kyaiqa okyara:

Nte ntene kova hinani quarita nkye hia qaiqaa ni taquerara tiro, mwiva variqaro kyuqe kyaiqa okyara nkyi nyaamwu taananrove.

<sup>11</sup> (3) Kotiva ko qiani okyarara:

Mwaa mwataraqaa ntaqikyi variva Saataaniva ko hia nraatara kyairara tiro, mwiva Kotiva ko qiani okyarara mwatani varihua nyaamwu taananrove.

(Kotira mwanraquravanto mwitaama timwa nyiananrove.)

<sup>12</sup> Nte mpo qua mpo qua nkyi timwa nyianriva vaihata nkye hia ekyaa mwi quarara qioqa hiavanana tina, mate nte hia mwi quara nkyi timwa nyinrenrave. <sup>13</sup> Qutaa qua nraahu ti variari mwanraqurava tumu ntero, mwiva variqaro nkyi sita varero nkyi kyuqe aanra nyaamwu teqaro qutaa qua okyara ekyaa mwi okyarara nkyi timwa nyiananrove. Mwiva hia nai vu nraato tuani quarara tiraitiro, mwiva riaani quara nraahuma timwa nyiananrove. Nraakiara mwi inraikyava mwitaa mwitaama qovara hiani inraikyarara mwiva nkyi timwa nyiananrove.

<sup>14</sup> Mwiva nte qua qianinra mwi quara nkyi timwa nyianinranra tiro, ni nutuvanto nronraqa hiananrove.

<sup>15</sup> Ekyaa ni kova hi inraikyava nini vahirara tina, nte vaakya tiqana, Kotira mwanraqura mwiva nte hu inraikyarara riero vara kyero nkyi timwa nyiananrove, turave. <sup>16</sup> Qio pataqia nkye varita hia ni taqevarave. Mwiaqaataita pataqia nkye varita qaiqaa ni taqevarave, tiro.

**Nkyi mwutukyavanto uaquia hirata variqita vivaro mwiaqaatairo  
nkyi mwutukyavanto kyuqema vahirata varivarave, tura**

<sup>17</sup>Iesusiva mwitaa tuvata mwia nraaqiara mponramwuvanto nai timwa mwi nai timwa mwi hita tiqata, Mwiva nanra quave tiho? Mwiva tiqaro, Pataqia nkye varita hia ni taqevarave, timwa kyero qaiqaa tiqaro, Nkye vari kyeta ni qaiqaa taqevarave, tiho. Mwiva mwitaa timwa kyero nai qova hinani quaninranravata tiho. <sup>18</sup>Mwiva nkye pataqia vari kyetave ti quara, hia tire mwi quara ntapihi riauro, tita.

<sup>19</sup>Mwitaa ti varuvaro Iesusiva ntapihi kyovala mwihua mwi quarara mwia kyapara hirerata uti varuvaro Iesusiva tiqaro, Nte vaakya turara nkye pataqia varita hia ni taqevarave mwiaqaataita pataqia varita qaiqaa ni taqevarave turave. Nkye mwi quararave nai kyapara hi nai kyapara hi variavo?

<sup>20</sup>Qio nte qutaa qianinra riaate. Nkye ntateqata atura ntqi variqi vivata mwatani varihua qamwateqata varivarave. Nkyi mwutukyavanto uaquia hirata variqita vivaro mwiaqaatairo nkyi mwutukyavanto kyuqema vahirata varivarave.

<sup>21</sup>Nraakyevanto nraaqiara mwataariva qaumato vaiharora tiro, mwiva atura ntirave. Qio mwi nraakyeva nraaqiara mwata kyero mwiaqaatairo tiqaro, Nte nraaqiara mwata kyauqo, timwa kyero qamwateqaro nai atura ntirara taunru kyairave. <sup>22</sup>Nkyevata mwitaa hivarave. Mwaa entara nkyi mwutukyavanto uaquia hirata varivarave. Qio nraakiara nte nkyi uro taqaariro nkyi mwutukyavanto kyuqe hirata qio varivarave. Varivaro mpovanto hia qio nkyi qoraqama nyatairaro nkyi mwutukyavanto uaquia hiananrove.

<sup>23</sup>Mwitaa hirata mwi entara nkye mpo inraikyara ni kyapara hiva hiama vahiananrove. Nte qutaa tuqo. Mwi entara nkye ni korara mpo inraikyara mpo inraikyara mwia kyapara hivaro mwiva ni kyaiqarave, ni nutuarave, rieqaroma nkyi nyiananrove.

<sup>24</sup>Tauraa nkye variqata hia ni kyaiqarave ni nutuarave rieqata ni kora kyapara hiarave. Mwaa entaraqaataita nkye ni kora kyapara hivaro nkyi mwutukya kyuqe hiarive tiro, nkyi nyiananrove.

### **Iesusiva mwata mwaqaanaa okyara nraatara kyairave tura**

<sup>25</sup>Nte mpo quaqaa ntumwa kyeqana mpo qua mpo qua nkyi timwa nyunrave. Qio mpo enta nri ntairaqe nte hia mpo quaqaa ntumwa kyena nkyi timwa nyinraitina, mwi entara nte ntena korara nkyi timwa nyinrenra nte vutu kyenama nkyi timwa nyianinrave.

<sup>26</sup>Mwi entava nri ntairata qiomu nkye ni nutu nteqata ni korara kyapara hivaro nkyi nyiananrove. Hia nte nkyiara rieqana ntena kora kyapara hianinrave. (Nkyetavanto qio mwia kyapara hivarave.) <sup>27</sup>Ni

kova nkyiara mwutukya ntiharo varirara tita, nkyetavanto qiomia mwia kyapara hivaro nkyi nyiananrove. Nkye nianra tiqata, E Kotiva hinasaира tumuanravave, qiavaro nkyi mwutukyavanto nianra vahata variarara tiro, ni kora mwutukyavantovata nkyiara vaharo variho. <sup>28</sup>Nte ntena kova hinasaира mwatani tumuvave. Nte qaumama mwaa mwatara mwaini kyena ntena kova hira qoqaraanani quaninrave, tiro.

<sup>29</sup>Mwitaa tuvata mwia nraaqiaranramwuvanto qiove tita, Mate e hia mpo quaqaa ntumwa kyera tiraitira, e vutu kyerama tiri timwa timwi variaro.

<sup>30</sup>Mate tire ntapihi kyaurara e ekyaa inraikya ntapihi kyaarava variarata tire hiama i qaiqaa kyapara hiananrave. Mate tire tiqata, Qutaama e Kotiva hinasaира tumuanravave turo, tita.

<sup>31</sup>Mwitaa tuvaro Iesusiva tiqaro, Qio mateve nkye ni okyarara ntapihiavo? <sup>32</sup>Mpo enta nrianriva qaumatoma vaiho. Mwi entaraqaa nkyi vara aanraupima kyaivata nkye mponamate nkyeta mwaatani vivu kyaavuma vivarave. Ni kova nivatama kyero varirara tina, nte mwi entaraqaa hiama ntenanraa varianinrave.

<sup>33</sup>Nkye nivata varivaro nkyi mwutukya qihakyama vahiarive tina, nte mwaa quara nkyi timwa nyuqo. Nkye mwatani varivata mwihua nkyi uaqiamma nyatevarave. Qio kepukyaqama kyeta variate. Nte mwatanyaa okyara nraatara kyaurave, tiro. Iesusiva turama.

### Iesusiva Kotirara aakyara nteqaro tura

**17** <sup>1</sup>Iesusiva mwi quara timwa kyero mwiva nyaamwuni taqebaro Kotirara aakyara ntero tiqaro, Ko, mate mwaa ni iherama nri ntaiho. Qio e ni peqa okyara qovarama matairaqe nte i mwaauqvanto variqana nte ina peqa okyara nyaamwutaankye.

<sup>2</sup>E nraakye qora ni mpiarahuia nte mwihua kyaahaqamaqina quarita mwihua ekyaa enta qati variqita quate tira, e ni nronraqama kyaarana nte ekyaa nraakye qoraqaa ntaqikyi variqana nte mwihua nronravanto varuqo.

<sup>3</sup>Nraakye qora ekyaa enta qati variqi vi okyarava mwataamama vahiro: Nraakye qora iara ntapihi kye rieta tiqata, Kotiva nraahuma qutaa mwanriqa kuaiqiyavanto variqaro Iesusi Karaisira titairave, tihua, mwihua mwi okyarara varevara.

<sup>4</sup>Nte mwatani variqi vina i peqa okyara nraakye qora nyaamwuteqana e kyaiqa mpiananra vara taiqa kyauqo. <sup>5</sup>Qio ko, haaru hia mwaa mwatavavata vahu entara nte ivata variqi quavarao ni peqa okyaravanto vahurave. Qio mate e ni peqa okyara mwia nyaamwutairata mwihua taqaate.

<sup>6</sup>Mwatanyaa vaisinramwu ni mpiarahuia nte mwihua i okyara nyaamwutaurave. Mwi vaisihua ena hiarahuia ena mwihua ni mpiarata mwihua variqata i qua riemwaqita quavo.

<sup>7-8</sup> E qua ni timwa mpiananra nte mwihua timwa nyuqata mwihua mwi quara varaarave. Mwihua ntapihi kyaavana nte qutaa e hiananrasaina tumuqata mwihua nianra qutaa Kotiva mwia titairave qiarave. Mwitaa tiqatara tita, mwihua ntapihi kyeta riaavaro e ekyaan inraikya ni mpiarava mwi inraikyava e hiananrasairo tuminrave.

<sup>9</sup> Qio nte mwihuara rieqanama iara aakyara nte varuqo. Hiama nte ekyaan nraakye qora mwatani variahura aakyara nte varuqo. E nraakye qora ni mpiarata mwihua ini variarara tinama, nte mwihuara rieqanama iara aakyara nte varuqo. <sup>10</sup> Nte uhua e hiarahuama variavo. E hiarahua nte uhuama variavo. Mwihua variqata ni peqa okyara mpo hiahua nyaamwute variavo.

<sup>11</sup> Nte hia mwaa mwataraqaa variarita mwihuama mwaa mwataraqaa varivarave. Nte e hiananrani virerave. Qio ko, e kyotataqama kyera variaravave. E ena kepuuya nrutu ni mpiananra mwi kepukyaraqtaira mwihua antuaraqira virata mwihua tiretana kuaaqi varurantema kyeta mwihuavata variate.

<sup>12</sup> Nte mwihua kyapata variqana e ena kepuuya nrutu ni mpiananra mwi kepukyaraqtaina mwihua antuaraqina vuqata hia mwihuqaqitairo mpoqiatovata raupirima viho. Vaisi kuaiqiatovo nraahu raupirima viho. Mwiva raupirima quaninranra haaru qati vakya mpovanto mwianra qara ntumwa tero mwitaa hiananrove turagaara tiro, mwate mwitaama viho.

<sup>13</sup> Qio nte ivata varirerana virera uti varuqo. Ni mutukyavanto qamwatero kyuqe hintema kyero mwihua mwutukyavantovata qamwatero kyuqe hiarie tina, nte mwata mwaini variqana mwaa quara mwitaa tuqo. <sup>14</sup> Nte i qua mwihua timwa nyuqata mwihua mwatani variahua nrohia aanranra qaqla kyeta mwihuavata hiama mwata mwaqaanaava varuntema kyeta mwihuavata hiama mwata mwaqaanaahua variavo. Mwitaama variavata tita, mwatani variahua mwihua nramwutaa hi variavo.

<sup>15</sup> Qio nte hia mwata mwaqaataira mwihua sitaanteria i kyapara huqo. Qaqao, nte iara tiqana, E mwihuqaqa ntaqiqiyiqira viraro uaqia hi vaisiva hia mwihua uaqiamma nyataarive, tuqo.

<sup>16</sup> Nte hia mwata mwaqaanaava varuntema kyeta mwihuavata hiama mwata mwaqaanaahua variavo. <sup>17</sup> E qutaa quaqtaira mwihua kyaahaqa hirata mwihua i aanraqaa nraahu nrohiate. I qua qutaa quama vaiho.

<sup>18</sup> E ni mwata mwaini titaarana tumunteema kyena, ntevata mwihua mpo mwata mpo mwatani sitarerave.

<sup>19</sup> Qio nte mwihuara rieqana kuaa kyaiqa nraahu vararerana varuvave. (Nte mwihuara rieqana qutu quataa hiraqe qutu virerana varuqo.) Nte mwitaa hiarita mwihua qutaaqama i nraaqiara variqata i aanraqaa nraahu vivarave.

<sup>20</sup> Hia nte mwihuara nraahu rieqana iara aakyara ntauqo. Nraakiara mpo ihua mwihua qua rieqatama nianra qutaa mwivave tihua, nte mwihuaravata rieqanama iara aakyara ntauqo. <sup>21</sup> Mwihua kuaaqi variate tina, nte iara aakyara ntauqo. E niqi variarana nte iqi varuqo. Ko, mwihua tiritana votima kyeta variate tira, e mwihua kyaahaqa hirata mwihuavata tiritanaqi variate. Mwatani varihua nianra qutaa Kotiva mwia titaivave qiate tira, e ni nraaqiaranramwu kyaahaqa hirata mwihua kuaaqi variate.

<sup>22</sup> E ni nutu nronraqama kyaarana nte kuaaqarama kyena mwihua nyutu nronraqama kyauqo. Mwihua tiretana kuaaqi varurantema kye mwihuavata kuaaqi variate tina, nte mwihua nyutu nronraqama kyauqo.

<sup>23</sup> E niqi variraqe nte mwihuaqi variarita mwihua kuaaqi variqatama mpoqiaavata kyaakueqa hivarave. Mwihua mwitaama varivata qati nraakye qora mwatani varihua e ni titaanranra ntapihita i mwutukyavanto nianra vahintema kyero i mwutukyavanto ni nraaqiaranramwuanravata vahianinravata taqeverave.

<sup>24</sup> Ko, haaru hia mwaa mwatava vahu entara e nianra mwutukya vahuvarara tira, e ni nronraqama kyoraro e ni nronraqama kyoraro ni okyara kepukya okyaravanto vahuvana variavarave. E nraakye qora ni mpiaragua mwihuavata ni peqa okyara taqaate tina, nte tiqana, Nte varianinrani mwihuavata varivarave, tuqo.

<sup>25</sup> Ko, e avuqvuma kyera variaravave. Qati nraakye qora mwatani variahua hia i ntapihi kyaavana nte nraahu i ntapihi kyaurave. E ni titaanranra mwaa nraaqiaranramwuhua nraahu mwia ntapihi kyaarave.

<sup>26</sup> Nte iara mwihua timwa nyuqata mwihua i ntapihi kyaarave. I mwutukyavanto nianra vahintema kyeta mwihuavata mpohuara mwutukya vahirata varivaqe nte mwihuavata kuaaqi variqina quanye tina, nte mwihua iara mpoqiaavata timwa nyiqi quarita mwihua ntapihi rievarave, tiro. Iesusiva nai qorara aakyara nteqaro mwitaa tura.

### Iesusira ntavaaqavu kyora

(Matiu 26:47-56; Maaki 14:43-50; Ruku 22:47-53)

**18** <sup>1</sup> Iesusiva mwitaama kyero Kotirara aakyara timwa taiqa kyero mwiva nai nraaqiaranramwu vatama kyero vuva uro Kitaroni pata nramanriqiaru qarero oripi kyatari kyaqamwa tutoraqi vura.

<sup>2</sup> Iesusiva airi enta nai nraaqiaranramwu kyapata mwipi uro varurara tiro, Iutaasiva Iesusira nramwutaahua kyauquqi kyaariva mwia ntapihi kyora. <sup>3</sup> Iutaasiva ntapihi kyero uro Kotira kyaiqa vara mwate varu vaisihua mwihua nronra vaisinramwuvata, Parisi vaisinramwuvata, timwa nyuvata mwihua kamaninra porisinramwu Iutaasira mwita kyaiqa vaisinramwuvata mwia mwuvaro Iutaasiva mwihua sita varero vura. Mwihua omwavata ramuvata qupi kye vareta ntaqi inraikyaravata vareta vuhua uro Iesusiva hunani uro ntora.

<sup>4</sup>Mwini uro ntovaro Jesusiva vaakya mwihua uti inraikyara ntapihi kyero mwiva vutu ntero mwihua kyapara hiro tiqaro, Nkye tararave puua hi variavo? tiro.

<sup>5</sup>Mwitaa tuvata mwihua tiqata, Tire Jesusira Nasaretinyaanranra puua hi varuro, tuvaro Jesusiva mwihua timwa nyinro tiqaro, Nte mwaa mwivama varuqo, tiro. Mwitaa tuvaro Iutaasiva Jesusira nramwutaa kyauquqi kyaari vaisiva, mwiva Jesusira rukyehua kyapata siviro varura.

<sup>6</sup>Iesusiva nte mwaa mwivave tuvata mwihua nrihanrama vita uro ntanteta aatuma kyeta mwatasata tuto ntita varura.

<sup>7</sup>Mwitaa huvaro Jesusiva qaiqaa mwihua kyapara hiro tiqaro, Nkye tararave puua hi variavo? tuvata mwihua qaiqaa tiqata, Jesusira Nasaretinyaanranrave, tuvaro <sup>8</sup>Iesusiva tiqaro, Nte vaakya nkyi timwa nyunrave. Nte mwaa mwivama varuqo. Nkye nianra puua hirerata nrivera, mwaa vaisinramwuhua qati kyaivata quate, tiro. <sup>9</sup>Vuni Jesusiva nai qorara mwitaama tiro: Vaisi mponramwu ni mpiarahua hia nte mpoku raupirima kyauqo, tura. Mwi quava quataa mwivau vahiarive tiro, Jesusiva tiqaro, Mwi vaisinramwuhua qati kyaivata quate, tiro.

<sup>10</sup>Mwitaa tuvaro Pitaava nai paipanta varero nrurra veva ntanrau kyero mwiaqotairo Kotira kyaiqa vara mwate varu vaisihua mwihua vunyaa vaisi, mwia kyaiqa vaisi nraato kyaatutani vahura teqa kyora. Kyaiqa vaisi mwia nrutu Marakusira.

<sup>11</sup>Pitaava mwia nraato teqa kyovaro Jesusiva Pitaarara tiqaro, Ena paipa vara veva nai tuaqi hu taante. Ni kova nramanri ni mpianinra hia nivanto nraanrive tirave mwitaa hiaro? tiro. (Jesusiva nramanriqaa ntumwa kyero nai ntuquтиваро nriqa quani inraikyara varero uro qutu quaninranra tura.)

### **Iesusira vitaqita uro Anaasiva hunani kyora**

<sup>12</sup>Iesusiva mwitaa tuvata Romeninyaahua ntaqu vaisihua nkyiari qita vaisi vatama kyeta nruvata Iutaa porisinramwuvantovata nri nteta Jesusira ntavaaqavu kyeta mwia rupa kyeta <sup>13</sup>mwia vitaqita Anaasiva hunani nraante kyora. Anaasiva mwiva Kaiapaasira nrinraamwiva varuvaro Kaiapaasiva nronraqama vuva mwi ihiraqi Kotira nraamwuqi Kotira kyaiqa vara mwate varu vaisihuaqaa ntaqikyiqaro qita vaisivanto varura.

<sup>14</sup>Tauraa Kaiapaasiva nai Iutaa kaanasori vaisi timwa nyinro tiqaro, Tiri kyaahaqa hirero vaisi kuaikuvanto qutu viraro kyuqe hiananrove, tu vaisiva varurama.

### **Pitaava Jesusirara hia nte mwia taqaurave tura (Matiu 26:69-70; Maaki 14:66-68; Ruku 22:55-57)**

<sup>15</sup>Iesusira Anaasiva hunani vitaqita uro kyovata Saimoni Pitaavavata Jesusira nraaqiara mpovantovata Jesusira vataqita vura. Anaasiva Pitaara

vatama kyero nru vaisira ntapihi kyovara tiro, mwiva Iesusira vataqiro viqaro Anaasira mwaata mwatukya utaqi vijetora.<sup>16</sup> Pitaava mwaqaqani varuvaro Iesusira nraaqiara Anaasiva ntapihi kyo vaisiva mwatukya utaqi vuva uro ntantero nrumu quesana ntaqikyi varu nraakyera timwa mwitero uro Pitaara vitaqiro nrumu utaqi vera kyora.

<sup>17</sup>Utaqi kyovaro Pitaava varuvaro nraakye qesaqaa ntaqikyi varuva mwiva tiqaro, Evata mwi vaisira nraaqiarave variaro? tuvaro Pitaava qaqaq, Nte hiave, tiro. <sup>18</sup>Timwa kyero varuvata porisinramwuvantovata Anaasira kyaiqa vaisinramwuvantovata varuvaro antovata mwihua qia quarateta qia taare varuvaro Pitaavavata mwini uro variqaro qia taare varura.

### **Anaasiva Iesusira kyaparama mwatora**

*(Matiu 26:59-66; Maaki 14:55-64; Ruku 22:66-71)*

<sup>19</sup>Mwiaqaatai Iesusira vitaqita mpoqi uro kyovaro Kotira kyaiqa vara mwate varu vaisihua mwihua vunyaa vaisivanto Iesusira nai nraaqiarara kyapara hiro Iesusiva nraakye qora timwa nyu quararavata kyapara huvaro <sup>20</sup>Iesusiva nai timwa mwinro tiqaro, Nte qoqaa variqana nraakye qora qua timwa nyunrave. Nte ekyaa enta nraakye qora timwa nyinrenrana Iutaavanto ntuvaantuama vita variaraqive, mwaanra nraamwuqive, Kotira nraamwu nronraqive, variqana nte mwihua qua timwa nyunrave. Hia nte uqeta kyena variqana mwihua qua timwa nyunrave.

<sup>21</sup>Qio nanraqamave e ni kyapara hi variaro? E ni qua riaahua kyapara hiataarave. Nte qua timwa nyuhua kyapara hiante. Mwihua nte tu quara riaahuave, tiro.

<sup>22</sup>Iesusiva mwitaa tuvaro porisi vaisi mpovanto mwipi varuva Iesusira nraatokyai ntuteqa kyero tiqaro, E hia mwitaama kyera tiri nronra vaisiara qua qianta, tiro.

<sup>23</sup>Mwitaa tuvaro Iesusiva mwia timwa mwinro tiqaro, Ni quavanto api qua vahiraravauma e ekyaa nraakye qora mwianra timwa nyinrata rievarave. Ni quavanto qio vaihara e nanraqamave ni qumina ntuqtira hiaro? tiro.

<sup>24</sup>Iesusiva mwitaa timwa kyero mwia kyaantaqotaita rupatova varuvaro Anaasiva mwia titovaro Kotira nraamwuqaa ntaqikyi varu vaisira Kaiapaasiva hunani viro.

### **Pitaava qaiqaa hia Iesusira taqaurave tura**

*(Matiu 26:71-75; Maaki 14:69-72; Ruku 22:58-62)*

<sup>25</sup>Iesusiva mwini vuvaro Pitaava mpoqi variqaro qia taare varuvata mwini varuhua mwia kyapara hita tiqata, Evata mwia nraaqiarave variaro? tuvaro Pitaava qaqaq, Nte hiave, tiro.

<sup>26</sup>Mwitaa tuvaro vaisi mpo qiata vaisi kyaiqa vaisivanto Pitaava mwia nraato teqa kyora mwia hena vaisivanto Pitaarara tiqaro, Qutaa eve nte taqauqara mwikyantiri kyatari kyaqamwaqi variaro? tiro.

<sup>27</sup>Tuvaro Pitaava qaiqaa qaqaq nraahu tiro. Mwitaa timwa kyero rioraro qamwanrama kyero kokoraaravanto nruqua tura.

**Iesusira Pairaativa hunani vitaqita uro kyora**

*(Matiu 27:1-2, 11-14; Maaki 15:1-5; Ruku 23:1-5)*

<sup>28</sup>Mwihua Kaiapaasira mwini kyeta Iesusira vita vare uro nronra vaisi kamaninra nraamwuqi kyora. Mwihua vaakya toqaqi mwini uro nteta mwihua Iutaavantora tita, hia mwia nraamwuqi vera ntaraitita, mwaatani varura. Mwihua nkyiari tiqata, Tire mwia mpo mwatanaana nraamwu hia kyotataqi vera nteta uaqama vita mwia kyaara tire hiama vekyahu nyato entaraqaa omwata qio nraananrave, tita. <sup>29</sup>Mwitaa timwa kyeta mwihua mwaatani varuvaro Pairaativa kamaninra qiata vaisivanto mwihua taqarerero veva ntero mwihuara tiqaro, Nanra qua mwaa vaisiraqaa vaihatave qiao? tiro.

<sup>30</sup>Pairaativa mwitaa tuvata mwihua tiqata, Mwi vaisiva hia uaqia hi kyaiqara uitirio, tire hiama qio e hiananrani mwia vite nrurratirio, tita.

<sup>31</sup>Mwihua mwitaa tuvaro Pairaativa qaqaq tiro, Nkyeta mwaa mwi vaisira viteta nkyeta Iutaa ko quaqaa rieqatama mwia ko qiate, tiro. Pairaativa mwitaa tuvata Iutaa mwihua tiqata, Qaqao, tire qumina vaisi variqata vaisi ru kyaananranra qua varaarorave. (Ena kamaniva variqara qiomia tirata mwia ru kyevarave), tita.

<sup>32</sup>Mwihua mwitaa tuvaro Iesusiva mwihua mwitaama kyeta ni ru kyevarave tu quava qutaa mwivau vahura.

<sup>33</sup>Iutaa vaisi nronranramwuvanto mwitaa tuvaro Pairaativa nai nraamwu kamaninra nraamwuqi vera ntero Iesusira nraanrama kyovaro mwipi vuvaro mwia kyapara hiro tiqaro, Qutaa e Iuttaaqaa ntaqikyi variaravave? tiro.

<sup>34</sup>Tuvaro Iesusiva tiqaro, Ena nraato tukyerave mwi quara qiaro? Vaisi mpovanto nianra i timwa mwihanrave e mwitaa qiaro? tiro.

<sup>35</sup>Iesusiva mwitaa tuvaro Pairaativa tiqaro, Nte Iutaa vaisive huqo? Nte hia Iutaa vaisive. Ina nramwunaa Iutaavantovata, Kotira kyaiqa vara mwate varia vaisihua mwihua nronra vaisinramwuvata, mwihuama i viteta mwaini nriavo. E nataama kyaaratave i viteta nriavo? tiro.

<sup>36</sup>Mwitaa tuvaro Iesusiva tiqaro, Nte ntaqikyiariva hiama mwaa mwataraqaa vaiho. Mwiva mwaa mwataraqaa vahitirio, Iutaavanto ni rupevo tita ni kyaara ni pataqi nrihua mwihuavata ntaquatirio. Qio nte ntaqikyiariva hiama mwatani vaiho, tiro.

<sup>37</sup>Iesusiva mwitaa tuvaro Pairaativa tiqaro, Qio qutaa e nraakyе qoraqaa ntaqikyi variaravave? tiro. Tuvaro Iesusiva tiqaro, Qutaa nte nraakyе

qoraqaa ntaqikyi varuvave. Mwianra rieqaro ni mwatani mwatataihana nruvave. Qutaa qua okyara nraakye qora timwa nyinrenrana nte mwatani tumuvave. Qutaa quara riaariva ni quama riaananrove, tiro.

<sup>38</sup>Iesusiva mwitaa tuvaro Paireativa tiqaro, Qutaa qua vahirero mwia nanra quave iho? tiro.

**Paireativa Iesusira kyatariqaa rutaate tura**  
*(Matiu 27:15-31; Maaki 15:6-20; Ruku 23:13-25)*

Paireativa mwitaa timwa kyero veva ntero Iutaa ntuvantua vita varuhua timwa nyinro tiqaro, Nte taqauqaro hia mwia rukyaarava mpo okyara mwiaqi vaiho, tiro.

<sup>39</sup>Mwitaa timwa kyero mwiva tiqaro, Qio nkye mpo inraikya utuava mwitaamama vaiho. Nkye vekeyahu nyato kyarara omwata nraa entaraqaa nte karavu vaisi kuaiku nkyiara rieqanama mwia huvantu nyataurave. Qiove nte mwianra rieqana nkyi Iutaaqaa ntaqikyi vari vaisira huvantu nyataaninrave? tiro.

<sup>40</sup>Mwitaa tuvata mwihua aakyara ntamwakye nai timwa mwita tiqata, Qaqao, hia mwi vaisira huvantu kyaante. Vaisi mpo mwia nrutu Varavaasira mwia huvantu timwataante, tura. Qio Varavaasiva vaisi ru kyeqaro mwihua munima vare varu vaisiva varura.

**19** <sup>1</sup>Mwihua mwitaa tuvaro qaiqaa Paireativa tiqaro, Iesusira viteta uro kyaantaqo mwia ntuteqaate, tuvata mwia kyaantaqo ntuteqaateqama kye vatora.

<sup>2</sup>Mwitaama kye vateta Paireatira ntaqu vaisihua uro tauvera vara kyeta qiata vaisi tovaqa voti hora ququrama kyeta mwia qiataqaa qu mwateta nraanre tavuna vara utu mwateta, <sup>3</sup>mwihua mwiva varunani uro nteta mwihua vireraqama kye Jesusirara tiqata, Iutaa vunyaa vaisi mwaavao, variqarave? timwa kyeta kyauquqo mwia viri ntuteqa kyora.

<sup>4</sup>Mwihua mwia mwitaama kyovaro Paireativa qaiqaa veva ntero Iutaa ntuvantua vita varuhuara tiqaro, Qio taqaate. Nte taqauqaro hia mwiva uaquia hi kyaiqara utihana nte mwiaqa qua vataariva hiama vahirove. Nkyevata mwia taqe ntapihi kyaate tina, nte mwia vara veva kyarerave, tiro. <sup>5</sup>Mwitaa tuvaro Iesusiva qiataqaa tauvera qu mwateta nraanre tavuna utu mwatora rirante veva ntovaro Paireativa tiqaro, Qio taqaate, mwaa mwi vaisivave, tiro.

<sup>6</sup>Mwitaa tuvata Kotira nraamwuqi Kotira kyaiqa vara mwate varu vaisihua mwihua nronra vaisinramwuvata, porisinramwuvata, Iesusira taqeta mwihua aakyara nteta tiqata, Kyatariqaa mwia hiritaate. Kyatariqaa mwia hiritaate, titia.

Mwitaa tuvaro Paireativa tiqaro, Nkyeta mwia vitaqita uro kyatariqaa hiritaate. Nte taqauqaro hia mwiva uaquia hi kyaiqara utihana nte mwiaqa qua vataariva hiama vahirove.

<sup>7</sup>Tuvata mwihua tiqata, Qaqao, mwiva tire qao timwa tauna quara mpo nteqa kyairave. Mwia kyaara mwiva qutu quarivama variho. Mwiva tiqaro, Nte Kotira mwaaquvantove tirave, tita.

<sup>8</sup>Mwitaa tuvaro Paireativa mwi quara riero mpoqiatava aatu hiro <sup>9</sup>mwiva tumu ntantero nai nraamwuqi vera ntero Jesusira kyapara hiro tiqaro, E tainyaavave? tiro. Tuvaro Jesusiva hia qua tiraitiro, tirema varura.

<sup>10</sup>Tirema varuvaro Paireativa tiqaro, E nive hia qua timwa mpirera utuaro? E riaante. Nte nronravanto nte qioma i huvantu kyena, nte qioma qiarita i kyatariqaa hiritevarave, tiro.

<sup>11</sup>Mwitaa tuvaro Jesusiva Paireatira timwa mwinro tiqaro, Kotiva nyaamwuni variva hia i kyaakue mwitirio, hiama qio e ni naatara kyaaratirio. Vaisi mpovanto ni pitaqiro nrumu i mwi vaisira kyaiqvamoto i uaquia hi kyaiqaravata nraatara kyaiho. Mwia kyaara mwi vaisiraqaa nronra quama vahiananrove, tiro.

<sup>12</sup>Iesusiva mwitaa tuvaro Paireativa mwiaqatairo Jesusira huvantu kyarerera uti varuvata Iutaa vaisinramwu ntuvantuama vita varuhua aakyara nteta tiqata, E mwia huvantu kyairaro qati virera, e hiama qiata vaisi Sisaara toti varinanrave. Mpovanto nanrianra tiqaro nte qiata vaisima varuqo qiariva, mwiva Sisaara nramwutaama variananrove, tita.

<sup>13</sup>Tuvaro Paireativa mwi quara riero uro Jesusira vitaqiro veva ntero ko riaa vaisihua taintaqaa uro mwatakyaa viro. Mwi taintava vahu mwatara nrutu nteqata, *Ori Ntamwatairave*, tura. Iutaa mwatanaahua quaqitai mwianra *Kapatave*, tura. <sup>14</sup>Vekyahu nyato kyarara nro entava mwia qanranraa vahuvaro huari vu nrinro virini qiatqa vahuvaro Paireativa uro mwi taintaraqa mwatakyaa viro Iutaa ntuvantuama vita varuhua timwa nyinro tiqaro, Qio nkye nkyeta qiata vaisi mwaa taqaate, tiro.

<sup>15</sup>Tuvata mwihua aakyara nteta tiqata, Mwia ru kyaante. Mwia ru kyaante. Mwia kyatariqaa hiritaivaro qutu quarive, tita.

Mwitaa tuvaro Paireativa mwihua kyapara hiro tiqaro, Nte qiarita nkyi qiata vaisi kyatariqa ninriqo ru terara nkyi mwutukya vahirove iho? Mwitaa tuvata Kotira kyaiqa vara mwate varu vaisihua mwihua nronra vaisinramwu tiqata, (Mwiva hia tiri qiata vaisive.) I nronravanto Sisaava mwiva nraahuma tiri qiata vaisive, tita.

<sup>16</sup>Mwitaa tuvaro Paireativa Jesusira kyatariqa hiritaate tiro, mwihua kyauquqi kyora.

### **Iesusira ninriqotaita kyatariqaa rutora**

*(Matiu 27:32-44; Maaki 15:21-32; Ruku 23:26-43)*

Paireativa Jesusira mwihua nyuvata mwihua mwia viteta vuvaro

<sup>17</sup>Iesusiva nai hirite kyatarira vara qu varero vuvata mwihua Jesusira vita vareta mwaa quaraqitai *Qiata Mwukyaari* satave tunani vita. Iutaa

mwatanaahua quaqitai Korokotaave tunani uro ntora.<sup>18</sup> Uro nteta Jesusira kyuqu kyauqu kyatariqaa ninriqotaita rukyeta vara mwaamwi mwataqi ratora. Mwia rateta vaisi mpotanavata kyatariqaa ru kyeta hini hini ratovaro Jesusiva mwitanahua utaqaa varura.

<sup>19</sup> Jesusira kyatariqaa hiritovaro Paireativa qua qara ntumwa tora uro Jesusira qiatani kyatariqaa rutora. Mwataama kyero qara ntumwa tero:  
IESUSIVA NASARETINYAAVA IUTAA VUNYAA VAISIVE, tura.

<sup>20</sup> Jesusira kyatariqaa hiritova Ierusaremi nraaqani vahuvatara tita, mwi mwatanaahua airivanto nrumu Jesusira taqeta mwi quara kyaara ntumwa kyeta taqora. Mwi quara taara mpo quaqitairo qara ntumwa tora. Iutaa quaqitaivata, Romeni quaqitaivata, Kiriki quaqitaivata, qara ntumwa tora.

<sup>21</sup> Kotira nraamwuqaa ntaqikyu vaisihua mwi quara taqeta Paireatirara qaqao tita, E hia mwianra Iutaa qidata vaisive timwa kyera qara ntuataarave. E mwataama kyera qara ntuataarave. Mwi vaisiva nai tiqaro nte Iutaa qidata vaisive tirave. Mwitaa timwa kyera qara ntuante, tita.

<sup>22</sup> Tuvaro Paireativa qaqao tiro, Nte qara ntumwa tauva qio mwitaama vahiarive, tura.

### **Jesusira tuavaaqa ntainra kyeta varora**

<sup>23</sup> Ntaqu vaisinramwuhua Jesusira kyatariqaa hiriteta mwiaqataita mwia tuavaaqa vara kyeta erahiamuaantema ntainra kyeta ntaqu vaisihua nkyiari erahiamuaantema variqara tita, mpovanto mpoqatairo varovaro mpovanto mpoqatairo varero mwitama kyeta varetia mwia siotivata vara kyeta taqovaro mpuahaanta virisairo mpiani tumitarova vahuvata ntaqu vaisinramwuhua tiqata, Hia mwaa nrahituare.<sup>24</sup> Nrivaqe mwianra kaati voti hira santu ruararo tiriqitairo mpovanto mwia varaarive, tita. Mwitaa turara tiro, mpo quavanto haaru qumina vakya qara ntumwa tova quataa mwivau vahura. Mwataama tiro:

Ni tuavaaqa ntainra kyeta varevarave.

Ni sioti mpuahaanta vararerata kaati ruantema kyetama varevarave, tiro. Mwitaa tura.

(Sng 22:18)

Ntaqu vaisinramwuhua mwitaama kyeta Jesusira tuavaaqa ntainra kyeta varora.

### **Iesusiva nai nronranra tura**

<sup>25</sup> Jesusira kyatariqaa hiritovata nraakyenramwuvanto nrumu mwi kyatarira tataaqa sivita varura. Jesusira nrovavata, mwia nronra nrunravantovata, Kiropasira nraata Mariaavavata, Mariaava Makataranyaavavata, mwinramwuhua Jesusira hrito kyatarira tataaqa sivita varuvaro<sup>26</sup> Iesusiva taqovata mwia nrovavata mwia vataqiro nrohu vaisiva mpo Iesusiva mwianra mwutukya ntu vaisivavata

varura. Mwitanahua varuvaro Iesusiva nai nronranra tiqaro, <sup>27</sup>Mwaa nraakyevao, e mwi vaisirara ni maaquve qianta, tiro. Timwa kyero nai vataqiro nrohu vaisira Iesusiva mwianra mpoqama kyero mwutukya ntu vaisirara tiqaro, Mwaa nraakyerara ni ntorave qianta, tiro. Mwitaa tuvaro mwi entaraqaatairo mwia vataqiro nrohu vaisiva Iesusira nronra vitaqiro nai nraamwuqi kyero kyuqema kyero mwiaqaa ntaqikyiqiro vura.

### **Iesusiva qutu vura**

*(Matiu 27:45-56; Maaki 15:33-41; Ruku 23:44-49)*

<sup>28</sup>Iesusiva mwi quara timwa kyero mwiva ntapihi kyovaro qio mwia kyaiqavanto taiqa vura. Mwiaqatairo mpo qua haaru qumina vakya mpukuqi qara ntumwa tova qutaa mwivau vahiarive tiro, mwiva tiqaro, Ni nramanri nraataa iho, tiro.

<sup>29</sup>Mwitaa tuvaro uaini ukavura tanuqi vahuvaro tavuna viti vara kyero nramanriqi ntamwa kyero kyaamwu vitiqaa rupa kyero viri Iesusira nroqi ntamwa tovaro <sup>30</sup>Iesusiva ukavu nramanrinra mwia nrenro mwiaqatairo mwiva tiqaro, Qio taiqama viho, timwa kyero nru kinta tero nai mwanraqura titovaro vuvaro mwiva qutu viro.

### **Vaataaraqotairo Iesusira nraanter sata ra varora**

<sup>31</sup>Mwiva qutu vuvaro mwia qanranraa mwaanra enta vekyahu nyato kyarara nro entava nronra enta vahianinranra tita, Iutaavanto tiqata, Hura vaisinramwu qutu quahua mwihua mwamwanta kyatariqaa vahiankyorave timwa kyeta, uro Paireatirara tiqata, E tirata mwinramwuhua kyuqu ntuvuraa kyaivata mwinramwuhua qamwanrama qutu vivata varaqita uro quntaate, tita.

<sup>32</sup>Tuvaro Paireativa eo tuvata mwia ntaqu vaisinramwuhua nrumu Iesusira tataaqa hirito vaisira kyuqu ntuvuraa kyeta uro vaisi mpo hini hiritora kyuqu ntuvuraa kyeta <sup>33</sup>uro Iesusira kyuquvata ntuvuraa kyaare tita, taqovaro mwiva vaakya qutu vuvata mwihua qaqlira kyeta hia mwia kyuqu ntuvuraaqura.

<sup>34</sup>Ntaqu vaisiva mpovanto uro vaataaraqotairo Iesusira nraanter sata ra varero. Ra kyovaro qamwanrama kyero nraanrevata qati nramanrivata tumunra.

<sup>35</sup>Qio nte mwaa quara qara ntumwa tauva mwi entara variqana nte mwi inraikyara mwi inraikyara taqaavarave. Qutaaqama kyena nte mwi inraikyara mwi inraikyara taqaavarave. Nkye mwi quarara quitaave qiate tina, nte mwi inraikyara quitaaqama kyena taqaurara nkyivata timwa nyuquo.

<sup>36</sup>Ntaqu vaisiva mwitaa hurara tiro, haaru qati vakya qara ntumwa to quava qutaa mwivau vahura. Qara ntumwa tova mwataama tiro:

Mwihua hia mwia mwukyaari mpo ntuvuraa kyevarave,

tura.

(*Sng 34:20*)

<sup>37</sup>Qaiqaa mpo quavata haaru qara ntumwa tova tiqaro:

Mwihua nkyiari vaataaraqotaita rute vaisira taqevarave,  
tura.

(*Sek 12:10*)

### Iesusira quntamwa tora

(*Matiu 27:57-61; Maaki 15:42-47; Ruku 23:50-56*)

<sup>38</sup>Mwitaa huvaro vaisi mpovanto mwia nrutu Iosepiva mwiva Arimatianyaava mwiva tauraaqama Iutaa vaisinramwu nyaatu aatu hiqaro tuqeta kyeqaro Jesusira vataqiro nrohu vaisiva, mwiva uro ntero Paireatirara tiqaro, Jesusira mwamwanta mpiraqena varaqina quantaankye, tiro. Tuvaro Paireativa tiqaro, Qio uro vara kyera quantaante, tuvaro Iosepiva uro Jesusira mwamwanta itu kyero varora.

<sup>39</sup>Varovaro Nikotimaasiva, mwiva haaru entaqi Jesusira uro taqova, mwivavata kyuqe ueri kyuqe hu kyatariva mwunta vura kuaaqi tuqasaakye vatoravata varero. Mwia muaanravanto vahirero 30 kiro vahura varero Iosepikyantiri viro.

<sup>40</sup>Mwitanahua Jesusira mwamwanta vareta ecarori tavuna vara kyeta kyuqe mwunta vura vatama kyeta mwia mwamwanta qapuqama kyora. Iutaa mwatanaahua vaisi quanto okyarava mwitaama vahurara tita, mwitanahua mwitaa hura.

<sup>41</sup>Iesusira hiritonani kyaqamwa tutova vahuvaro mwipi qaraakya ori vauru tora vaisi qunte varuva mpo vahura. Mwia qaraakya vahuvaro tauraa hia vaisi mpo mwipi quntora.

<sup>42</sup>Qio mwia qanranraa Iutaa mwatanaahua mwaanra enta vahiananrove timwa kyeta, mwi oriva qaumato vahuvata mwipi mwitanahua Jesusira uro quntamwa tora.

### Iesusiva qati sivura

(*Matiu 28:1-8; Maaki 16:1-8; Ruku 24:1-12*)

**20** <sup>1</sup>Qio Saanteqa toqa entaqi qakyo qaatatarera huvaro Mariaava Makataranyaava Jesusira oriqi quntamwa toraqi uro ntero taqovaro orivanto qesa titatova qatinani vara kyovaro vahiro.

<sup>2</sup>Ori qatinani vara kyova vahuvaro mwi nraakyeva uro ntante hiantero Jesusira nraaqiartana Saimoni Pitaavavata, mpo vaisi Iesusiva mwianra mpoqama kyero mwutukya ntu vaisivavata, varunani nri ntero mwitanahua timwa nyinro tiqaro, Mwihua oriqitaita Jesusira vara kyaavata tirenramwu hia mwia varaqita vataara taqauro, tiro.

<sup>3</sup>Mwitaa tuvata Pitaavavata, vaisi mpo mwivavata, Jesusira oriqi vatora mwiniyanra vita. <sup>4</sup>Mwitanahua hianteta vuvaro mpovanto Pitaara nraatara kyero mwiva nraante oriqi Jesusira quntamwa tonani uro ntero.

<sup>5</sup>Mwiva nraante uro ntero hiama mwipi viqetaraitiro, qatinani variqaro kakataama viro vera taqovaro oriqi tavuna nraahu vahura.

<sup>6</sup>Tavuna nraahu mwipi vahuvare taqero varuvare nraakiara Saimoni Pitaava nri ntero mwiva hia qatinani variraitiro, mwiva qamwanrama oriqi vera ntero taqovaro tavuna nraahu vahuvare <sup>7</sup>mpo tavunavata, Iesusira qiata nraamwuma tova mwivavata, qumina vahiro. Iesusira ququtama to tavunava, mwi tavunava hia mpo tavunavata kuaaqaa vahiraitiro, nanrianra mposata vahura.

<sup>8</sup>Mwitaama vahuvare vaisi mpo vaakya nruva, mwivavata mwipi verantero mwi inraikyara taqamwa kyero mwiaqatairo mwia vu nraato ntapihi vuvaro Iesusira okyarara ntapihi kyero qio qutaa mwivave tiro. <sup>9</sup>Tauraa mwitanahua variqata mpukuqi Iesusiva qutu viro qaiqaa qati siquainranra qara ntumwato quara hia ntapihi riora. Hia ntapihiraitita, variqi vita qio mwi entara mwitanahua mwi quara ntapihi kyora. <sup>10</sup>Mwi inraikyara taqeta mwitanahua nrumu ntanteta mwaatani vura.

**Mariaava Makataranyaava Iesusira taqora**  
(*Maaki 16:9-11*)

<sup>11</sup>Mwitanahua mwaatani vuvaro Mariaava Iesusira quntamwa tonani nri ntero qatinani variqaro ntate variro. Mwiva ntate variqaro kakataama kyero oriqi vera taqovata <sup>12</sup>nyaamwunyaahua taaratana mwipi varura. Mwitanahua egarori tuavaaqa ututotana mpovanto tauraa Iesusira mwamwantavanto vahura qiatani mwatakyaa viro varuvare mpovanto mwia kyuqutarani mwatakyaa viro varura.

<sup>13</sup>Mwitanahua Mariaara kyapara hita tiqata, Mwaa nraakyevao, nanra inraikyarave e ntate variaro? tuvaro mwiva tiqaro, Mpohua ni nronra vaisi mwaaqitaita vara kyaavana nte mwihua uro mwia kyaanani hia taqaraitinama, mwianra ntate varuqo, tiro.

<sup>14</sup>Mariaava mwitaa timwa kyero mwiva tuqasaa viro taqovaro Iesusiva mwia mwoqani siviro varuvare mwiva hia mwia viri ntapihi taqaraitiro, mpo vaisivantove tiqaro varuvare <sup>15</sup>Iesusiva mwia kyapara hiro tiqaro, Mwaa nraakyevao, nanraqamave e ntate variaro? E tararave puua hi variaro? tiro. Iesusiva mwitaa tuvaro Mariaava nai riero tiqaro, Mwi vaisiva kyaqamwa mwaaqi ntaqikyi vari vaisivave, tiro. Timwa kyero mwianra tiqaro, E mwia vitaqira uro kyerava varirera, mwipi vatauqo tiraqe nte uro varaankye, tiro.

<sup>16</sup>Mwitaa tuvaro Iesusiva mwianra tiqaro, Mariaao, tiro. Tuvaro Mariaava tuqasaa viro Iesusira ntapihi taqero Iesusirara nai Iutaa quaqitairo tiqaro, Raponaio, tiro. Mwaa quaraqitai tirera, Mwaanra ti variara vaisio, tiro.

<sup>17</sup>Mariaava mwitaa tuvaro Iesusiva tiqaro, Qio hia niqaa tu varaante. Nte hia ntena kova hinani tumu ntantena vuqo, tiro. Mwitaa timwa kyero mwiva mwia timwa mwinro tiqaro, E ni katamwanra uro timwa nyiante. Nianra mwitaa mwitaama kyera timwa nyiante. Nte virini ni kovavata

nkyi sovavata hinanive, ni mwanriqavantovata nkyi mwanriqavantovata hinani tumu ntantena virerave, tiho qiantre, tiro.

<sup>18</sup>Mwitaa tuvaro Mariaava Makataranyaava nrumu ntantero uro Jesusira nraaqiaranramwu timwa nyinro tiqaro, Nte tiri nronra vaisi mwia taqauqo. Mwiva nianra mwitaama kyera nkyi timwa nyante tiho, tiro.

**Iesusiva nai nraaqiaranramwu suqaa qovarama vura**  
*(Matiu 28:16-20; Maaki 16:14-18; Ruku 24:36-49)*

<sup>19</sup>Mwi Saanteraqaa enta huvata Jesusira nraaqiaranramwuvanto Iutaa nronra vaisinramwu nyaatu aatu hiqata nraamwu mpoqi qesanramwu vahura ruteta varura. Mwihua mwipi varuvaro mate mwipiara Iesusiva mwihua utaqaa qovarama viro sivi variro mwihua qua mwantero tiqaro, Nkyi mwutukya qihakya hirata variate, tiro. <sup>20</sup>Mwitaa timwa kyero mwiva nai kyauqu ninriqotaita ru ratonta kyora mwihua nyaamwutero nai nraanterasataa ratoravata nyaamwutora. Nyaamwutovata mwia nraaqiaranramwu mwia taqovaro mwihua kyuqe huvata mwihua mwianra qamwateqata varura.

<sup>21</sup>Varuvaro Iesusiva qaiqaa mwihua qua mwantero tiqaro, Nkyi mwutukya qihakya hirata variate. Ni kova ni titaintema kyena nte nkyivata sitarerave, tiro.

<sup>22</sup>Mwitaa timwa kyero mwiva mwihuaqua nai nraaiho vuata kyero tiqaro, Qio Kotira mwanraqura varaate. <sup>23</sup>Nkye vaisi mpovanto Kotira qua nteqa kyaani quara qaqlira kyaivera, mwi quava taiqama quananrove. Nkye mwi quava qati vahiarive tivera, mwi quava qatima vahiananrove, tiro. Mwitaa tura.

### Tomaasiva Jesusira taqora

<sup>24</sup>Iesusiva nai nraaqiaranramwu hunani nri ntero mwipi varuvaro mwi entara mwia nraaqiara mpovanto 12 nramwuqitairo hia mwihuavata varura. Mwia nrutu Tomaasira mwia mpo nrutu Kaapirave tura.

<sup>25</sup>Iesusiva vuvaro Tomaasiva mwisairo nri ntovata Jesusira nraaqiara mpo uhua Tomaasira timwa mwita tiqata, Tire nronra vaisi Jesusira taqauro, tita.

Tuvaro Tomaasiva tiqaro, Qaqao, nte hia mwia kyauquqi ninri rutaara nrumwaanra taqena, nte hia ntene kyauqu mwipi veta kyena, mwia nraanterani rutaaraqivata hia ntene kyauqu veta kyaraitina, hia nkyi quara quataave qianinrave, tiro.

<sup>26</sup>Tomaasiva mwitaam timwa kyero varuvaro kuaa uiki nritarovata Jesusira nraaqiaranramwuvanto varuvaro Tomaasivavata mwihua kyapata variqata ekyaa qesa ruteta mwipi varuvaro Iesusiva qaiqaa qovarama viro mwihua utaqaa siviro variro mwihua qua mwantero tiqaro, Nkyi mwutukya qihakya hirata variate, tiro.

<sup>27</sup>Timwa kyero mwiva Tomaasirara tiqaro, Qio ena kyauqu tutu kyera ni kyauquqi veta kyeqara taqaante. Ena kyauqu tutu kyera ni nraanterani rutaaraqi vera kyeqara taqaante. E nianra taara nraato tinara qaqlira kyaante. E nianra kepukyaqama kyera riemwaqlira quante, tiro.

<sup>28</sup>Mwitaa tuvaro Tomaasiva mwia timwa mwinro tiqaro, E ni nronravantove. E Kotiva ni mwanriqvavanto variaro, tiro.

<sup>29</sup>Mwitaa tuvaro Iesusiva mwia timwa mwinro tiqaro, Tomaasio, e ni taqera mwiaqatairama e nianra quataave qiaro. Qio tahuave hia ni taqaraitita, nianra quataa mwivave tihua, mwihua qamwateqata variate, tiro. Iesusiva mwitaa tura.

### Mwaa mpukura okyarara tura

<sup>30</sup>Iesusiva nai nraaqiaranramwu suqaa variqaro nai okyara nyaamwutarerero nronra kyaiqa, mpo kyaiqa mpo kyaiqa vare varura. Qio nte Ioniva mwi kyaiqara hini nraahu mwaa mpukuraqi qara ntumwa tena.

<sup>31</sup>Nkye Iesusirara quataa mwiva tiri kyaahaqa hiariva variqaro quataama mwiva mwanriqa Kotira mwaqavavto variho timwa kyeta mwianra kepukyaqama kyeta riemwaqlita vita ekya enta ekya enta qati variqi quate tina, nte Ioniva mwaa quara qara ntumwa taura.

### Iesusira nraaqiara 7 nramwuvanto qaiqaa mwia taqora

**21** <sup>1</sup>Mpo enta Iesusira nraaqiaranramwuvanto Taipiriaasi kyaareraqa Kariri mwatani varuvaro Iesusiva qaiqaa mwihua suqaa qovarama vuvata mwia nraaqiaranramwuvanto mwia taqora. Mwataamama mwi quava vahiro.

<sup>2</sup>Mwia nraaqiaranramwu Saimoni Pitaavave, Tomaasiva mwia mpo nrutu Kaapivave, Kenaa mwatukya Karirinyaais Nataanierivave, Sepetira mwaqutanave, Iesusira nraaqiara mpo taaratanave, mwinramwuhua mwini kuaaqi varura.

<sup>3</sup>Saimoni Pitaava hini mwihuara tiqaro, Qio nte tavukyara vahe ntarera virerave, tuvata mwinramwuhua tiqata, Tirevata virerave, titi. Mwitaa timwa kyeta uto mpotuqi mwaanri nteta mwipi variqata entaqi tavukyara vahe ntamwaqi vita hia tavukya mpokuvata varora.

<sup>4</sup>Mwitaaamaqita vuvaro qaatarera huvata mwihua taqovaro Iesusiva kyaarera tokyaqaa siviro varuvata mwihua hia mwia ntapihi taqaraitita, mpo vaisive tuvaro <sup>5</sup>mwiva mwihuara tiqaro, Ni vaisituaavo, hiave nkye tavukya vareta hiavo? tiro. Mwitaa tuvata mwihua tiqata, Hia varauro, tuvaro mwiva tiqaro, <sup>6</sup>Qio nkye vahe kyaatutani kyeta tavukya varaate, tiro.

Mwitaa tuvata mwihua vahe kyaatutani kyeqata taqovaro vahevanto piqa vuvaro tavukya airinti mwipi vahuvaro anomia kyero muaanra ntovata mwihua hia qio vahe pati mwaanri mpotuqi vataaqara hura.

<sup>7</sup>Mwihua hia vahe pati mwaanri mpotuqi vataaqara huvaro Iesusiva mpoqama kyero mwutukya ntu vaisiva Pitaara timwa mwinro tiqaro, Mwi vaisiva tiri nronravantove, tiro. Mwitaa tuvaro Saimoni Pitaava mwi quara riero nai sioti qatinani vatora vara utu varero mpotuqitairo mwaamwi ntero nramanriqi kyavuhu viro nako ru varero Iesusiva hunanianra vuvata hini mwihua mpotu mwiqi varura.

<sup>8</sup>Kyaarerera tokya mwiva hia nyianrani vahuvatara titi mwihua mpotuqi variqata tavukyavanto vahe piqa kyora ntanrauqi vita tokyani uro ntora.

<sup>9</sup>Tokyani mpotu uro vateta mwihua mwaamwi nteta taqovaro qia quaratero mwiaqaa tavukya utatova vahuvaro mperetivata vahura.

<sup>10</sup>Vahuvaro Iesusiva mwihuara tiqaro, Tavukya mateqa varataara kyaatavata vareta nriate, tiro.

<sup>11</sup>Mwitaa tuvaro Saimoni Pitaava mpotuqi mwaanri ntero vahe mwia ntanrauqiro tokyani uro kyora. Tavukya airi 153 nramwu vaheqi vahuvaro vahevanto ntupema quataara hia ntupema vura.

<sup>12</sup>Mwitaa huvaro Iesusiva tiqaro, Qio nrita kyara nraate, tuvata mwihua Iesusira vaakya ntapihi kyeta tire kyauruaro titi mwihuaqitairo hia mpovanto Iesusirara e tavave tura. <sup>13</sup>Qati varuvaro Iesusiva mperetivata tavukyavata mwihua nyuvata nronra.

<sup>14</sup>Iesusiva nai qutu vuraqitairo siviro nai nraaqiaranramwu suqaa qovarama vuvata mwihua mwia taqora. Mwi entara taarampo nani mwihua suqaa qovara hora.

### Iesusiva Pitaaravata qua tura

<sup>15</sup>Mwihua kyara nramwa kyovaro Iesusiva Saimoni Pitaara kyapara hiro tiqaro, Saimonio, Ioninra mwaquo, quataave mwaaisihua mwutukyavanto nianra vahiravata nraatara kyero i mwutukyavanto nianra mpoqiyavata vaiho? tiro. Mwitaa tuvaro Pitaava tiqaro, Nronrao, quataave. Ni mutukyavanto iara vahira mwia e ntapihi kyaananrave, tiro. Tuvaro Iesusiva tiqaro, Qio ni sipisipi nraati kyara nyiante, tiro.

<sup>16</sup>Mwitaa timwa kyero Iesusiva qaiqaa mwia kyapara hiro tiqaro, Saimonio, Ioninra mwaquo, quataave i mwutukyavanto mpoqiyavata nianra vaiho? tiro.

Tuvaro Pitaava tiqaro, Nronrao, quataave. Ni mutukyavanto iara vahira mwia e ntapihi kyaananrave, tiro.

Mwitaa tuvaro Iesusiva tiqaro, Qio ni sipisipi qaa ntaqikyiate, tiro.

<sup>17</sup>Mwitaa timwa kyero Iesusiva qaiqaavata tiqaro, Saimonio, Ioninra mwaquo, quataave i mwutukyavanto mpoqiyavata nianra vaiho? tiro.

Iesusiva taarampo nani tiqaro, Quataave i mwutukyavanto mpoqiyavata nianra vaiho, tuvarora tiro, Pitaara mwutukyavanto uaquia huvaro mwiva tiqaro, Nronrao, e ekyaa inraikya ntapihi kyaaravave, Ni mutukyavanto iara vahira mwia e ntapihi kyaananrave, tiro.

Mwitaa tuvaro Jesusiva Pitaarara tiqaro, Qio ni sipisipi kyara nyiante, tiro.

<sup>18</sup>Jesusiva mwitaa timwa kyero Pitaara timwa mwinro tiqaro, Nte qutaa qua qianinra riaante. Tauraa e qaraakya vaisi variqara e tuavaaqa utu varera ena virera hiananraqaa quananrave. Nraakiara e nyaapaiqama vira ena kyaqu tututairaro mpovanto i tuavaaqa utu mwatero i vita varero hia e virera tinanraqaa quananrove.

<sup>19</sup>Jesusiva mwi quaraqaa ntumwa kyero Pitaava mwitaama kyero Kotira nrutu tuaahereqaro uro qutu quananrove, tura. Jesusiva mwi quara timwa kyero mwiva Pitaara qaiqaa timwa mwinro tiqaro, E ni pataqira nriante, tiro.

#### **Iesusiva nai nraaqiara mpore mpo qua tura**

<sup>20</sup>Mwitaa tuvaro Pitaava tuqasaa viro taqovaro Jesusiva mpowama kyero mwutukya ntu vaisiva mwitanahua nraakiara nrinro. Haaru mwihua entaqi kyara nre varuvaro mwi vaisiva Jesusiraqaa uromwi vuntuvi variqaro Jesusira kyapara hiro tiqaro, Ta vaisivave i nramwutaahua iara timwa nyiananrove, tu vaisiva nri ntovaro <sup>21</sup>Pitaava mwia taqero mwianra Jesusira kyapara hiro tiqaro, Nronrao, qio mwaa vaisiva mpo? Mwaa vaisiva nataave hiananrove? tiro.

<sup>22</sup>Pitaava mwitaa tuvaro Jesusiva mwia timwa mwinro tiqaro, Nte mwianra tiqana, E qati variqira viraqena nte qaiqaa mwatani tumuankye, qiankyera, mwia hia i kyaiqama vahiananrove. E ni pataqira nriante, tiro.

<sup>23</sup>Jesusiva mwitaa tuvata mwia nraaqiaranramwuvanto mwi quara apiqama kyeta rieta mwihua mwitaama titi, Jesusiva tiqaro mwi vaisiva hiama qutu quananrove tiho, tura. Jesusiva hia mwitaa tiraitiro, mwiva tiqaro, Nte mwaa vaisirara tiqana e variqira viraqena nte mwatani tumuankye qiankyera, nte mwianra mwitaa qiariva hiama i kyaiqa vahiananrove, tiro. Jesusiva mwitaa tura.

#### **Ioniva taiqaani quara qara ntumwa tora**

<sup>24</sup>Qio mwi entara Jesusiva qua timwa mpu vaisiva nte mwaa mwivave. Nte variqanama mwi inraikyara mwi inraikyara taqamwa kyena mwiaqataina mwaa quara qara ntumwa taurave. Nte tu quava ekya mwi quava qutaa quama iho.

<sup>25</sup>Jesusiva varo kyaiqara nte hini vitiqia nraahu qara ntumwa taurave. Ekya mwi kyaiqa kuaiqia kuaiqia qara ntumwa taivera, airi mpuku vahiro mwaa mwatara piqa kyaananrove. Qio nte mwiqarama tuqo.